

**PNG gat
piksa
nogut**

PES 2

**PDM
tekova
long
Mosbi
siti**

PES 3


**Isten
Hailans
sevis
bagarap
long
politik**

PES 7

**Ol nius
long
Morobe
provins**

PES 9-10

Somare i no laikim ol trip memba



• Sir Michael Somare.

by **PETER MAIME**

PAPA bilong kantri, Sir Michael Somare i laikim bai i gat lo bilong mekim save long ol memba i save kalap long kainkain politikel pati.

Sir Michael i tok planti memba bilong palamen i save lusim wanpela pati na go joinim ol narapela pati na dispela i save daunim demokratik sistem bilong kantri.

Em i askim bai i gat lo na sapos wanpela memba i lusim wanpela pati na go joinim narapela, ol pipel bilong dispela ilektoret mas i go long bai ileksen.

Em i tok, dispela memba i mas kisim tok orait long ol pipel long ileksen olsem em i

memba bilong dispela pati em i laik joinim.

Sir Michael i mekim dispela toktok long wanpela woksop Konsitusenel. Developmen Komisn i ronim long kisim tingting long kamapim wanpela lo bilong strongim na was long ol politikel pati insait long kantri.

Dispela woksop i bin kamap long dispela wik long Pot Mosbi na wankain woksop bai kamap long Rabaul, Lae na Hagen.

Sir Michael tu i askim bai bihain long olgeta ileksen, wanem pati i gat bikpela namba bilong ol memba i mas go pas long fomim gavman.

Em laikim bai i mas gat lo we, Gavana Jenerel i mas singautim wanpela politikel

pati i gat bikpela namba long bungim ol narapela pati long putim nupela gavman bilong kantri.

Long eksperiens bilong Sir Somare, em i tok olsem sapos i gat vot i nogat bilip long gavman, Praim Minista bilong dispela gavman i mas pinis na i no pati bilong em.

Em i tok long dispela we, wok politiks na sistem bilong gavman bai wok strong long sevim kantri.

Sir Somare i bin bungim planti vot i nogat bilip taim em i stap olsem Praim Minista bilong kantri.

Em i sapatim tingting bilong gavman olsem i mas gat wanpela lo bilong politikel pati o nogat bai planti hevi i bungim kantri.

Politiks i bagarapim kantri, Waieng i tok

TAIM wanpela gavman i senis na nupela gavman i go insait, dispela i save kamapim hevi long wok bilong pablik sevis.

Taim nupela gavman i kisim ples, em i save rausim ol het bilong gavman na ol ejensi bilong en na putim ol sapota o lain bilong ol yet long bosim ol wok.

Planti taim, sampela ol man o meri gavman i save makim i nogat gutpela save o eksperiens long ronim wok olsem na ol sevis i no go long pipel.

Olsem na kantri i lusim planti save manmeri husat inap long givim gutpela edvais long gavman long ronim wok long kantri.

Dispela em sampela samting, Minista bilong Stet, Peter Waieng i autim taim em i toktok long semina bilong Konsitusenel Developmen Komisn long dispela wik.

Em makim maus bilong Praim Minista, Sir Mekere Morauta na tok strong olsem i mas gat wanpela lo long was long ol politikel pati.

Em i tok pati politiks i wok long bagarapim ol wok bilong gavman na kamapim nem nogut long sampela ol opis bilong en.

Em i tok, ol senis bilong strongim ol politikel pati mas helpim ol pipel na kantri. Dispela senis o lo bilong politikel pati mas nokeri daunim wok bilong gavman.


Mista Waieng i laikim bai i gat wanpela lo bilong politikel pait bipo long kantri i go long 2002 nesanel ileksen.

Em i tok kantri i mas go long ileksen wantaim nupela lo bilong ol politikel pati na wanem samting ol i mas mekim long taim bilong ileksen.

Em i tok nau yet, i nogat lo na planti krangi pasin i save kamap.


Long redim vot i nogat bilip, planti memba i save go long kemp na stap insait long banis aninit long gan poin olsem ol kalabus lain, Mista Waieng i tok.

Em i tok dispela kain pasin i no stret, ol lida i no fri long votim wanem gavman ol i laik kamapim.



• Peter Waieng.

KULCHA YUMI-FM 5.00 PM MON TO FRI



PROUDLY SPONSORING LOCAL PNG MUSIC

GOVERNMENT WARNING SMOKING IS DANGEROUS TO HEALTH

PLIS RIPOT

Wes Nu Briten:

Foapela pipel i bin dai long Wes Nu Briten long las wiken bihainim wanpela birua bilong ka. Ol narapela i bin kisim bagarap na ol i wok long kamap orait long Kimbe haus sik.

Birua ya i bin kamap long las Sande nait taim wanpela PMV bas i bin bamim wanpela trak long Kimbe-Hoskins haiwe.

Plis i bin kamap long hap bilong birua na ol i karimaut ol wok painimaut long dispela samting.

Plis ripot i tok PMV draiva i bin spak draiv spit tru na kamapim birua. Em na boskru i bin dai taim tupela manki long narapela ka i bin dai tu. Tupela manki i bin pondauin i kam aut long ka na dai kwikim.

Ripot i tok narapela ka i bilong Pos PNG. Em bin wok long karim i go bek long ples ol pilaia na ol sapota bilong Tamarua ruls futbol klab bihainim gren fainol pilai long Kimbe.

Draiva bilong trak i bin laik abrusim PMV we i wok long kam spit tru na em bin surik long sait bilong rot.

Tasol PMV i kam spit tru na bamim trak na kamapim birua we i bin kilim dai tupela manki na draiva na boskru bilong PMV.

Long las mun tu, wanpela meri i bin dai long boria bilong ka long Wes Nu Briten. Long dispela taim tu, PMV i bin bam wantaim wanpela trak.

Mosbi:

Trefik long Poreporen Friwe long Mosbi i bin klostu stop long Tunde moning bihainim wanpela holap we i no kamap tru tru.

Plios ripot i tok ol raskol i bin laik wokim holap long wanpela waitman long Waigani Draiv taim em bin stop long wanpela bilding.

Foapela man i bin bihainim man ya long wanpela ka na taim em i luksave long dispela, em i jam aut long ka wantaim pistel long han bilong em. Taim ol raskel i lukim dispela, ol i ronawe i go olsem long Hohola.

Wanpela plis patrol ka i bin stap klostu na ol bin helpim long stapim trabel ya. OPastaim ol bin ting olsem ol raskol i mas stap long ka na ol i sut long ka. Plis helikopa i bin flai klostu stret long traim helpim wantaim birua ya.

• Pasin bilong bagarapim ol meri i wok long kamap bikpela insait long Mosbi siti long dispela taim.

Ol ripot i tok ol raskol i bin bagarapim wanpela meri long Gaden Hills long dispela wik Tunde nait.

Ol plis ripot i tok meri ya i bin go stap wantaim boipren bilong em long haus bilong ol hauslain bilong em.

• Plis i tok long bikmoning 2 klok, faipela man i bin fos na go insait long rum na pulim meri i kamaut, paitim boipren bilong em na pulim meri ya i go long bus na bagarapim em inap long moning.

Narapela pasin bilong bagarapim meri i bin kamap lon Sande apinun long wanpela plis bareks long siti.

Wanpela yangpela meri husat i gat 15 krismas i bin go long bareks long lukim boipren bilong em husat i wanpela plisman tasol narapela plisman i bin bagarapim em. Plis ripot i tok.

UN Ripot tok piksa bilong PNG i no gutpela

VERONICA HATUTASI i raitim

PIKSA bilong Papua Niugini i no gutpela tumas long Yunaitet Nesens Humen Developmen ripot bilong dispela yia.

Dispela ripot i save makim na skelim mak bilong ol wok insait long ol kantri long wan wan yia na glasim wantaim ol arapela kantri long rijen na wol.

Ripot i soim klia long wok ol pipel husat i gat moa krismas i save mekim na dai long en, save na laipstail. PNG i kamap namba 164 insait long 170 kantri long wol.

UN ripot i tok humen developmen mak bilong PNG i klostu wankain long Chad na Djibouti, tupela turangu kantri stret long Afrika.

Ripot i skelim PNG wantaim ol arapela kantri long Pasifik rijen, Fiji i stap long 61 mak, Samoa long 70, Vanuatu long 116 na Solomon Allian long 118.

Ripot i soim tu olsem wanpela long faipela pipel long PNG i save dai bipo ol i bungim namel mak long krismas bilong ol.

UN Pasifik Humen Ripot i soim tu olsem 22.6 pesen (%) long 4.4 milien pipel bilong PNG bai ino inap long bungim 40

krismas na ol bai i dai.

Moa man i save bungim 55 yias na dai taim mak bilong ol meri em long 54 yias.

Ripot i soim tu olsem 71.8 pesen long ol bikpela man i no save long rit na rait, 76 pesen i no gat gutpela wara long dring na 29 pesen long ol pikinini daunbilo long faipela krismas i bun nating. Ripot i putim PNG olsem wanpela long ol 15 sore kantri insait long Pasifik rijen.

Ripot i soim tu olsem long sait bilong edukesen, helt na wok mani, ol meri i stap daunbilo tru long ol man.

Insait long wokfos bilong kantri, 18 pesen tasol em ol meri. Tupela meri tasol i stap long palamen we i gat 109 memba ong en na 12 pesen tasol i holim ol bikpela wok long menesmen na edministresen. Long profesenel na teknikel level, mak i stap long 30 pesen, ripot i tok.

Ripot i tok kantri i mas wok hat long kamap long gutpela mak bikos dispela i stap aninit long mama lo.

Dispela i tok ol meri i mas stap insait long ol wok bilong kirapim kantri na dispela i karamapim politikel, ikononomik na sosel wok.

Bikos long bikpela mak bilong populesen i no save long rit na rait, nogat gut-

pela trenspot sistem, ol rot na hevi bilong helt na kaikai. Olsem na ol meri i no gat sapot na strong yet.

Bos bilong Yunaitet Nesens Developmen Progrem long PNG Elizabeth Reid i tok ol i save skelim PNG olsem namel kantri long mak bilong pulim mani long en. Kantri i gat planti risos samting long graun, wara, aninit long graun na bus. Tasol kantri i no wok long yusim gut dispela risos long ol gutpela samting na sevis we bai helpim pipel long kisim gutpela kaikai long en long sait bilong komyunikesen teknoloji.

Em i tok wol nau i wok long yusim ol save na ol dispela kantri we i no go insait long dispela teknoloji em ol bai stap bihain.

Em i tok save em bikpela samting nau na ol wok i kamap long ol bikpela na strongpela kantri i save kam long ol bisnis we ol i yusim save long mekim wok.

Em i tok PNG i nogat sistem we gavman i ken skelim gut ol sevis na helpim long ol pipel.

Em i tok long level bilong ol mani man na ol turangu lain, PNG i gat nem insait long Esia na Pasifik we i no save tilim ol skelim gut ol samting.



• Gavana Jeneral Sir Silas Atopare i kisim UN Human Development 1999 ripot long han bilong Soroi Eroe, bilong Nesenel museum.

Difens Minista bai mekimsave long ol soldia i kalapim mak

DIFENS Minista Alfred Pogo i mekim strongpela tok lukaut long wanwan PNG Difens fos soldia long i no ken mekim toktok nabaut egensim fos bikos ol bai kisim bikpela mekimsave tru.

Mista Pogo i tok olgeta toktok long hevi na wok bilong PNG Difens Fos em seketeri bilong Difens, Difens Fos Komanda na em yet olsem Difens Minista bai mekim long wok na edministresen bilong fos. Sapos wanpela soldia aninit long tripela bikman ya i mekim ol toktok ol haitim ol ripot na givim long nius, bai ol i kisim bikpela mekimsave tru.

Mista Pogo i tok em i no amamas tru long lukim ol tok giaman i bin kamap long niuspepa we i no tru.

Mi bin singautim bos bilong Difens Fos intelijens long painimaut long dispela samting. Tasol ol pepa bilong em i no wankain long ol dispela ripot we i kamap long niuspepa long las wik.

Nius ripot i tok gavman i no bin kisim gutpela tok klia bihain long ol i go het na makim Kenel Carl Malpo olsem ekting Komanda bilong PNG Difens fos long kisim ples bilong olpela Komanda Jerry Singirok.

Dispela ripot tu i tok Kenel Malpo i bin kamapim wanpela grup we i no stret long lo bilong PNG Difens Fos na dispela grup (Spesel Operesen Grup) SOG i stap aninit long bikpela kwesten mak.

Ripot i tok tu olsem Kenel Malpo ino rait man long kamap Komanda bilong PNG Difens Fos bikos em i gat sik long bodi bilong em.

Tasol Difens Minista Alfred Pogo i tok bai i askim pinis bos bilong Difens Intelijens Bureau long sekim dispela ripot na painimaut we dispela ripot ol toktok i kam long en.

Tasol Mista Pogo i tok taim Oposisen i sutim toktok long gavman long stretim ol dispela toktok, em i tok Oposisen i nogat wanpela klia toktok long mekim long PNG Difens Fos tasol wok long sutim tok nating tasol. Ol i no tokaut long wanem tingting we ol i ting gavman i abrus long en, na gavman i mas bihainim narapela rot. Ol i wok long sutim tok nating tasol we i soim tu olsem ol yet (oposisen) tu i paul, Mista Pogo i tok.

Kirapim paspot opis long Vanimo

FELIX RAMRAM i raitim

OL turis lain insait long Sandaun i gat laik long lukim olsem i gat wanpela opis bilong kisim na senisim ol paspot i stap long Vanimo.

Ol ripot i kam long Vanimo i tokaut olsem planti turis lain husat i laik go long Jayapura na ol narapela ples long hapsait i mas westim longpela taim long wetim ol paspot long kam long Waigani. Na taim ol paspot i kamap, taim i lus na ol turis i mas stretim ol visa ken long mekim wok-about bilong ol. Sampela taim ol i mas baim nupela paspot fi ken na pulumapim ol nupela paspot aplikesen we i olsem ol i baim tupela taim fi long kisim wanpela paspot.

Wanpela turis Richard Amuneiel bilong Aitape husat i save wokabout i go kam long narapela sait i tokim

Wantok olsem em i amamas olsem nau pipel i ken senisim paspot bilong ol long Vanimo Kastoma na Imigresen Opis sapos ol pes long paspot i no pulap olgeta. Em i tok bai i gutpela moa na mekim ol samting i isi long gat opis bilong stretim na kisim ol nupela paspot tu long Vanimo yet long gutpela bilong Gavman na ol pablik.

Mista Amunyel i singautim Foren Afeas Minista na Is Sepik Rijinel Memba Sir Michael Somare long lukim olsem i gat wanpela opis bilong wokim ol paspot Gavman i sanapim long Vanimo. Long helpim sotim taim Waigani opis i save kisim long stretim ol nupela paspot na olsem tu long rinuium ol olpela paspot taim i nogat moa pes long yusim. Wankain singaut i go tu long Provinsal Afeas na LLG Minista na memba bilong Nuku Andrew Kumbakor long yusim sans

Gavman mas makim de bilong kokonas na kakau

WENCESLAUS MAGUN i raitim

GAVMAN i mas makim wanpela de insait long yia bilong luksave long kokonas na kakau long Papua Niugini, Eksekutyiv Dairekta bilong Papua Niugini Growers Asosiesen David W Loh i tok.

Mista Loh i mekim dispela toktok bilong strongim tok bilong Spika bilong Nesenel Palamen, Bernard Narokobi long Kokonas de long Murunas, Madang las wik. Mista Narokobi i bin toktok long kamapim wanpela pablik holide long Kokonas De.

Long strongim tok bilong Mista Narokobi, Mista Loh i tok dispela tingting em i gutpela long wanem, em bai mekim

ol lain i save planim kokonas na kakau long luksave long ol gutpela samting ol inap kisim long kokonas na kakau.

Mista Loh i tok, sapos i gat wanpela de long yia we gavman i makim bilong amamasim kokonas na kakau, dispela bai givim sans long ol pipel i bung wantaim na paitim toktok long gutpela na nogut bilong kokonas na kakau.

Em i tok insait long kain ol kibung, ol inap kamap wantaim sampela gutpela tingting bilong kisim bikpela na gutpela samting long kokonas na kakau. Ol dispela gutpela tingting i ken helpim ol lain i save planim kokonas na kakau na tu husat ol lain i gat laik long go insait long kain wok.

Mista Loh i go het na tok, gavman i mas

luksave olsem kokonas na kakau i save bringim bikpela mani tru i kam insait long kantri olgeta yia. Dispela tupela kes krop bai stap oltaim na oltaim helpim kantri na i no olsem nikel, kobalt, kopa, gol, silva, daimon, wel na ol arapela risos.

Em i tokaut olsem ripot i kam long Bank bilong Papua Niugini i soim olsem long wan wan yia, gavman i save kisim K95 milion long kopra tasol. Ripot bilong 1998-99 (Septemba i go long Septemba) i soim olsem gavman i save kisim K103 milion long kakau tasol.

Mista Loh i tok gavman i mas luksave long dispela bikpela mani kokonas na kakau i save bringim i kam insait long kantri na makim wanpela de long wanpela yia olsem de bilong kokonas na kakau.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Company Ltd.

<p>General Manager and Group Editor in Chief: Anna Solomon.</p> <p>Advertising Manager: Mike Kanin.</p> <p>Editor of Wantok: Yakam Kelo.</p>	<p>Papers distributed by air throughout PNG. Available by air mail subscription within Papua New Guinea and overseas</p> <p>Email address: word@global.net.pg</p>
----------------------------------------------------------------------------------------------------------------------------------------------------------	------------------------------------------------------------------------------------------------------------------------------------------------------------------------------

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd. and are set out in full on the reverse side of its official display Advertising Bookings form.

PDM i tekova long Mosbi siti

PETER MAIME i raitim

PIPELS Demokratik Muvmen (PDM) i bin rausim olupela Praim Minista, Bill Skate na gavman bilong em long tupela mun i go pinis.

Nau PDM i go tekova long gavman bilong Nesenel Kapitel Distrik na bosim Pot Mosbi siti.

PDM presiden na Sief Eksekutiv bilong Eda Ranu, Jamie Graham i kamap menesa bilong Nesenel Kapitel Distrik Komisn.

Mista Graham i kamap menesa bihain long Nesenel Eksekutiv Kaunsil i saspensim Gavana Philip Taku wantaim ol eksekutiv bilong em.

Siaman bilong Nesenel Eksekutiv Kaunsil, em Praim Minista yet, Sir Mekere Morauta na em i lida bilong PDM na PDM nau i holim pawa bilong kantri.

Nesenel Gavman i saspensim Nesenel Kapitel Distrik Komisn long ol planti paul pasin long sait bilong ronim wok na lukautim mani.

Saspensin bilong gavman bilong Nesenel Kapitel Distrik i kamap bihain long wok painimaut bilong wanpela komiti.

Komiti ya em Nesenel Gavman yet i bin sanapim foapela wik i go pinis na ol man husat i stap long dispela wok painimaut em George Pera, Rex Paki na Russell Ikosi.

Gavana Jenerel, Sir Silas Atopare i luk-save long saspensin bilong Nesenel Kapitel



• Philip Taku.


Distrik Komisn na i tok orait long Mista Graham long bosim olgeta pawa na wok bilong komisn.

Nesenel Gavman i no toksave wanem taim dispela saspensin bilong Nesenel Kapitel Distrik Komisn bai pinis.

Gavana Taku long Tunde i tok Nesenel Gavman i "pilaim politik" long saspensim gavman bilong em na i no long narapela as.

Olsem na em i kisim Nesenel Gavman i go long kot long stapim dispela saspensin.

Em i tok em i no amamas long Gavman bilong Sir Mekere bikos ol i no askim tingting bilong em.



• Minista Kumbakor.

Mista Taku i tok taim em i kamap Gavana, em i bin stretim ol rot bilong wok na bilong lukautim mani.

Em i tok pastaim Nesenel Kapitel Distrik Komisn i nogat mani tasol taim em i go insait, komisn i gat inap mani long beng.

Em tu i tok, planti hap long Mosbi siti i nau kisim ol sevis olsem rot, helt sevis, edukeken na ol progrem bilong strongim lo na oda.

Minista bilong Provinsal Afeas na Lokel Levul Gavman, Andrew Kumbakor i tok em i kisim ripot long wok painim aut olsem i gat planti paul pasin i stap long Nesenel Kapitel

Distrik Komisn. Mista Kumbakor em wanpela memba bilong PDM.

Em i tok long ripot, planti ol kaunsila na komisina bilong Nesenel Kapitel Distrik Komisn i bin paulim ol mani.

Em i tok tu olsem i nogat rekot bilong ol mani bilong 1993, 1994, 1995, 1996, 1997 na 1998.

Mista Graham i statim pinis wok bilong em long Tunde.

Em i tok em i bosim yet Eda Ranu. Em i go long Nesenel Kapitel Distrik Komisn bikos gavman i singautim em long wok olsem menesa taim gavman i stap long saspensin.

Gavana Taku na ol Komisina nau i nogat moa pawa long ronim wok bilong Nesenel Kapitel Distrik Komisn. Mista Taku i kamap wanpela memba nating bilong Nesenel Palamen.

Oposisen Lida na Memba bilong Nesenel Kapitel Distrik, Bill Skate tu i nogat moa sans long go bek olsem gavana.

Aninit long nupela Ogenik Lo bilong Provinsal na Lokel Levul Gavman, ol rijionel memba i mas kamap gavana.

Mista Skate inap long kamap Gavana bilong Nesenel Kapitel Distrik taim em i lusim wok bilong Praim Minista, tasol em i holim wok olsem Oposisen Lida na lusim long raitan man bilong em, Mista Taku.

Lo i tok sapos ol rijionel memba i kisim wanpela bikpela wok bilong kantri, ol i no inap long kamap gavana long provins bilong ol.

Gavman kisim tingting long strongim politikel pati

GAVMAN bilong Sir Mekere Morauta i gat strongpela tingting long mekim lo bilong strongim wok bilong ol politikel pati insait long kantri.

Long dispela taim, i nogat wanpela lo i stap long lukautim ol pati na askim ol long wanem samting ol inap mekim na ol samting ol i noken mekim.

Bikos long dispela as, planti ol memba bilong palamen i save kalap i go long kain kain pati, na dispela wokabout bilong ol memba i save bagarapim ol gavman na strong bilong pati politiks.

Planti ol memba i save kalap long ol politikel pati bikos ol i hangre long holim pawa na laik mekim mani.

Gavman i laikim dispela nupela lo bilong strongim ol politikel pati i mas redi na go long palamen taim palamen i sindaun long mun Novemba 1999.

Long dispela wik, Konstitusene Developmen Komisn (CDC) i ronim wanpela woksop long Mosbi long kisim tingting bilong ol manmeri long dispela nupela lo gavman i laik sanapim.

Ol kainkain save man na meri bilong gavman na sios i bin bung long dispela taim long autim tingting bilong ol. Tu ol narapela manmeri

long ples tu i bin go long dispela woksop long harim ol toktok na givim tingting bilong ol.

Long liklik taim, dispela wankain woksop bai kamap long Rabaul, Lae na Hagen.

Siaman bilong Konstitusene Developmen Komisn, Bernard Mollok i singaut i go long ol pipel long dispela senta long go na givim tingting bilong ol. Em i tok dispela nupela lo bilong ol politikel pati i mas karim laik na tingting bilong olgeta manmeri long kantri.

Mista Mollok i tok bikpela tingting bilong komisn bilong em, em long kamapim wanpela lo we i ken strongim wok politiks insait long kantri.

Em i tok komisn, bai i no inap kamapim wanpela lo i nogut na daunim konstitusene fridom bilong ol pipel.

Em i tok dispela nupela lo bilong politikel pati tu bai i no inap tok long amas namba bilong pati kantri i mas i gat.

Sampela ol biknem politikel pati long kantri em, Pipels Demokratik Muvmen, Pipels Progres Pati, Pipels Eksen Pati, Melanesian Alaiens. I gat tu sampela ol liklik pati olsem PNG Edvens Pati, Nesenel Alaiens na Yunitid Pati.

Provinsal Gavman bai kamapim moa hevi long Bogenvil

VERONICA HATUTASI i raitim

WANPELA Gavman grup i stap nau long Bogenvil long kisim tingting bilong ol pipel long rausim tambu na kirapim gen Bogenvil Provinsal Gavman (BPG).

Nesenel Gavman i bin saspensim dispela provinsal gavman long 1990 taim ol hevi long ailan i go bikpela.

Long Epril 1995, gavman i bin putim Bogenvil Trensisene Gavman (BTG) long lukautim Bogenvil inap long sindaun long ailan i go gutpela. Ol wok long surukim BTG i go inap long Desemba 31, 1998. Long dispela taim, taim bilong BTG i bin pinis tasol Bogenvil i no bin gat wanpela bodi long kisim ples bilong em (BTG) na spes i stap nating.

Ol strongpela tingting i bin kamap long rausim saspensin na larim BPG i kirap bek na lukautim provins. Tasol olupela gavman bilong Praim Minista Bill Skate i bin tok orait long kamapim Bogenvil Pipels Kongres (BPC) long mun Epril olsem opis bilong makim ol pipel long ol toktok

wantaim Nesenel Gavman.

Ol pipel bilong Bogenvil i bin egensim provins i kam aninit long nupela provinsal gavman rifom na ol bin amamas long BPC i kamap. Ol lukim BPC olsem bodi we i bungim wantaim ol grup we i bin birua long taim bilong hevi long Bogenvil. Em ol BRA na BIG, resisten na komyuniti. Tasol nesenel gavman i no bin sanapim BPC bihainim lo.

Aninit long nupela gavman ridom progrem, Bogenvil Rijinel memba John Momis i ken kamap olsem Gavana.

Nau ol nesenel na provinsal lida long Bogenvil i bruk long dispela samting. Ol lain bilong BPC we Presiden Joseph Kabui i go pas long en, ol BRA, planti ol resistens memba na ol pipel long ol ples i sapatim sait bilong BPC bikos ol i lukim olsem bodi ya i bungim ol wanwan grup we i save birua long ailan long taim bilong hevi.

Narapela grup em long Leitana. Dispela lain i makim sampela sief bilong Buka Distrik na ol pipel na tupela Bogenvil nesenel lida, Rijinel memba John Momis na saut Bogenvil memba

Michael Laimo.

Leitan grup i laikim bai Nesenel Gavman i rausim tambu em bin putim long BPG na larim em i sanap bek gen na lukautim Bogenvil wantaim Mista Momis olsem lida. Ol no luksave long BPC bikos ol i tok ol no bin kirapim em aninit long mama lo.

Wantok i bin kisim sampela toktok long Bogenvil we i sut long rausim saspensin o nogat. Tingting bilong ol pipel em i go olsem.

Wanpela komyuniti lida long Tonu, Siwai sautwes Bogenvil i tok sapos gavman i sanapim bek provinsal gavman na rausim BPC, dispela bai bagarapim ol wok long painim gutpela sindaun long Bogenvil. Em i laikim tu Nesenel Gavman long skelim na glasim na putim BPC aninit long lo bikos dispela bodi tasol i bungim ol grup long Bogenvil husat i bin stap birua long wanpela arapela pastaim. Dispela em long ol Bogenvil Revoluseneri Ami, resistens na komyuniti.

Man ya i laikim tupela memba em long Mista Momis na Laimo long go long Bogenvil na toktok wantaim ol pipel bilong ol.



WANTOK

NIUSPEPA BILONG YUMI OL PAUPA NIUGINI STRET

Lo mas rausim ol doti bilong politiks

KONSTITUSENEL Developmen Komisn i bin holim wanpela woksop long Mosbi long dispela wik. Dispela woksop em bilong kisim tingting long ol pipel long wanpela lo ol i laik kamapim long strongim wok politiks bilong kantri.

Siaman bilong Komisn, Bernard Mollok i bin tok bihain long woksop olsem i amamas long husat i bin kam long dispela tripela de woksop.

Planti pipel i bin autim wari na bel pen bilong ol long pasin politiks bilong dispela kantri.

Konstitusene Developmen Komisn bai holim wan kain woksop long Rabaul, Lae na Hagen.

Bihain long ol woksop, Konstitusene Developmen Komisn bai gat bikpela wok long bungim ol tingting bilong ol pipel na kamapim lo long strongim ol politikel pati na lo bilong nesenele ileksen. Planti pipel i sapotim olsem i mas gat wanpela lo bilong ol politikel pati. Sapos dispela lo i kamap, em i mas noken larim politiks i mekim sistem bilong gavman i sting olsem nau. Dispela lo i noken larim, ol liklik lain tasol long amamasim ol yet wantaim ol mani na risosis bilong kantri.

Planti pipel nau i les long ol politikel apoinmen long ol gavman dipatmen. Dispela kain apoinmen i no gutpela na mas i stap.

Tu i mas gat lo we olgeta man na meri i fri long vot long ileksen. Olgeta pipel i mas gat sans long vot na i no long sampela lain tasol.

Ol pipel bilong PNG i gat bilip long wok bilong Konstitusene Developmen Komisn. Bikos long dispela as, komisn i mas mekim gut wok bilong em. Gavman bilong Sir Mekere tu i mas tingim kantri na i no em (gavman) yet, taim dispela lo i go long palamen.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 60.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

VAT kamapim hevi long ol skol

VERONICA HATUTASI i raitim

GAVMAN i mas givim raitpela mak long ol skol subsidi long daunim ol hevi we Velu Eded Takis (VAT) i kamapim stat long mun Julai taim nupela takis i kam insait long kantri.

Edvaise bilong Edukesen wantaim Wes Nu Briten provinsal edukesen divisen Tony Luongit i wokim dispela toktok bihainim hevi we ol skol long provins i bungim long lukautim ol wok operesen na kaikai bilong ol boding skol insait long provins.

Mista Luongit i tok ol skol i bungim bikpela hevi tru bikos stat long taim VAT i kam insait, ol skol i bungim hevi tupela taim moa winim taim bipo long VAT.

Mista Luongit i tok moabeta gavman i

mekim klia sanap bilong em long VAT na rausim dispela takis long ol skol bikos long hatpela taim we ol (skul) i bungim long baim ol skol ikwipmen na ol kaikai taim ol prais bilong ol samting i sut i go antap tru.

"Ol provins i mas kisim rait skol fi sabdi mak we ol i makim na ol bai daunim ol hevi we VAT i kamapim bikos nau, ol i bungim hevi tupela taim moa.

"Tu i moabeta sapos gavman i mekim klia posisen bilong em long VAT na sapos em bai rausim dispela takis long ol skol.

"Ol skol long provins i wok long painim hat tru long baim ol skol ikwipmen na ol kaikai bikos long VAT takis.

"Na taim gavman i givim sabdi mani mak anit long dispela we skol i makim, hevi i kamap moa yet," Mista Luongit i tok.

Em i tok Nesenele Gavman i bin sot long K288,283 mak taim em-i-givim ol skol fi sabdi peimen long namba wan na tri kwata long dispela yia.

Mak bilong subsidi long namba wan kwata em provinsal edukesen divisen long Klombe i bin redim em long K822,000 tasol Nesenele Gavman i bin peim tasol K695,838. na em bin sot long K126,000. Long namba tri kwata, em sapos long kisim K660,565 gen long Nesenele Gavman tasol em bin sot peim long K162,283.

Dispela sabdi i kamapim ol elemen-tri, komyuniti, praimer na hai skol insait long provins, Mista Luongit i tok.

Em i tok dispela samting i kamapim planti hevi long skol, moa yet long baim kaikai na ol skol ikwipmen.

Manus gavana kamapim senis long ol provinsal eksekutiv komiti

BIHAIN long tupela yia long go hetim ol senis we i kam anit long Ogenik lo long Manus Provinsal Gavman, Gavana Stephern Pokawin i kamapim sampela senis long ol komiti bilong Provinsal Eksekutiv Kaunsil.

Gavana Pokawin i tok em i mekim ol senis long go hetim gut moa yet ol ogenik lo long Manus.

Ol senis we gavana i mekim em ol:
•Katim mak bilong komiti membasip long seven i kam daun long 3. I gat faivpela komiti olgeta. Ol bai gat tripela memba nau taim komiti long Lokol Leve IGavman bai i gat tupela tasol.

Gavana Pokawin i tok wok bilong tupela Palamem memba em ol i rausim sampela hevi long en bikos dispela bai mekim ol long karimaut gut ol wok olsem tasol Ogenik lo long provinsal na distrik level i ken go gut.

Gavana bai no inap long stap insait long wanpela komiti olsem long pastaim tasol em bai lukautim ol wok bilong Provinsal Gavman.

Bihainim Seksen 23 (2) na (b) long Ogenik lo bilong Provinsal Gavman na Lokol Level Gavman, Gavana Pokawin i bin rausim ol pemanem eksekutiv komiti na kamapim ol nupela na ol wok we ol bai mekim.

Orait, Komiti bilong LLG bai gat tupela memba. Nesenele Palamen open memba Charlie Benjamin i siaman na Presiden Roy Joseph em tupela memba long komiti. Tupela bai lukauti Divisen bilong LLG na Join Distrik Plening na Baset Praioriti Komiti.

Ol narapela komiti i lukautim Provinsal Edministresen na Helt, Naturel Risos,



• Ol Manus pipel i amamasim opening long Sevings na Lon Sosaiti long Lorengau, Manus.

Woks na Bisnis, Edukesen na Komyuniti Developmen.

Mista Pokawin i tok visen stetmen we em bin wokim long Oktoba 1997 taim provins i kamap namba wan insait long kantri long go hetim ol nupela provinsal gavman senis i sanap olsem stia long lukautim gavman.

Em i tok wok bilong ol Provinsal Asembli memba husat ol i makim ol olsem ol presiden bilong ol LLG na apointet memba long LLG na konstituensi em long lukautim wok memba i kam pastaim na long ol arapela i kam bihain. Na wankain tu long ol nesenele palamen memba we wok bilong ol long makim provins long

nesenele level i kam pas na wok long provinsal gavman i stap olsem namba tu.

Mista Pokawin i tok Manus Provinsal Edministresen em i samting bilong provins yet we provinsal edministreta i go pas long en.

Na wantaim sapot bilong tupela deputi edministreta na 10-pela asisten edministreta wantaim tu bekap bilong moa long K7 milien baset, edministresen i lukautim provins, ol pipel na provinsal gavman.

Mista Pokawin i singaut long tupela wing na 10-pela divisen long wok gut wantaim na helpim provinsal gavman i sevim ol pipel bilong Manus.

Wes Nu Briten laik strongim turisim long provins

WES NU Briten Kalsa na Turisim Divisen i mekim gutpela wok long kamapim strong ol ples na ol samting long provins we ol turis i ken go lukim.

Moa yet ol ples insait long Talasea Distrik we i gat planti gutpela samting ol ausait lain na tu ol lokol turis inap lukim.

Long las wik Mande wanpela turis sip i bin kamap long Wes Nu Briten na go sua long Talasea wantaim 1,400 turis long en.

Nem bilong dispela turis sip em long Fair Princess. Sip i bin karim planti turis bilong Australia na ol arapela kantri moa. Sip ya i bilong P&O turis sip kampani na dispela wokabaut i bihainim raun we wanpela susa sip bilong em, MV Fair Star i bin wokim long provins long 1994.

Ol ripot i kam long provins i tok ol dingi na kanu i bin kisim ol turis long sip i go sua long Talasea na ol i lukluk raun long ol naispela hap long distrik. Em long ol hotpela wara (hot spring), ol sip we i bin bagarap long Wol Wo 2, ol balus we i bin bagarap long Wol Wo 2 na ol arapela naispela samting moa.

Ol komyuniti long Talasea i bin putim ol tumbuna singsing na danis long welkamim ol na tu long ol turis long lukim. Ol bin salim ol henkraf tu long ol

long sikspela awa. Em bin pas long bris long 6 kilok moning na lusim ples long samting olsem 3 kilok apinun.

Ripot i tok sampela long ol turis i bin go long Klombe taun taim ol arapela i go long lukluk raun long ol naispela ples we i gutpela long ol turis long lukim insait long Talasea.

Wanpela long ol ples em long Bitokara Katolik Misin we ol namba wan Katolik misinari i bin sindaun long en na kirapim na planim Gutnius long provins long en. Ol pater, sister na ol arapela misinari i stap long dispela misin stesen.

Narapela gutpela hap em long olupela kolonial ples balus we i gat ol olupela Wol Wo 2 balus samting long en.

Ripot i tok provins i laik strongim iko-turisim we em i lukim olseme wanpela bikpela bisnis tasol ol man i no bisi tumas long mekim samting na em i slip yet. Provinsal gavman i laik kirapim na strongim turisim indastri long provins, ripot i tok. Olsem na em laik strongim anuel Nakanai kanu resis na Nakanai kalserele festival we i bin stat long mun Septemba las yia.

Ripot i tok ol bai holim dispela tupela resis long independen wiken olsem long Hiri Moale festival insait long Nesenele Kapitel Distrik.



Kot rausim Aitape Daiosis na Rihabilitesen Komiti sas

ADAM ELLIOT i raitim

AITAPE Distrik Kot i rausim ol sas long toktok i kamap olsem, Aitape Daiosis na Rihabilitesen Komiti i bagarapim nem blong foapela memba long Aitape Komyuniti.

Kot i rausim dispela sas, insait tasol long 15 minit bihain tasol long kot i bin stat.

Dispela ol sas i bin kamap bihainim ol wok painimaut ol plis i karimaut we i toktok long stilpasin na toktok i pretim ol.

Aitape Sinia: Megistret Richard Koronai i bin rausim olgeta sas ol foapela i bringim long kot. Long dispela kot, kotrum i bin pulap long ol manmeri.

Siaman blong Rihabilitesen Komiti Tas Maketu i tok, dispela pasin i soim olsem Rihabilitesen Komiti i no sapos long kamap long dispela kot.

"Liklik namba blong ol lain insait long Aitape husat i no stap long

ples, i wok long givim ol komiti hatpela taim. Ol i krosim ol komiti memba na kam insait bikmaus long opis na pretim ol. Ol i wok long mekim dispela klostu 12 mun olgeta," Mista Maketu i tok.

Em i tok: "Ol plis long Aitape i no givim wanpela helpim long dispela komiti. Long dispela as tasol, bihain long wanpela hevi insait long opis, ol man i kam pusim ol wokman na pretim ol wokman. Mi ringim namba tu Plis Komisina long helpim."

Em i tok, ol plis i helpim long salim wanpela mobail skuat i go long Aitape long mekim wok panimaut.

Mista Maketu i tok dispela kot i no bin gutpela samting long kamapim bek program insait long ol ples i kisim bagarap long tsunam.

"Bikpela samting long mi na ol memba blong Rihabilitesen Komiti em long go yet. Mipela i mas putim dispela samting bihain long mipela

na soim wainkain wok, gutpela pasin na tingting, mipela i wok long wokim i kam inap long nau. Mipela i stap long dispela komyuniti na ol tingting na driman blong senisim sindaun blong mipela i no senis," em i tok.

Mista Maketu i tok nogat wanpela blong ol mani ol i salim long wok blong disasta, long stretim sindaun blong ol lain long ol nupela ples, bai ol i yusim long dispela kot.

"Mi laik mekim klia olsem sapos i bin igat sampela peimen long mekim namel long wanem disisin kot i mekim long peim ol lain i bringim komplem, bai Daiosis blong Aitape i peim olgeta balens," em i tok.

Em i tok, "Ol pipel i ken stap isi na lukluk, mipela bai go yet long givim helpim inap long olgeta wok i kamap long gutpela pinis blong em. Dispela em i pinis blong olgeta skul, helt senta na ol haus blong sip we i stap aninit long mipela."

Sissano kisim gutpela wara bilong dring

PAUL GLAUT i raitim

DISPELA ol ples long Sissano, Nimas (Wuipom), Amsor (Rowol), Minar (Olbrum) na Mairdroin (Rainbrum) i wok long kamapim gutpela pasin long kirapim bek ol ples blong ol bihain long wanpela yia tsunami i bagarapim sindaun blong ol.

Ben Godfried, Martin Tepio na Wilson Thomasem ol tripela wokman blong Kominiti Aid Aboard (CAA) i wok long wara saplai projek long Olbrum.

Ol lain blong CAA i wok long putim kapa na tang wara long ol ples long Sissano. Mista Godfried i tok ol i wok klostu long tripela mun nau na wok i kamap gut tasol.

"Mipela i wokim ol het bilong haus na putim kapa. Tingting bilong mipela em long givim wara olsem Kominiti Aid Board bai

saplain ol tang na mipela yet bai lukluk long narapela ol wok blong kamapim wara long ol pipel long ples," Mista Godfried i tok.

Em i tok, taim ren i pundaun, em i go insait long ol 1000 na 2000 lita tang we wanwan famili i gat long em long hap blong ol o hap ol i stap long em.

Mista Godfried i tok, "Mipela i lukluk long namba blong manmeri na famili. Olsem, sapos 20 famili i stap long wanpela hap, mipela i putim bikpela tang na sapos 12 famili, mipela putim liklik tang tasol."

Long Olbrum foapela bikpela tang i sanap pinis na givim wara long sampela famili. Ol tang i stap long Olbrum em ol 2000 lita tang tasol.

Mista Godfried i tok, "Ol pipel long ples i soim gutpela pasin long mipela. Long taim blong wok, ol i save helpim mipela na dispela i mekim wok i isi long mipela."

Yalingi Wara bagarapim Pes skul

INSAIT long 10-pela mun Yalingi Wara long Aitape, i wok long tait strong tru na i bagarapim planti ol ples, rot, bris, gaden, skul na laip bilong ol pipel bilong Aitape.

Dispela tait wara i kisim pinis laip bilong faipwela lapun. Nau long dispela taim planti manmeri i gat bikpela pret tru olsem narapela bikpela birua bai kamap gen.

Het Masta bilong Pes Komyuniti Skul, Abraham Omi, i tok ol pipel i stap long Pes ples i lusim ples bilong ol pinis na i go antap long maunten. Tasol em i wari long skul bikos ol i no inap long brukim daun skul na kisim i go antap long maunten.

Mista Omi i tok ol i bin stat long kisim bikpela ren long Oktoba las yia i kam inap nau.

Dispela i bin kamap bihain long graun i guria na bikpela solwara i karamapim ol ples (tsunami 17 Julai) las yia i kam inap nau. Em i ting dispela em as bilong dispela bikpela tait, tasol em i no save long as tru bilong dispela hevi.

Yalingi Wara i bung wantaim Kamali Wara na tupela arapela wara long daunim ol ples insait long Aitape. Long Isait bilong Pes, sampela wara i wok long ron i go insait long Aitape Wara. Nogat man

i save we ol arapela wara i wok long go. Mista Omi i ting ol arapela wara i ron i go insait long bus.

"Long dispela taim ol sumatin i wok long kam long skul wantaim hangre. Bel bilong ol i nogat kaikai. Mipela askim ol olsem wanem ol i no inap kaikai long moning na bilong wanem ol i no inap bring kaikai i kam bilong kaikai long belo.

Na ol i tokim mipela, ol i nogat inap kaikai long lukautim ol yet long haus," Mista Omi i tok.

Em i tok ol pipel long ples i bungim bikpela hevi tru long dispela tait. Planti gaden i bagarap, ol diwai i gat pikinini bilong kaikai tu i dai bikos wara i karamapim ol, na ol wail abus i ronowe i go antap long maunten bilong painim gutpela drai graun.

"Wara long bus i go antap inap long mak bilong bros bilong wanpela bikpela man o meri. Olsem na sapos ol papamama i no inap go insait long bus, mipela bai stap hangre," Mista Omi i tok.

Em i tok wanpela bikpela birua inap kamap. Ol pipel i pret dispela wara long bus inap ron i kam long ples na kilim mipela olgeta. Dispela em wanem samting mipela i pret long en

Yalingi tait stopim wok bisnis

TAIT bilong wara Yalingi i stopim wok bisnis long Aitape.

Planti ka i no inap long kisim ol mama i go long maket long salim kaikai bilong ol na long wankain taim, i no inap long kisim ol kako bilong stua i go long ol ples ausait long Aitape taun.

Ripot long Aitape i soim olsem planti mun i go pinis, Dipatmen bilong Woks i wok long traunim long stretim rot i go long Pes na ol arapela ples long tait i kam. Tasol olgeta wok ol i mekim i no karim kaikai.

Ripot i tokaut olsem Ekting Edministreta i bin mekim wanpela askim long kisim K15,000 bilong banisim Wara Yalingi na bringim ol wara i kapsait nabaut long bus i go bek long Wara Yalingi.

Ripot i tok: "Ol i bungim K6,900 tasol na i no K15,000 we ol i makim bilong mekim dispela wok. Ol i givim dispela mani long NAWAE long stat mekim wok tasol mi no lukim sapos dispela mani em inap long mekim wok."

District Edukesen opisa bilong Aitape, Robert Miroi i bin go lukluk raun long Pes wantaim sampela mausman bilong Lokol Level Gavman long wik i go pinis.

Insait long dispela lukluk raun em i tok: "Dispela em wanpela bikpela hevi. Sapos dispela hevi i go het, mi bilip sindaun bilong ol pipel, tisa, na sumatin bai bagarap."

Mista Miroi i tok ol i mas gat moa long K15,000 bikos ol bai yusim hap mani long stretim ol samting Wara Yalingi i bagarapim pinis bihain long ol i bringim wara long bus i go bek long Wara Yalingi.

Sandaun provins i kros long pamuk pasin

FELIX RAMRAM i raitim

SANDAUN gavman bai wok strong long stretim hevi bilong ol pamuk pasin na mekim Vanimo taun i kamap wanpela gutpela taun bilong olgeta manmeri i stap long en.

Gavana John Tekwie i bin mekim dispela toktok taim moa long 200 manmeri i bin mekim protes wokabout i go long Sandaun gavman long dispela pasin pamuk we ol i ting i wok long kamap bikpela na kamapim bikpela hevi insait long taun.

Mista Tekwie i tok ol wokman bilong gavman bai mekim wok painimaut i go insait long dispela hevi na traunim long stretim.

Gavana i tok em i amamas ol mama na ol manmeri i no amamas long dispela pasin na ol i autim belhevi na kros bilong ol egensim dispela pasin.

Em i tok planti taim gavman i no inap mekim wok bilong helpim ol pipel inap ol yet i save kamaut na tokaut long hevi na wari bilong ol.

Pasin pamuk ba i stap yet long ples graun we ol manmeri i stap. Ol sios lida olsem ol pasto na pater i save mekim wok bilong ol long daunim ol pasin nogut.

Tasol ol lain i go ausait i save mekim nabaut nabaut na dispela

i kamapim hevi insait long komyuniti. Trupela bilong en, em mipela i mas pait egensim ol hevi olsem olgeta taim, Gavana Tekwie i tok.

Mista Tekwie i tok ol wokman bilong gavman bai ino inap isi long husat manmeri ol i painim olsem ol i as bilong kamapim dispela pasin pamuk insait long Vanimo.

Sapos yu save long husat man o meri i wok long mekim dispela kain pamuk pasin, paitim em na pulim em i go long plis stesin. Husat setelmen i wok long kamapim pasin pamuk bai mipela i pasim dispela setelmen.

Sapos ol lain long narapela provins i wok long mekim dispela kain pasin, bai ol i mas kirap na go bek, Mista Tekwie i tok.

Ol pipel i tokaut tu olsem olgeta taim ol i save lukim ol gavman ka i save go long Wutung long olgeta wiken.

Olsem na ol i laikim gavman i mas sekim dispela samting tu. Ol i gat strongpela bilip olsem ol gavman ka i wok long helpim na sapotim dispela pasin nogut tu i go strong long Vanimo taun.

Gavana Tekwie i tok em ba sekim dispela samting tu bikos em i bin givim wanpela pas long gavman wokman long i no ken yusim na ronim ol gavman ka nating nating i go long boda.

BIG HI-WAY BEER

Paradise

NEW

Ol bisop singaut long gan lo

WENCESLAUS MAGUN i raitim

OL Katolik Bisop bilong Papua Niugini na Solomon Ailan i singaut strong tru i go long ol pipel bilong Papua Niugini long toktok strong long tambuim gan.

Presiden bilong ol bisop bilong PNG na SI Katolik Bisop Konferens, Bisop Stephen Reichert i autim dispela toktok bilong ol bisop pinis long gavman na ol pipel bilong Sauten Hailens Provins.

Bisop Reichert em Bisop bilong Mendi. Long dispela provins, wanpela ripot i tokaut olsem ol pipel bilong Sauten Hailens Provins i yusim ol han bom, klostu pawa gan na pawa gan long wanpela

bikpela pait, we i bin stat taim olpela Gavana bilong provins Dick Mune i bin dai. Dick Mune i bin dai long wanpela birua bilong ka long rot.

"Pasin bilong yusim gan em i no hevi bilong ol pipel long Hailens tasol. Nogat. Ol raskol geng insait long ol taun na siti long olgeta hap bilong kantri bilong yumi i yusim tu. Planti moa wan pisin o haus lain na ol pipel i traime long kisim ol pawa gan na samting bilong pait," wanpela ripot bilong ol bisop i tok.

Dispela ripot i tok: "Nau mipela i harim ol nius ripot i tokaut long namba na wanem kain ol samting bilong pait i lus long haus we ol ami bilong Papua Niugini i save putim. Dispela ripot i tokim mipela wanem samting mipela i pret. Ol samting bilong pait i lus long ol lain bilong yumi i save putim yuni-

fom. Wankain olsem ol samting bilong pait i go kamap long han bilong ol pipel husat i redi long pretim na bagarapim olgeta komyuniti."

"Yumi olsem wanpela kantri i no lukautim ol pablik samting bilong yumi, na olsem, yumi no lukautim ol pipel bilong yumi," ol bisop i tok.

Ol bisop i bilip tu olsem ol samting bilong pait long dispela taim i wok long kam insait long kantri long pasin bilong senisim spak brus wantaim ol samting bilong pait. Ol i tok sapos dispela em i tru, "Yumi i wok long go daun long rot nogut tru."

"Yumi mas askim, olsem wanem dispela hevi i kamap na husat i stap baksait long dispela hevi. Na sapos i gat rot long stapim," ol bisop i tok.

Ol bisop i askim komyuniti long tok nogat o i noken kisim ol samting bilong pait. Ol i askim wanwan memba bilong komyuniti long helpim sosaiti long painim na rausim ol samting bilong pait long han bilong husat ol lain i gat. Ol bisop i askim ol pipel long tokaut strong na givim nem bilong husat ol lain i wok long bringim ol gan na ol samting bilong pait i kam insait long komyuniti.

Ol bisop i tok long Sauten Hailens, ol i pret bai bikpela bagarap i kamap. Olsem na Sios i singaut i go long olgeta lain i stap insait long dispela hevi, wantaim gavman, long wok bung wantaim na mekim sampela samting nau bilong stapim gan long olgeta hap bilong PNG.

Ol bisop i tok: "Yumi mas askim yumi yet, bilong wanem yumi larim

dispela kain hevi long kamap. Sapos dispela hevi i laikim pablik i mas mekim wok painim, orait larim dispela i kamap."


"Yumi mas amamas olsem ol lain yumi makim ol bilong lukautim ol samting bilong pait, i mekim gut wok bilong ol na lukautim gut ol dispela samting."

"Yumi mas glasim kwik wanem samting yumi no mekim. Yumi mas painim rot na mekim pablik ol panisemen long stapim dispela pasin nogut, bilong bagarapim laip na giaman pasin long komyuniti i pinis."

Ol bisop i tok: "Mipela ol bisop i singaut i go long wan wan memba bilong Katolik komyuniti long Papua Niugini long sanap strong na tok nogat long ol samting bilong pait i kam insait long komyuniti."

Tu minit tingting

wantaim



Redio i pretim ol raskol

Ol i stori long wanpela grup raskol i hait insait long wanpela liklik haus boi long ples. I tudak pinis, na ol i laitim wanpela lam wokabaut na i putim long plua. Nau ol i nildaun nabaut na ol i kapsaitim na tilim ol mani ol bin stilim long taun long dispela de. Het bilong ol i go daun tasol long ol mani, na ol i aigris tru.

Nau wantu tasol, wanpela nek i bikmaus tru insait long haus, i olsem singaut bilong wanpela man i gat kros. Hariap tru, ol boi i kalap i go ausait long ol windo na ol i ranawe i go hait long bus. Ol i lusim mani i stap yet long plua. Ol i pret tumas.

Ol i wet, i wet, na nek i krai yet. Nau ol i surik i kam klostu long haus na ol i painimaut olsem: em redio tasol bilong ol i krai. Pastaim, long taim ol i bin stap yet, redio i pilai; tasol long taun i bin gat blakaut na redio stesin i no inap wok.


Olsem na redio i dai. Tasol nau pawa i kam bek, na redio stesin i op gen. Ol i lukim na harim dispela na ol i lap na ol i ran i go bek insait long haus.

Dispela eksampel i soim olsem: yumi save mekim narapela kain pasin sapos yumi ting i gat wanpela man o meri i lukim yumi. I no gat planti stilman long ples we i gat lait. Ol i no laik bai ol manmeri i lukim ol i stil. Planti pasin nogut i save kamap long tudak, bikos yumi ting i no gat ai i lukim yumi.

Tasol yumi no ken lus tingting long dispela samting: God i save lukim olgeta samting - maski bikpela tudak. Na God i save stap long olgeta hap.

Silva Jubili bilong Pater Dambui

FUZO PAUL i raitim



□ Pater Cherubim Dambui.

VIKA Jenerel o namba tu bisop bilong Wewak Daiosis, Pater Cherubim Dambui bai amamasim 25 yia Silva Jubili bilong wok pater bilong em. Dispela selebresen bai stat long Mande 27 Septemba i go pinis long Sarere 2 Oktoba.

Pater Dambui i bin kisim odinesen bilong em long Disemba 1974. Asbisop Leo Arkfeld husat i dai long mun i go pinis, i bin odenim Pater Dambui na i bin mekim em i kamap olsem wanpela bilong ol namba wan Papua Niugini man long kamap pater.

Pater Dambui i bin go insait long politik na i bin kamap olsem namba wan Primia bilong Is Sepik Provins taim Provins Gavman i bin kamap nupela

insait long ol provins. Em i bin stap tu olsem Rekta bilong Holi Spirit Seminari long Bomana.

Wok pater bilong em i bin kisim em i go bek long Wirui Paris long Wewak. Long 1995, Sios i bin makim em i kamap olsem Vika Jenerel bilong Wewak Daiosis.

Selebresen bilong 25 yia Silva Jubili bilong Pater Dambui bai stap wanpela wik olgeta. Insait long dispela wan wik selebresen, bai i gat kainkain program i kamap long abinun stat long 6:30 i go pinis long 9 kilok long nait.

Kodineta bilong Silva Jubili bilong Pater Dambui na tu Jubili 2000, Herman Kabai i tokim Wantok long Wewak olsem, program bai stat long abinun na i go pinis long nait.

Em i tok bai i gat ol kainkain ektiviti na planti paris tru insait long Wewak Daiosis na tu ausait long daiosis bai go bung wantaim long amamasim dispela bikpela de. Sampela ol paris we i stap pinis insait long program em Yarapos, Boram, Moem Bareks, Wewak Hill, na Kaindi. Ol paris ausait long taun olsem Ajirap, Yauroma, Timbunke, Maprik, Biem, Koil, na Voeko Ailan tu i stap insait long bikpela program bilong Misa.

Mista Kabai i tok sampela paris i kisim pinis program pepa tasol sampela i no yet, na bai ol i kisim klostu. Em i putim tu bikpela askim i go aut long olgeta paris insait long Wewak Daiosis na kantri olgeta long beten long dispela selebresen bilong Pater Dambui bai i ken kamap gutpela.

Mista Kabai i tok moa olsem i gat wanpela Fan Resing Komiti i kamap pinis long lukluk long painim mani long sapotim dispela selebresen. Em i askim tu husat i laik helpim i ken givim long Silva Jubili Komiti.

Mista Kabai i askim olgeta paris husat i stap pinis insait long program, bai ol i mas stat long redim ol yet nau long wanem, i nogat bikpela taim tumas i stap long de bilong selebresen.

Em i tok sapos husat manmeri i laik save moa long program bilong Silva Jubili selebresen bilong Pater Dambui, ol i ken ringim opis bilong em long telepon 856 2346 Ekstensen 213.

Bruda Stan amamasim Silva Jubili

LUCAS KAWAGE i raitim

KATOLIK Sios long Simbu Provins i selebretim 25 yia Silva Jubili long Mingende paris long Trinde. Dispela selebresen em

Sande musik bilong ol pikinini

• Ol Sande skol pikinini long Daulo, Isten Hailens provins i paitim tambaring long opim nupela haus lotu bilong ol.

Foto: Sape Metta.

bilong amamasim Bruda Stan Koszuta, wanpela Divine Word Misinari (SVD).

Bruda Koszuta i bin winim 25 yia long Simbu na i bin mekim planti wok na i helpim planti pipel long Denglagu na Mingende paris.

Em i bin bringim Helt na Edukesen, sevis i go insait long Simbu Provins, we ol pipel bilong Simbu nau i kisim planti gutpela sevis long en.

Misa bilong dispela Silva Jubili selebresen i stat long 8 kilok long moning taim. Bihain long dispela i bin gat planti ol singsing tumbuna na ol arapela pilai bilong amamasim Bruda Koszuta na ol lain pipel i kam bung.

Bisop bilong Simbu Daiosis, William Curtz i go pas long Misa


na tu i blesim selebresen bilong dispela de.

Long wankain taim, Memba bilong Kerowagi na Minista bilong Haus, John Kamb i salim bikpela tok amamas i go long Katolik Sios, na Simbu Daiosis long olgeta gutpela sevis ol i bin givim Simbu long helt na eduksen sevis na i wok long givim dispela ol sevis yet.

Moa yet em i givim bikpela tok tenkyu long Katolik Sios long helpim ol pipel bilong em long Kerowagi Iektoret.

Mista Kamb i tok, Don Bosco Institiut bilong Teknoloji, St Mary Teknikel Skul, na Rosary Sekenderi Skul em sampela ol skul we i soim ples klia, kain ol sevis Katolik Sios i givim long ol pipel bilong Simbu.





Hailans Nius

Politiks bagarapim ol sevis i go long Isten Hailans

PETER MAIME i raitim

PLANTI gavman sevis i no go long ol pipel long Sauten Hailans bikos ol lida i politiks tumas. Ol nesanel, provinsal na lokel levul lida i save pilaim planti politiks na dispela i stapim ol gavman sevis i go long ol pipel.

Dispela ol samting em wanpela lida bilong Isten Hailans Provinsal Gavman i mekim long Wantok aste. Em i tok i nogat gutpela lidasip long provins long soim rot long ronim provins. Nau yet Isten Hailans i stap isi tasol, i no olsem bipo we planti samting i save kamap.

Dispela lida i tok, olgeta man i laik kamap bikman tasol na i no bilong helpim ol pipel. Em i tok provinsal na ol lokel levul gavman tu i no stap strong na save senis hariap. Isten Hailans i bin go long bai ileksen na votim Peti Lafanama olsem gavana bilong provins. Taim Mista Lafanama i lusim sia

bilong en long kot, Damson Lafana i kisim ples olsem gavana. Nau em i mov aut na givim opis gen long Mista Lafanama. Sampela ol Lokel Gavman presiden tu i lusim sia bilong ol long vot i nogat bilip. Sampela bilong ol dispela presiden husat i aut long vot i nogat bilip, tu i bin stap olsem memba bilong Provinsal Asembl

na siaman bilong ol dipatmen long provins. Taim kain senis i kamap, planti samting i mas stat gen, na dispela i save givim hevi long plenim na putim aut ol sevis bilong gavman. Dispela lida i tok em i sori long ol pipel bilong provins bikos ol i nogat gutpela lidasip long provins long sevim ol.



• Rodney Uvoro i sanap wantaim ol wok man bilong en na long baksait em nupela komyuniti senta long Gorhanota ples, Isten Hailans.

Sivil Aviesen stretim Kundiawa ples balus

PETER MAIME i raitim

BIKPELA wok bilong stretim Kundiawa ples balus long Simbu i kamap pinis. O wok man bilong Dipatmen bilong Sivil Aviesen i stap nau long Kundiawa na stretim ples balus. Sampela wok ol bai mekim em long levolim ples na bihain putim kolta long ples balus. Tu ol bai putim nupela waia banis, ronim ples balus. Ol i pasim ples balus na Air Niugini i no moa ron i go long Simbu. Mensesa bilong Air Niugini, John Makai i tok bisnis i wankain olsem bipo. Ol i bukim yet tiket bilong ol pasindia. Em i tok em i laik bilong ol pasindia long kisim balus long Hagen o Goroka. Foman bilong wok, John Koya, i tok ol bai kisim 8-pela wik long pinisim dispela wok. Australia gavman i bin givim mani long stretim ples balus.

Tari kisim bikpela bagarap

TAIM narapela hap bilong PNG i kaikai na slip gut, ol pipel long Tari long Sauten Hailans na ol narapela distrik i stap klostu i kisim bikpela bagarap. Ol pipel i nogat marasin long haus sik, ol skul i pas, nogat kaikai long ol stua na ol beng sevis na pos opis i pas pinis. Planti ol bisnis haus long Tari, Komo Magarima, Lake Kopiago na Koroba i pasim dua bilong ol bikos ol i no inap long kisim ol kago. Ol pipel i sindaun na wetim sampela kain helpim, tasol ol lida na

nesanel gavman i no mekim wanpela samting long stretim dispela hevi. Dispela hevi i stap bihain long ol pipel long Nipa i blokim haiwe long ol pipel bilong Hela Huli long yusim. Dispela rot blok i stap moa long 7-pela mun nau. Ol lain long Nipa i blokim haiwe taim olpela Gavana, Dick Mune i bin dai long wanpela ka eksiden long dispela yia. Ol plis i stap pinis long eria tasol ol i no inap long mekim wanpela samting bikos nesanel gavman i no

mekim wanpela toktok yet. I gat bikpela pret i stap. Plis ripot na ol toktok i kam long Katolik Bisop bilong Mendi Daisos, Stephen Reichert i tok, planti strongpela gan i pulap long Sauten Hailans. Ol i singaut i go long nesanel gavman long rausim ol dispela gan long han bilong ol pipel. Nau yet, gavman i no tokaut long wanem plen em i gat long stretim dispela hevi na dispela bai givim bikpela bagarap long ol pipel.

Kagua distrik bai kisim telepon sevis gen

TELEPON sevis bai i go gen long Kagua distrik long Sauten Hailans. Memba bilong Kagau Erave, David Basua i givim pinis K50,000 i go long PNG Telikom long sanapim ol masin bilong telepon. Kagua i bin gat telepon sevis bipo tasol, sampela lain long ples i bin bagarapim long 1997. Ekting Menesing Dairekta bilong Telikom, Lindsay Lailai i askim ol pipel bilong Kagua long

lukautim ol masin bilong telepon taim ol i putim sevis i go bek. Taim Mista Lailai i kisim dispela mani long Mista Basua, em i askim memba long tokim ol lain bilong em long noken bagarapim ol masin Telikom i sanapim long givim ol sevis. Mista Basua i amamas olsem ol telepon sevis bai nau i go bek long ilektoret bilong em. Kagua Erave ilektoret i gat moa long 50,000 pipel.

BOROKO MOTORS


Heading for the future!

Waigani drive & Cameron road Gordons Phone: 325 5255

Namba wan yus kar dila insait long Papua Niugini taim yu laik baim nupela yus kar bilong yu, noken abrusic namba wan yus kar dila bilong yu. Boroko Motors long Pot Mosbi i go pas long salim ol yus kar long 6-pela mun olgeta. 100 lain i baim ol yus kar i no inap mekim asua. Joinim ol arapela na baim gutpela kar.

SEDANS - WAGONS - UTILITIES - DUAL CABS - COMMERCIAL TRUCKS - 4X2 AND 4X4'S

Madang Nius



Divine Word University redi long kalsa so

LAWRENCE MAMADENI i raitim

OL sumatin, tisa, na papamama o wan pisin bilong ol sumatin bilong Divine Word University (DWU) i wok long redim ol samting bilong DWU Kalsa So we bai kamap long Septemba 11.

Ol kalsa grup husat i bung wantaim em. ol lain bilong Sauten Hailens na Enga, Gulf na Saut Kerema, Morobe na Wes Niu Briten. Ol dispela lain i stat pinis long lainim singsing long mun Ogus yet i kam inap nau.

Siaman bilong Kalsa Komiti John Bomai i tok: "Ol sumatin i save kisim skul bilong ol waitman na lus tingting long holim pas pasin tumbuna bilong ol. Kalsa De bai kirapim tingting bilong ol long pasin tumbuna bilong ol."

Mista Bomai i tok sampela ol bikpela samting bai kamap long dispela kalsa so em ol stail danis bilong Manus na Trobrian pipel.

Planti moa provinsel grup bai kamapim ol singsing bilong provins bilong ol. I luk olsem kalsa so bilong dispela yia bai bikpela moa long las yia.

Madang laikim mani bilong rot na bris

JASON TAU i raitim

INFRASTRAKSA developmen o mekim ol gutpela rot, bris, na ples balus long Madang em namaba wan samting gavman i mas mekim, sapos gavman i laikim ol sevis i go long ol pipel long ples, Ekting Edministreta bilong Madang Provins, Galun Kassas i tok.

Tasol em i tok Nesenel Gavman i mas givim mani long mekim dispela tingting i karim kaikai.

Mista Kassas i tok wanpela bikpela astingting bilong rifom sistem, em bilong bringim ol besik helt na edukesen sevis i go long ol ples.

Em i tok ol pipel long ples insait long Madang Provins i no save kisim dairek sevis bikos infrastraksa developmen i no kamap.

Mista Kassas i tok ol i laikim mani bilong Nesenel Gavman long mekim ol rot na bris.

"Sapos yu nogat infrastraksa i kamap, yu no inap bringim sevis i go long ol

pipel," em i tok.

Mista Kassas i tok wan wan provins i gat praioriti bilong ol yet na praioriti bilong Madang Provinsel Gavman em bilong kamapim gutpela infrastraksa.

Em i tok ol arapela provins i laki long wanem ol i gat ol besik infrastraksa sevis i kamap pinis bipo long rifom. Olsem na em i isi long ol i go het wantaim plen bilong ol.

Mista Kassas i tok planti pipel na ol Memba bilong Palamen i bin amamas long rifom tasol mani ol i givim i no inap long i go long ol ples.

Em i tok rifom sistem em i gutpela long kisim sevis i go stret long ples. Em i kirapim planti ol wok long distrik level na skelim daun ol wok long hetkwata.

Tasol em i tok i mas gat mani na inap wok manmeri long mekim rifom sistem i wok. Em i tok, Madang Edministresen i bin baim sampela gutpela pipel long wok long distrik posisen.

"Taim yu gat planti save manmeri husat i gat planti yia bilong wok ekspiriens i wok long distrik, ol bai

mekim gutpela wok wantaim ol risos yu gat na ol bai bringim gutpela sevis i go long ol pipel," em i tok.

Mista Kassas i tok: "Mipela i laik salim moa teknikel opisa olsem ol helt inspekta, ekstensen opisa, sosel woka, ol lain bilong mekim wok painim i go long ples long wanem em ples we ol pipel i stap."

Em i tok, provinsel edministresen i nogat planti toktok long toktok long mani bilong Nesenel Gavman bikos, ol MP long wan wan ilektoret i yusim mani long laik bilong ol yet.

Em i tok provinsel edministresen i mekim wok bihainim tok i go daun long ol long nesenel gavman.

Em i tok sampela Helt Senta olsem Yakum, Sumkar na Bogia bai kamap distrik haus sik.

Mista Kassas em Deputi Edministreta. Em i bin wok olsem Ekting Edministreta long taim Edministreta, Clant Alok i go malolo.

Niutaun na Jomba nogat Wod mani



• Wanpela asples mangi Madang, Hais Wasel, i save helpim ol pipel long ples long lukautim bataflai. Em i save givim skul long husat ol manmeri i gat laik long kamapim na ronim bataflai fam. Long dispela poto, em i bin skulim 33 yangpela manmeri bilong Madang na Simbu Provins long Suyau Risos senta.

EMMA BODEN i raitim

WANPELA Madang Lokol Level Gavman Wod kaunsel i tok hevi bilong wod bilong em long Niutaun na Jomba i nogat mani bilong mekim wok.

Wod 6 Kaunsel bilong Niutaun na Jomba, Katherine Moeder i tok: "I nogat mani bilong mekim ol wok long wod."

Misis Moeder i tok wok bilong em i karamapim ol eria olsem komyuniti developmen, developim wod eria na lukautim o stre-

tim ol samting insait long wod bilong em.

"Mipela i no inap mekim dispela bikos mipela i nogat mani. Na sapos mipela i nogat mani, mipela i no inap mekim wanem samting ol pipel i makim mipela long mekim," Misis Moeder i tok.

Em i tok, em i painim hat tru long karim aut ol wok bilong em bikos mani i no kam daun long nesenel gavman.

"Mipela i gat bikpela wok long lukautim ol komyuniti bilong mipela. I gat planti samting mi laik mekim," em i tok.

Insait long namba tu yia bilong faiv yia tem,

em i tok, opis bilong em i kisim K5,000 tasol. "K5,000 i no inap stap longpela taim. I gat planti samting bilong mekim," em i tok.

Misis Moeder i tok wanpela bikpela tingting em i gat long kamapim em long stretim gutpela sindaun bilong ol pipel na rausim "blek baket" toilet sistem we ol i yusim yet long Niutaun eria.

"Mipela i gat plen, tasol sapos nogat mani, wara wasim nating," Misis Moeder i tok.

Misis Moeder em wanpela meri kaunsel insait long Madang Taun Kaunsel.

Ol 9-pela arapela kaunsel em ol man.

TB i go bikpela long Madang

CHRIS AUA i raitim

NAMBA bilong ol pipel i kisim sik Tubakolosis (TB) i go bikpela long Madang na dispela i kamapim bikpela wari long ol bos bilong helt sevis long Modilon Jenerel Haus Sik.

Dokta Merrilyn Mathias, wanpela rejistrar long Madang i tok, TB i stap yet olsem wanpela bikpela hevi long Madang.

Wanpela ripot bilong Januari 1997 i go inap long Julai 1999 i soim olsem tok bilong Dokta Mathias i tru.

Dispela ripot i soim olsem long 1997, 368 moa pipel i kisim sik TB. Long 1998, ol i painim ken olsem narapela 374 pipel i kisim dispela sik.

Ripot i soim olsem long wan wan mun samting olsem 30 pipel i save go long haus sik bikos ol i gat sik TB. Dispela em i klostu olsem 6-pela TB sik manmeri i save go long haus sik long wanpela de long 1997 i go long 1998.

Ripot i soim tu olsem long dispela yia long Januari i go long Julai narapela 177 pipel i kisim dispela sik.

Dokta Mathias i tok narapela hevi i olsem, ol lain i gat dispela sik na i bin stat long kisim marasin i no pinisim marasin bilong ol.

"Ol lain husat i no save kam kisim marasin em ol lain tes i soim olsem ol i gat sik TB na i stat long kisim marasin. Tasol ol i no pinisim marasin bilong ol bikos ol i pilim orait," Dokta Mathias i tok.

Em i tok namba bilong dispela ol lain long dispela yia em 65 na i no wankain olsem long 1998 we i bin stap long 47.

Em i tok planti bilong ol dispela sik manmeri taim ol i go bek long kisim marasin, i save kisim bikpela sik na planti bilong ol i gat bikpela sua long win bek bilong ol (lung).

Em i go het na i tok, ol sik manmeri i mas pinisim taim bilong ol long kisim marasin na ol i noken stop long kisim marasin bikos ol i ting ol i pilim gut.

"Mipela i laikim ol sik manmeri i bihainim pasin bilong kisim marasin bilong ol," em i tok.

Em i go het na i tok, ol sik manmeri i no pinisim taim bilong kisim marasin bilong ol, inap kamapim ol binatang nogut we i ken pait na daunim strong bilong marasin ol i kisim.

Ripot i soim olsem las yia, haus sik i bin gat wanpela kes bilong TB drag reistens na dispela yia i gat wankain kes tu. Nau yet ol dokta i wok hat tru long givim ol marasin long stapim dispela sik i go bikpela.

Madang taun bai gat plis stesin

RACHAEL KEAEKE na BETSY INUWAI i raitim

JOMBA plis stesin i gat plen bilong wokim narapela plis stesin long Madang taun bilong stapim ol pasin nogut.

Provinsel Plis Komanda Benjamin Simanjon i tok: "Taun maket em wanpela gutpela ples bikos long hap planti pasin nogut i save kamap."

Tasol em i tok ol i no makim wanpela ples yet na tu, ol i no makim de bilong kirapim wok bilong dispela plis stesin.

Mista Simanjon i tok bihain long toktok wantaim ol bik bos bilong plis long plis het kwata long Mosbi, i gat plen bilong kisim ol komyuniti plis i go lukautim dispela nupela plis stesin ol i gat tingting long kirapim.

Long wankain taim, ol i mekim pinis wok bilong stretim Jomba Plis Stesin. Dispela em i namba wan taim ol i mekim dispela wok bihain long ol i bin opim dispela plis stesin

sampela yia i go pinis.


Mista Simanjon i tok dispela em wanpela tingting bilong em bilong kamapim gutpela sevis bilong ol plis manmeri na tu, ol lain plis i save givim sevis long ol.

"Opis i luk olsem ples bilong wok nau wantaim ol sia bilong ol lain i kam long kisim plis sevis long sindaun. Na sapos ol pipel i go ausait bihain long ol i kisim sevis, ol i mas pilim olsem ol plis manmeri i givim gutpela sevis long ol," Mista Simanjon i tok.

Em i tok ol i bin putim K3,000 long stretim



Lae Nius



Liklik boi i dai na ol haus i paia long pait

FRANCO NEBAS i raitim

Wanpela liklik manki i dai na 10-pela haus i paia long wanpela bikpela pait long Mumeng distrik, Morobe provins long las wik.

* Pait i bin bruk namel long Patep na Parakris viles long las wik Fraide.

Ripot i kam long Morobe Rurel Plis Kodineta Inspekta Simon Yipam i tok olsem samting olsem 10-pela man i bin kisim bagarap long dispela pait.

MUMENG RIPOT

Inspekta Yipam i tok pait i bin kamap bihain long ol yangpela boi long ples Parakris i bin paitim wanpela bikman bilong ples Patep bihain long wanpela soka gem long wiken i go pinis.

Bikman bilong Patep i bin askim ol boi long givim hap mani bilong em we ol boi long Parakris i bin kilim pik bilong em na kaikai. Ol manki Parakris i bin kilim dispela pik long namba foa mun, dispela

yia. Tasol boi Parakris i no stretim dispela toktok we ol i belhat na paitim bikman ya.

Traim long stretim dispela hevi namel long wik i no gutpela tumas we long las Fraide bikpela pait i kirap.

Mista Yipam i tok ol pipel long Patep i les pinis long ol rakol pasin i save kamap long Parakris na samting olsem 1000 man i go daun pait wantaim ol long Parakris.

Long dispela pait ol Patep i bin sutim wanpela liklik boi Parakris long sotgan na em i dai taim ol i kukim haus bilong liklik boi ya wantaim famili bilong em. Ol i kukim olsem 10-pela haus na samting olsem 10-pela man i kisim bagarap tu long ol bunara na spia na ol samting nogut bilong pait.

Dispela pait i bin kamap long haiwe rot we lukim ol ka i go long Wau Bulolo na Menyamya na Lae


i bin stop, Mista Yipam i tok.

Ol plis i stap nau long dispela hap traim long stapim ol pait.

Mista Yipam i tok em i no amamas long ol lida, sios lida, kaunsel presiden na kaunsil long hariap na wok wantaim plis long stretim dispela hevi taim em i kamap nupela yet.

Plis i holim 5-pela boi na holim ol i stap long Mumeng haus kalabus long wetim ol toktok na ripot bilong dispela hevi.

Plis i sambai tasol long plis bilong pait i stap.



• Ol wok i kamap pinis long Lae siti rot. Ol wokman i go het long stretim ol sait sait baret bilong rot i go.

K76,000 lus long Siassi pos opis

BIKPELA stil pasin i bin kamap long Pos Opis bilong Lablab stesin long Siassi ailan long Septemba 1, 1999.

Bihain long wok i bin pinis long Trinde las wik, wanpela wokman bilong Pos Opis i bin go bek long opis na kaunim ol mani bilong Pos Opis i stap taim tripela man nogut i bin kam insait wantaim sotgan na ol bus naip na henasapim man ya na kisim K76,000 na ronawe wantaim. Mani olsem K124,000 i bin stap long seif long dispela taim tasol ol man ya i kisim tasol ol pepa mani na tekov.

Morobe Rurel Plis Komanda Inspekta Simon Yipam i tokaut olsem dispela tripela man nogut i ronawe yet tasol ol plisman i kisim 5-pela man nau na i wok long askim ol i stap.

Mista Yipam i tok wok bilong plis long holim ol dispela man nogut i hat na tu ol wok painimaut i go insait long dispela hevi em hat olgeta. Bikos ol ripot bilong bihainim long kamap wantaim sampela kain rot o tingting long holim ol dispela stil man em hat olgeta.

Mista Yipam i tok em i laik salim tok long ol plisman bilong arapela distrik long i go helpim ol plisman long Siassi tasol ol plisman inogat mani tru bilong baim helikopta na kos bilong trenspot long salim ol wokman i go long hap.

Mista Yipam i tok em i no bilip yet long wanem as na dispela wokman i go bek wok long Pos Opis long nait na kaunim mani i stap. Na tu em i no kliia wanem as tru na Pos Opis i holim dispela kain bikpela mani long opis we ol inap long putim long beng.

Mista Yipam i mekim bikpela toktok i go long ol bisnis na kampani o ol lain i save gat bikpela mani long lukaut gut. Gutpela rot em long putim mani bilong yupela long beng hariap bai mani i ken stap gut, em i tok.

Em i tok lukaut tu long ol kampani na bisnis lain i mas was gut tu long ol ka na ol bikpela samting ol i gat i stap. Ol i mas lukautim gut ol dispela kain samting bikos long ol kain stil pasin we inap kamap.

Long wankain taim tu tupela ka bilong Makam Fan ausait long Lae siti em ol raskol i bin stilim. Ol plis i painim wanpela long Kainantu na narapela i no yet.

Saonu tok em i no lusim Edvens PNG Pati

MEMBA bilong Kabwum Ginson Saonu i tokaut olsem em i no kalap joinim narapela pati olsem ol ripot i tokaut long en.

Mista Saonu i tok em i stap memba bilong Edvens PNG Pati (APP) taim, em wantaim sampela strongpela lida i bin pasim tingting long fomim dispela pati long mekim senis long olpela gavman. Em i bin wanpela memba husat tu i bin namba wan man long fomim dispela pati na em i bai sanap yet long APP.

Mista Saonu i tok em i no joinim Yunaitet Pati olsem ol ripot i kamap pinis i tok long en.

Memba bilong Kabwum i tok pati bilong em APP i gat gutpela pati polisi na pletform na ol memba bilong pati i pasim tingting long sanap wantaim antap long dispela

as pati i sanap long en.

Em i tok APP i bin wanpela pati husat i mekim kamap senis long olpela gavman na nau gavman bilong Sir Mekere na Pundari i kamapim gavman.

Olsem na em bai sanap strong yet na givim sapot bilong em long pati lida John Pundari, gavman bilong Sir Mekere na ol sinia ministia bilong kabinet.

Memba bilong Kabwum i tok ol i bin fomim dispela APP pati taim kantri i wok long bungim planti hevi long sait bilong mani na bisnis bilong kantri. Planti samting i bin go krangki insait long kantri olsem na ol i bin strongim tingting long senisim gavman long stretim gut ol dispela hevi kantri i wok long bungim. Na dispela eksen bilong ol i kamap stret na gavman i bin

senis we ol i sanap nau long stretim ol bagarap na hevi we i kamap pinis long kantri na ol pipel i bungim planti hevi long en.

Memba i laik mekim kliia long ol sapota bilong em long Kabwum ilektoret, ol wanlain bilong em long Edvens PNG Pati na gavman tu olsem em i stap yet wantaim Edvens PNG Pati na i no kalap i go joinim Yunaitet Pati olsem ripot i tok.

Mista Saonu i askim ol sapota na pipel bilong em long Kabwum ilektoret long lusim tingting long dispela gijaman toktok na go het long wok bung wantaim em long pait na kisim ol bikpela helpim na sevis we ol pipel i laikim long ilektoret.

Em i tok dispela ripot long em i joinim narapela pati i no tru na ol pipel i mas lusim tingting na sapot



• Ginson Saonu

wantaim em long ol wok em i mas mekim long sevim pipel. Bikos e i sanap yet wantaim John Pundari na ol wanlain bilong em long Edvens PNG Pati.

Tupela mama grup bilong Morobe i bung gen

ARI GUH DANDEE i raitim

Tupela bikpela wimens asosiesen insait long Morobe Provins, Morobe Provinsel Wimens Kaunsel na Morobe Wimens asosiesen i tokaut pinis olsem tupela i laik wok bung wantaim long sevim ol mama insait long Morobe Provins.

Dispela wanbel bilong tupela i bin kamap insait long wanpela enuel jenerel miting bilong Bulolo distrik wimens kaunsel long las wik Fonde Septemba 2, 1999.

Hetmeri bilong Morobe Provinsel Wimens Kaunsel Misis Enike G. Chiru na Hetmeri bilong Morobe Wimens Asosiesen Misis Gata Kanu i bin tokaut olsem nau tupela wantaim i laik lus tingting

long pasin bilong olupela bel bilong bipo na tupela i holim han wantaim olsem tupela i sista tru bilong Morobe na wok bung wantaim long sevim ol mama insait long Morobe.

Tupela hetmeri ya i bin tokim Wantok olsem, pasin bilong lukpes, bel kros na tok baksait long narapela ino kirapim wok bilong ol mama insait long Morobe, we planti i lus lain na ino gat gutpela sindaun. Bikos Morobe Provinsel Wimens Kaunsel i save gat ol mama grup bilong em yet na ol wok ples bilong em yet na Morobe Wimens Asosiesen i gat tu ol wimens grup bilong em yet na tupela i pulim ol mama igo i kam na igat bikpela barek tru long wok bilong ol mama insait long provins.

Tupela Wimens Asosiesen ya i save bringim wankain sevis igo aut long ol mama long ples tasol ol mama i bin kirapim tru tingting bilong ol mama long paitim planti ol bikpela toktok long stretim gut sindaun bilong ol mama long yia 2000 na igo moa yet.

Misis Yandengo Kalo i salensim opis bilong nesanel memba bilong Bulolo na Provinsel Gavana long i mas soim sapot bilong tupela long strongim wok bilong ol mama insait long Morobe Provins, bikos ol mama i ki tru bilong laip bilong ol manmeri na ol pikinini na i mas i gat gutpela luksave long wok progrem bilong ol bai ol i ken kamapim gutpela sindaun insait long famili na komyuniti.

Igat bikpela wok salens tru bilong ol mama insait long Bulolo

distrik na ol mama i nidim sapot bilong ol papa long karim aut wok bilong ol long stretim na kamapim gut sindaun na i mas i gat tupela luksave long wok bilong ol mama.

Misis Kalo Kalo i tok sapos ino gat luksave long wok bilong ol mama, bai igat planti moa hevi yet long sait bilong skul, helt, lo na oda, wok giamsao na planti moa we yu i ken tingim long en. Olsem na nau em i gutpela taim bilong sapotim ol mama long wok bilong ol long kamapim gutpela sindaun long yia 2000 na igo moa.

Opis bilong Distrik Administrata long Bulolo na Opis bilong Gavana i soim pinis sapot bilong ol na tokaut long kamapim wok bung wantaim ol mama bilong Bulolo Distrik.

Bulolo holim namba wan wimens miting

Bulolo Distrik Wimens Kaunsel i bin holim kamap wanpela bikpela kibung bilong ol insait long Bulolo long Ogas 30 igo pinis long Septemba 2, 1999.

Dispela bikpela kibung em bilong Bulolo Distrik Wimens Kaunsel aninit long rifom we i bungim olgeta 5-pela lokol level gavman kaunsel, ol wimens asosiesen long kamap na stap insait long kamapim ol wok plen bilong ol mama insait long Bulolo Distrik.

Hetmeri bilong ol mama insait long Distrik Misis Yandengo Kalo i tok, miting i kamap bai ol mama i ken soim tru bel hevi na wanem ol kain tingting ol igat long en long kamapim wok bilong ol mama insait long Bulolo Distrik.

Em i tok dispela em i namba wan kibung long soim wanwan mama asosiesen insait long ol wanwan lokol level gavman kaunsel long ol wok mak na plen we ol mama imas mekim wok bilong ol i bihainim.

Dispela Misis Kalo i ting, bai planti mama klii na bai ol i mekim gutpela wok bilong sevim gut ol wanwan mama grup insait long wanwan wod eria bilong kamapim gutpela sindaun bilong ol. Bikpela het tok bilong ol mama long dispela kibung i save paul tru long wanem kain asosiesen tru bai ol i stap wantaim bikos tupela asosiesen wantaim i mekim wankain wok na tupela wantaim i mama asosiesen bilong helpim ol.

Hetmeri bilong Morobe Provinsel Wimens Kaunsel i tokaut olsem pasin bilong kisim biknem tasol i kamapim dispela bikpela barek namel long tupela mama asosiesen ya, tasol nupela het, Misis Enike Gartu i tok olsem dispela em i pinis nau na em i lukim olsem Morobe Wimens Asosiesen em i sista bilong em na tupela i mas wok bung wantaim long karim ol hevi bilong ol mama insait long Morobe long stretim na kamapim gutpela sindaun.

Em i tok olsem hetmeri bilong ol mama insait long Morobe, mi mas luksave long olgeta mama bilong mi, na mi mas bungim olgeta insait long wanpela banis, maski bilong wanem kain sios, wanem kain kala, tok ples, long taun o bus tasol wok bilong mi em bilong bungim ol.

Em itok pasin bilong kisim biknem nating daunim o narapela na tok baksait i mas pinis olgeta insait long wok bilong ol mama insait long Provins, Distrik, Lokol level na long wanwan wod na ples bikos tupela het bilong ol mama insait long provins i laik bung na kamap wanpela.

Hetmeri bilong Morobe Wimens Asosiesen Misis Gata Kahu ibin tokim Wantok olsem, sindaun bilong ol mama insait long yia 2000 na i go mas kamap gutpela tru insait long Morobe na dispela em i tingting bilong tupela hetmeri olsem na tupela i laik kamap wanpela bodi wantaim long sevim ol Morobe mama. Em i tok em i gat bikpela amamas tru na i gat rispek long Morobe Provinsel Wimens Kaunsel long luksave long hevi na singautim em long i kam joinim han wantaim em long karim hevi. Bikos dispela bruk lain i bin istap bipo tru na i givim bikpela hevi tru long wok bilong ol mama.

Tasol nau dispela pasin bilong bipo i pinis nau na em i taim bilong wok bung wantaim na i gutpela nius bilong olgeta mama na ol politolik lida na Gavana bilong Morobe tu.

Misis Kahu i tok, em i gat bikpela bilip tru olsem wok bilong ol mama insait long Morobe nau bai i gat kik na paia long en i winim ol yia igo pinis.

Wok bilong stretim ol sosol progrem na ekonomik i bikpela samting tru long wok bilong ol mama na MPCW na MWA bai i sanap wantaim long daunim dispela.

Bus skul long Nawae i lukim nupela senis

FRANCO NEBAS i raitim

EDUKESAN em wanpela ki samting bilong kamapim gutpela senis na developmen long Papua Niugini.

Tasol em i no isi long yu kisim gutpela edukesen sapos i nogat klasrum na gutpela haus bilong tisa long slip na lainim ol pikinini gut long skul.

Long taun em i orait liklik tasol long ol rurel eria we skul i stap insait tru ong ol bik bus we nogat rot na planti maunten i pasim wantaim planti bikpela wara em i bikpela hat wok tru.

Planti tisa long nau no laik long go kisim posting bilong ol long ol bus skul long wanem taim ol igo stap long hap, ol atoriti (edukesen opis) o skul inspekta i save lus tingting long ol.

Long dispela as, planti bilong ol tisa i no laik go stap long ol skul i stap ausait stret long bik bus.

Dispela em stori bilong wanpela skul we i stap insait long wanpela hap bilong Morobe provins.

Bosa Komyuniti Skul em wanpela bilong ol skul we i stap insait tru long bik bus bilong Wain Erap lokol level gavman kaunsel eria long Nawae ilektoret.

Long go long skul em tripela aua we rot i stap long em na bai yu wokabaut go antap long tupela bikpela maunten pastaim yu kamap long dispela skul.

Bosa skul i kisim ol pikinini i ka long trielabikpela ples. Ol dispela ples em Silabo, Sadau na Boing Boki. Ol manmeri i stap long dispela hap i samting olsem moa long 1000 pipel olgeta.

Bosa skl i bin op long 1991 na ol namba wan sumatin i go skul. Long 1996 namba wan greduesen bilong ol i kamap na ol manki i pinis na i go nabaut long hai skul na ol arapela trening moa.

Long 1997 namba tu greduesen i kamap na long 1998 skul i holim namba tri greduesen bilong en. Dispela yia bai lukim sampela sumatin i pinisim gret 6 na sapos ol i laki ol inap go olsem long Bumayong na Bugandi o Makam Veli hai skul long neks yia.

Bosa bin kamap wantaim tupela klasrum we ol papamama i bin pait hat long toktok wantaim ol atoriti bilong edukesen long kamapim skul. Bikos klostu skul em i stap olsem 4 na 5 aua wokabaut brukim maunten na kamap long skul.

Long pait hat bilong ol papamama skul i bin kamap. Tasol dispela hatwok i no pinis, i gat skul tasol husat bai lainim ol pikinini.



• Memba bilong Nawae, Kennedy Wenge i kisim ol Morobe lida i go raun long ilektoret bilong em long las mun. Foto: Franco Nebas.

Ol papamama i wok longgo pait yt long kisim tisa i go nau ol i kisim wanpela. Dispela tisa em i het tisa tu we i stap 6-pela krismas long Bosa.

Nem bilong dispela tisa em Kolip Wamboli, asples man yet husat i wok long kamap wantaim tingting long mekim skul i go bikpela.

Long dispela yia yet, Mista Wamboli i go toktok wantaim ol Erap Wain lokol level gavman long mekim nupela dabol klasrum na haus bilong tisa long slip. Long wanem namba bilong ol pikinini i go antap na nogat inap spes na tu em i bin wanpela tisa tasol long kisim ol sumatin.

Mista Wamboli i no les, em i pait hat wantaim sapot i kam long ol papamama long komyuniti na ol i kisim wanpela tisa meri i kam helpim em we i slekim wok na hevi i go daun liklik.

Tasol hevi bilong klasrum na haus tisa i stap yet. Ol i pait yet igo nau kaikai bilong pait bilong ol i karim kaikai taim Erap Wain Lokol Level Gavman Kaunsel i givim helpim wantaim mani olsem K10,000. Na bod ov menesmen bilong skul igivim narapela K5,000 long wokim nupela dabol klasrum na haus bilong tisa.

Long moning bilong Fraide Septemba 3 1999, Gavana bilong Morobe provis Luther Wenge na bikpela brata bilong em husat tu em nesanel memba bilong

Nawae ilektoret Kennedy Wenge wantaim ol niusman i go long Bosa long opim dispela nupela dabol klasrum na tripela haus slip bilong ol tisa.

Dispela de, Bosa skul wantaim ol papamama bilong ples i no inap lus tingting long wanem em i bin namba wan taim tru wanpela politisen lida i putim lek long dispela ples bilong ol. I nogat wanpela memba i bin go long dispela hap bus ples inap las wik tasol.

Bosa skul i stap namel long tupela bikpela maunten yu taim yu ron antap long balus o helikopta igo bai yu lukim gutpela hap ples we dispela skul i sanap long en.

Kamap bilong Gavana na memba i bin stail stret we ol pipel i putim drama pilai long soim ol long kaisa na pasin tumbuna bilong ol we ol i save stap wantaim na holim i stap tude.

Pilai i lukim ol pikinini istap long haus man na i km ausait i go long ples na arapela drama pilai tu.

Progrem i stat wantaim prea, singsing grup i pulim ol bikman na visita i kam na ol sumatin wantaim tisa bilong ol i pulim flak i go antap.

Gavana Wenge i bin opim dispela dabol klasrum taim em i katim rop long soim olsem dispela klasrum em op nau long ol studen na tisa i ken yusim long lainim ol samting insait. Memba bilong Nawae Kennedy Wenge i

tok dispela em namba wan taim bilong Papua Niugini we em i lukim opening bilong dabol klasrum na tripela haus bilong ol tisa long slip na wok.

Mista Wenge i tok humen developmen em ki o bikpela samting long kantri we i ken helpim long daunim lo na oda hevi we nau i wok long kamapim hevi long kantri.

Em i tok PNG i lusim hausman na em i bagarap. Sapos hausman i gutpela long asples bilong yu, PNG bai i orait.

Long wankain taim tu Morobe Gavana Luther Wenge i tok edukesen em bikpela samting long kamapim gutpela senis na developim PNG.

Em i tok gavman bilong em i luksave long humen risos we edukesen bai i helpim yumi long kisim gutpela save na sindaun bilong ol pikinini bai i gutpela long bihain taim.

Em i tok tu olsem gavman bilong em i makim pinis K120,000 i go long ol wok bilong skul i stap long Nawae ilektoret we Bosa em wanpela bilong ol dispela skul we ol bai kisim helpim long dispela mani.

Gavana Wenge i tok tu olsem bai i gat wanpela hai skul i kamap long Nawae ilektoret, Pindiu, Kabwum na Wantoat long helpim ol pikinini i go long hai skul long bihain taim.

Sandaun Helt Wokas laikim bek pe long taim

OL MEMBA bilong Komyuniti Helt Woka Asosiesen insait long Sandaun i amamas long agrimen em Yuniën bilong ol CHW insait long kantri i bin sainim wantaim Dipatmen bilong Pesenel Menesmen. Tasol dispela i kisim strongpela tok lukaut i kam long wanpela Brens Presiden insait long Sandaun olsem, sapos agrimen ya i no karim kaikai long stat bilong Yia 2000, bai kantri i ken lukim ol CHW woka i wokabout lusim wok bilong ol.

Imonda Brens siaman, Partick Tai, i tok insait long wanpela pas olsem long luksave bihainim dispela agrimen i stap pinis.

Wanwan provinsel dipatmen i mas gat mani redi i stap wantaim ol long bek peim ol CHW woka namel long nau na Jenuari 1, 2000.

Em i tokaut tu olsem, sapos dispela samting i no kamap bai kantri i lukim olgeta CHW woka insait long Papua Niugini i wokabout lusim ples bilong ol long wok stat long Februari 1, 2000.

"Dispela 6,000 CHW husat i rejista pinis na kisim luksave bilong gavman olsem ol pablik sevans. Gavman i mas bek peim mipela pastaim olsem bai i ken gat inap taim long painim moa mani na redi long ol narapela i kam bihain. Mi sori

long tok tu olsem sapos ol samting i no ron strei bihainim MOU i stap pinis na ol CHW memba i lusim ples bilong wok bilong ol, planti pipel bai i painim bikipela taim nogut long sik sua bilong ol", Partick Tai i tokaut.

Insait long Sandaun i gat 90 CHW i rejista pinis wantaim asosiesen, na em i bilip planti i redi long rejista bipo long pinis bilong dispela yia.

Na em i singautim tu Sandaun Edministresen wantaim helpim bilong Provinsel Helt Opis long wok bung na lukim olsem, ol woka bilong provins i kisim bek pe bilong ol bihainim taim.

Lo bilong benk ino helpim ol liklik bisnis

PLANTI liklik manmeri wantaim ol yut grup na wimens grup insait long kantri i gat laik long kirapim ol liklik bisnis tasol Benk lo i save oraitim tasol ol politisen, ovasis lain, ol traipela kampani na ol maniman long kisim dinau mani long kirapim bisnis. Na turangu ol "papamama" tru bilong dispela haus mani, PNGBC. Ol lo i hat na ol i no nap tru long kisim wanpela dinau mani.

Olpele palamen memba, liklik bisnismen bilong ples na komyuniti lida bilong Vanimo Wes Kos Mista Wegra Kenu i mekim strongpela singaut i go long gavman long glasim gen ol lo i karapim ol Benk insait long kantri, na mekim sample senis. Olsem bai planti liklik manmeri i ken gat sans long kisim dinau mani na kirapim o bisnis i nap long level bilong ol insait long ples.

Mista Kenu i tok gavman olgeta taim i askim olgeta pipel long wokbung wantaim Gavman long pulim planti mani i kam insait long kantri. Tasol long narapela sait, Gavman i rausim gen ol toktok bilong em long kilim dai dispela strongpela laik em i putim long pipel. Long ol strongpela benk lo we i pretim na rausim pipel long kisim dinau na mekim bisnis.

Olpele palamen memba ya i tokaut olsem long save bilong mi, ol gavman i go pinis i no bin kamapim gutpela senis long ol lo bilong benk yet. Taim ol i mekim senis, ol i senisim long gutpela bilong ol ovasis lain, ol kampani na ol politisen wantaim ol sinia gavman wokman tasol. Ol i no senisim long traime helpim tru mipela ol liklik manmeri insait long ol ples long PNG.

"Wantaim hatpela taim bilong kantri i sot tru long mani na bikipela ol dinau kantri i gat wantaim Wol Benk, IMF na Esia Developmen Benk, PNG i nogat wanpela o tupela bilien kina i stap long sait we kantri i ken kisim na bekim ol dinau bilong em. Planti long ol dispela mani we Gavman i wok long kisim na mekim wok long em ya i kam long hatwok bilong ol liklik manmeri bilong Papua Niugini husat i save baim takis i go long Gavman.

"Na wantaim hatpela taim Gavman i bungim long nogat mani, Gavman nau i mas luksave tu long pipel husat i save helpim Gavman long bekim o dispela dinau. Na wanpela rot long kisim dispela helpim em long Gavman i mas glasim gen ol lo bilong Benk na mekim isi long pipel i kisim dinau. Long kirapim ol liklik bisnis olsem ol i ken baim moa takis i go long Gavman," Wegra Kenu i tokim Wantok long Vanimo.

Vanimo Komyuniti lida ya i tokaut tu olsem wantaim bikipela save bilong Sir Mekere olsem olpele man husat i mekim wok long Benk na bosman bilong mani insait long Papua Niugini. Pipel insait long kantri i gat bilip long em nau olsem Prais Minista long putim bek PNG long stretpela rot bihain long kantri i bin bungim taim nogut long ol hevi bilong mani. Em i tok, wanpela bikipela samting em inap long mekim long helpim ol gras rut manmeri ol Benk, lo.

Na mekim isi long pipel i ken kisim dinau mani na kirapim ol liklik bisnis insait long ples long bringim na kamapim gut sindaun bilong ol. Long sem taim ol i ken baim takis i go long Gavman husat i ken yusim ol dispela takis mani long bringim planti ol wok developmen i kam insait long kantri na provins, distrik na ol liklik ples.

Stilman stilim haus sik redio

WENCESLAUS MAGUN i raitim

OL stilman i brukim Madang Provinsel Helt Opis na stilim haus sik redio we i save givim sevis long 180 aid pos insait long Madang Provins.

Siaman bilong Melanesian Faundesen, Peter Barter i tok em i gat bikipela bel hevi tru olsem ol raskol i ken go daun tru long stilim redio we i save sevim laip na givim rot bilong ol pipel i stap long ples we i stap longwe tru long ol gutpela rot, na ples balus long salim toksave i go i kam long Madang taun.

Mista Barter i tok dispela stil pasin em wanpela bilong ol arapela stil pasin ol raskol i bin mekim insait long las mun. Long las mun, ol i bin stilim ol komputa na ol arapela samting bilong wok.


Em i tok tu olsem ol bosman bilong helt opis i bin askim long kisim sekyuriti gad, tasol i kam inap tude, askim bilong ol i pundaun long ia pas bilong ol lain i gat pawa.

Long stretim kwik dispela hevi, Mista Barter i givim wanpela redio long Helt Opis bai ol i yusim inap ol i kisim nupela redio bilong ol yet.

Mista Barter i tok, long olgeta de, ol bai rausim dispela redio inap ol i putim gutpela sekyuriti long Helt Opis.

Em i tok ol i askim pinis Madang plis long glasim dispela hevi na stapim bikipela pasin stil i wok long kamap long Madang na tu kisim bek dispela redio bilong haus sik.

Samuel laikim K20,000 long operesen



• Samuel Wamo (rait han) i sanap wantaim wasman bilong em Paul Puri. Ol dokta i bilip olsem i gat wanpela samting i gro long kru bilong em olsem na em i mas go long haus sik kwik taim. Sapos yo laik givim em mani, yu ken putim long akunt bilong em, ANZ Pom akaunt bilong em, 111233 714. Sapos ol lain i laik helivim em long ol narapela samting ol i ken tok tok wantaim Joe Kanekane long Word Publishing opis. Ph: 325-2500.

BILUM

wantaim

Sir Getake Gam

Nau yet Ok Tedi Maining long Westen provins i givim bikipela hevi long ol manmeri insait long Westen provins long sindaun, laip, tingting na tu long bilip bilong ol. Long nem bilong gutpela developmen, mani na kago long kamap rits i giamanim yumi na gavman bilong yumi i sainim tok orait na kirapim dispela bikipela projek wantaim BHP long Ostrelia.

Sampela yia bihain tasol long ol i statim dispela maining, i gat sampela saintis bilong Jemeni long Stanbeg Institut i kam na mekim stadi o wok painimaut na raitim ripot. Na dispela ripot i soim olsem bikipela hevi bai kamap bihain long environmen bilong Westen

provins long wara, bus na ol diwai nabaut. Na tu sindaun na laip bilong ol pipel bai bagarap.

PNG Kaunsil bilong ol Sios i bin luksave pinis long dispela ripot i tok tru olsem na mipela bin singautim gavman bilong dispela taim long kamapim

sampela rot bilong daunim dispela hevi kwiktaim. Mipela sios lida i bin tok strong Inog dispela hevi na singautim miting wantaim gavman bilong Prais Minista Hon Sir Rabbie Namaliu tasol nogat. Kaikai bilong singautim bilong mipela i no bin kamap. Nogat miting namel long mipela sios lida wantaim gavman long dispela taim. Mipela i bin lusim tasol na istap, tasol i kam inap long dispela yia 1999 yumi lukim long televisen olsem OK Tedi Maining i bagarapim tru wara, bus na sindaun bilong ol pipel long dispela hap pinis.

Maski gavman Ok Tedi Maining i luksave pinis long ol dispela

bagarap i wok long kamap tasol ol ino wari tumas long em. Tasol mipela sios lida na sampela NGO lida i bin gat tingting wari long dispela bagarap. Na long 1995 mipela i bin i go long OK Tedi Maining long lukim dispela hevi long ai bilong mipela yet. Ol bikman bilong OK Tedi maining yet i tok orait na mipela i bin i go.

Ol yet i bin lukautim mipela gut. Ol i lukautim mipela long haus, kaikai na trenspot. Ol i soim mipela planti gutpela samting ol i wokim bilong helpim ol asples pipel, tasol ol samting maining i bagarap em i kamap bikipela na i klia olsem ol wokman i traime kainkain rot bilong daunim dispela hevi tasol i no i inap.

Nau yet hevi i go bikipela tru na i winim tru save na teknoloji bilong yumi man. Wanem bagarap OK Tedi i kamapim long Westen provins bai oltaim i stap olsem piksa nogut na mak nogut we yumi no ken mekim gen long arapela hap bilong kantri bilong yumi. Dispela wankain hevi bin

kamap long Wau Bulolo eria long Morobe provins bipo na nau dispela hap i nogat gutpela graun na bus i stap. Ston tasol inapim olgeta hap na ol pipel long dispela hap i nogat graun bilong painim kaikai na nogat bus bilong painim abus na arapela samting. Yumi ken tok gol maining long Wau Bulolo eria i bin bagarapim tru laip bilong ol pipel na bai i stap olsem yet i go inap long taim bilong dispela graun i pinis.

Bilong daunim dispela bikipela bagarap long OK Tedi Maining, Prais Minista Sir Mekere Morauta i tok long Wol Beng i kam na wok painimaut moa na givim ripot we gavman bai bihainim dispela ripot na pasim o mekim las tok. Em i orait, gutpela tingting. Tasol em i leit. Inap bipo Prais Minista Sir Rabbie Namaliu i mekim dispela kain nek bilong sevim laip bilong pipel bilong yumi long Westen provins.

Nau yumi lainim pinis long hevi bilong OK Tedi Maining olsem olgeta risos developmen long kantri

bilong yumi i no inap helpim yumi. Sampela bai bagarapim yumi. Olsem na gavman bilong kantri i mas oltaim tingting wari long pipel bilong em pastaim na larim ol ovasis kampani i kam insiat long kantri bilong yumi. Na tu gavman i no ken givim laisens long planti ovasis kampani long wok bilong eksploresen bilong neturel risosis long kantri bilong yumi. Tingim bihain pikinini bilong yumi. Nogut ol i stap rabis bihain.

Gavman i mas oltaim skelim gut developmen plen bilong husat ovasis kampani i laik kam na kirapim neturel risos projek long kantri bilong yumi bipo long ol i sainim tok orait wantaim ol kampani. Sapos arapela maining kampani nau i stap pinis long PNG i nogat gutpela plen bilong bosim gut ol environmen, moabeta ol kampani i mas stop na na painim rot bilong hevi no ken bagarapim laip bilong pipel na kantri bilong yumi.

Dispela em i wanpela bikipela hevi nau gavman i mas putim olsem wanpela prairiti long wok

Ok Tedi maining i givim hevi

Wokbung wantaim nupela edministresen, Taku i tok

GAVANA bilong Nesenel Kapitel Distrik (NCD) Philip Taku i askim ol sapota na ol manmeri bilong Mosbi siti long stap isi na wok bung wantaim nupela bos bilong NCDC Jamie Graham.

Mista Taku i mekim dispela toktok bihain tasol gavman i saspenim Nesenel Kapitel Distrik Komisen (NCDC) long Tunde dispela wik. Dispela i min olsem Gavana Taku wantaim ol sinia eksekutiv bilong em na ol komisina bilong NCDC i no inap lukautim o mekim ol wok bilong NCD moa inap wanem taim gavman i putim ol i go bek long wok bilong ol. Philip Taku bai stap olsem memba bilong Mosbi Not Is long palamen na i no moa Gavana.

Mista Taku i skelim ol dispela pasin gavman i mekim long saspenim em na ol woklain bilong em olsem pasin bilong painim asua bilong ol man long politiks birua tasol.

Mista Taku wantaim ol lain bilong em i laik kamapim wanpela kot long rausim dispela saspenim bilong ol. Dispela kot i no kamap yet.

NCDC wokas yunior i tokaut tu olsem ol i wanbel long disisen bilong gavman long saspenim NCDC tasol dispela pasin i mas bihainim rot tru long stretim hevi na wok bilong NCDC.

Yunior i tok ol i nogat wan-

NCD RIPOT

pela samting long mekim bikos nesenel gavman i gat pawa na em i gat olgeta pawa long mekim dispela samting i kamap.

Olpela Lod Meya bilong NCDC David Unagi i tokaut tu olsem em i wanbel tru long lukim gavman i saspenim NCDC bikos em i luksave olsem planti paul na stil pasin tru i kamap long edministresen bilong NCDC.

Mista Unagi i tok long taim bilong em, i nogat kain pasin olsem i kamap na wok bilong NCDC i save ron gut tru. Long taim bilong em, ol i bin oraitim ol bikpela projek olsem Botanikel Gaden, Poreporena Friwe na wara saplai sevis long siti long kamap.

Mista Unagi i tok em i save olsem planti projek we i wok long kamap long siti em ol bikman i save kisim helpim long en na yusim nating nem bilong ol liklik manki yut long setelmen. Ol man bilong wokim pepa i kisim bikpela samting na ol liklik manki i kilim skin long mekim wok, em i tok.

Gavman i saspenim NCDC long Tunde dispela wik na dispela saspenim bai i stap inap 12-pela mun samting inap olgeta wok painimaut na rekot bilong NCDC i go stret o kamap kliia bihain.

NEC rausim NCDC long paul pasin

YAKAM KELO i raitim

NESENEL Kapitol Distrik Komisin (NCDC) i stap aninit long saspenim bihain long nesenel gavman i rausim olgeta bosman bilong komisin long Tunde dispela wik.

Minista bilong Provinsal na Lokol Gavman Afeas Andrew Kumbakor i tok gavman i mekim dispela disisen long Mande nait long saspenim: NCDC bikos ol i painimaut olsem i gat planti paul na krangki pasin i hait i stap long wok bilong komisin.

Mista Kumbakor i tok dispela ol paul pasin i sut long wok bilong mani we i no ron stret na sampela bikman i wok long yusim mani nating long nem bilong ol liklik manmeri olsem yut na wimens grup.

Em i tok planti olpela ripot o odita ripot bilong NCDC i bin kamap na i stap tasol gavman ino bin mekim wanpela samting long ol dispela ripot. Na ol i larim ol dispela odita ripot i stap long kabot na das i karamapim olgeta.

Olsem na nau em i taim bilong klinim ol dispela das na lukim sapos i gat asua i stap orait gavman i mas stretim ol dispela asua.

Gavana bilong NCD Philip Taku, edministreta Justin Tkachenko na ol arapela komisina na eksekutiv i no moa stap long opis bilong NCDC inap olgeta wok painimaut i pinis long kliarim nem bilong ol.

Mista Kumbakor i tok NEC insait long disisen bilong em long saspenim NCDC, ol i makim bos bilong Eda Ranu Jamie Graham long kisim ples bilong Gavana Philip Taku long

lukautim NCDC edministresen inap olgeta wok i pinis gut.

Minista Kumbakor i tok Jamie Graham em gutpela wokman tru bikos em i bin mekim gutpela wok tru wantaim Eda Ranu we Eda Ranu i kisim kamapim gutpela sevis tru insait long Mosbi siti.

Jemie Graham em olpela pati presiden bilong Pipels Demokretik Muvmen (PDM) pati tasol nau em i stap olsem namba tu presiden. PDM em bikpela pati husat i go pas nau long gavman bilong Papua Niugini aninit long lidasip bilong Sir Mekefe Morauta.

Minista Kumbakor i no tokaut long

wanem taim bai NCDC i wok gut gen tasol inap wanem taim olgeta wok painimaut na ripot i kamaut kliia pastaim.

Em i tok dispela saspenim bilong NCDC i no inap bagarapim ol projek na wok bilong yut na wimens na komyuniti grup insait long siti. Olgeta wok bai i ron yet tasol senis i kamap tasol em long edministresen na eksekutiv bilong ol long top level.

Olgeta wokman bai i go het long wok bilong ol na olgeta sevis i ron yet wankain tasol olsem bipo. Na dispela saspenim i no ken stapim wanpela samting, Minista i tok.



• Deputi gavana bilong NCD Kabua Kabua wantaim ol kaunsil bilong em long Motu Koitabu bai wok yet taim gavman i saspenim gavana Philip Taku na ol eksekutiv bilong em.

Milen Be gavman i nogat mausmeri yet

GAVANA bilong Milen Be provins Dem Josephine Abaijah i tok em i no bin makim wanpela meri long stap insait long Provinsal Eksekutiv Kaunsil (PEC).

Abaijah i tok em i no inap long makim wanpela mausmeri yet inap em i kliia na bilip tru olsem dispela meri em tru lida na bai wok strong karim hevi na wok bilong ol meri insait long Milen Be provins.

Em i no laikim bai wanpela meri i giaman kisim biknem nating tasol na i go makim pes na nem bilong liklik lain ol meri tasol insait long eksekutiv bilong em.

Gavana Abaijah i mekim dispela toktok long bekim wanpela ripot i kamap long niuspepa olsem em i

bin makim wanpela meri long laik bilong em yet long stap insait long eksekutiv. Olsem na ol i laikim bai Gavana i mas tokaut kliia long tru em i mekim dispela samting o nogat. Na Gavana i mas tokaut long wanem as na em i mekim dispela pasin.

Tasol Gavana Abaijah i tok dispela toktok i no tru na dispela niuspepa i raitim dispela stori ino raitim tru tok tru.

Em i tok aninit long Ogenik Lo bilong provinsal na lokol level gavman, i gat seksen i stap bilong makim wanpela meri long kisim pes bilong ol meri insait long provinsal kabinet.

Em i tok aninit long lo tu, em yet

i no inap long makim wanpela man inap Provinsal Eksekutiv Kaunsil makim dispela man o meri i kamap memba bilong asembli pastaim.

Olsem na tok tru olsem PEC ino makim wanpela meri yet long kamap memba bilong provinsal asembli. Olsem na taim dispela i no kamap yet, mi no inap makim wanpela meri long laik bilong mi, Gavana Abaijah i tok.

Gavana i tok Provinsal Kaunsil ov Wimens (PCW) i no mekim em i bilip yet long pusim wanpela mausmeri bilong ol i go kamap long provinsal asembli.

Em i tok tu olsem 60,000 meri insait long Milen Be provins i mas askim Provinsal Kaunsil ov Wimen

long wanem as na ol i no givim yet faiminsel ripot bilong ol wantaim ripot bilong ol wok bilong ol i go long opis bilong Gavana long kisim i go soim long provinsal asembli.

Gavana Josephine Abaijah i tok bai ol i painim wanpela rait meri long makim em i go long opis bilong provinsal gavman. Tasol ol i no inap makim wanpela meri husat bai i go sindaun nating na kisim pe na i no mekim wok bilong ol meri.

Mipela i laik wanpela meri husat bai wok bung wataim Gavana, Deputi Gavana, Kabinet Seketeri, Kuskus bilong Provinsal Asembli, Edministreta na ol edministresen bilong Milen Be provinsal gavman.

Dispela meri i mas gat strong na

save bilong tok pait long ol program na projek bilong stretim ol hevi na wok bilong ol meri. Na em i mas save long mekim kamap ol polisi we bai i ken kamapim projek na wok bilong ol meri long Milen Be provins, Gavana Abaijah i tok.

Em i tok ol meri long Milen Be provins i laikim helpim moa long ol jok pait nambaut we i wok long kamap long niuspepa namel long Provinsal Kaunsil ov Wimens na em yet.

Dua long opis bilong mi i op i stap na em i wok bilong PCW long kam toktok wantaim mi sapos ol i makim tru interes na hevi bilong ol meri long Milen Be provins, em i tok.



BOROKO Foodworld

BUTCHER SHOP SPESOLS

BBQ Steak	K7.50 Kg	Zenag Soup Pieces	K1.98 Kg
Hamburger Mince	K5.30 Kg	Beef Sausages	K3.95 Kg
Pork Sausages	K3.95 Kg	Brisket	K4.95 Kg
Diced Beef	K7.50 Kg	4x4 Beef Cooked	K7.50 Kg

Planti moa kaikai prais i go daun long en!

Ph: 325 7566, 325 0863 Fax: 325 7096

LOGGERS DON'T WHINGE PAY THE LOG

Alcohol addictive drug = hospital costs up = crime = Justice/welfare costs up
Tobacco addictive drug = hospital costs up = welfare costs up
Gambling addictive = poverty = crime = Justice/welfare costs up
Petrol fossil fuel = climate change = El Nino = drought = El Nina = flooding =
 famine = state of emergency = economic crises

Exporting Logging = loss of revenue = cheating on infrastructure =
 manipulation = de-stabilization = withdrawal of support by
 multilateral agencies = kina devaluation = financial crisis =
 political crises = increased poverty = permanent damage to
 biodiversity = betrayal of future generations

- Discrepancies between f.o.b and c.i.f log prices, PNG-Japan, imply **transfer pricing**. Losses are close to US\$15 per cubic metre of every log exported

About K40 million unaccounted for in 1999.

LOGGERS PLEASE EXPLAIN!!!

- The logging industry is inefficient. On average another US\$15 per cubic metre of every log exported is lost to Papua New Guinea because of gross inefficiency.

Another K40 million lost to loggers inefficiency.

STAND FIRM ON THE LOG TAX

Taxes are the price of good government; we all have to pay them.

No subsidies to manipulative and inefficient industries.

Sponsored by:-

CONSERVATION MELANESIA, ENVIRONMENTAL LAW CENTER LTD, GREENPEACE, MELANESIAN ENVIRONMENT FOUNDATION, NANGO-PNG, NGO ENVIRONMENTAL WATCH GROUP, PACIFIC HERITAGE FOUNDATION, PARTNERS WITH MELANESIA, PNG TRUST, WWF-SPP.

Rot bilong kisim tambu sut bilong ol bebi

BCG sut: Ol bebi i mas kisim dispela sut taim mama i karim ol, taim pikinini i stat skul long gret 1 na taim pikinini i kamap long gret 6.

HEPATITIS B sut: Ol bebi i mas kisim dispela sut taim mama i karim ol, taim ol igat wampela mun ol i mas kisim namba wan TA/OPV na givim namba tu dos bihain long tupela mun i go pinis (givim namba tu na namba tri TA/OPV).

Hepatitis B marasin i gutpela long givim stat long taim mama i karim bebi. Husat ol pikinini i no kisim tambu sut na krismas bilong ol i 5-pela yia i mas kisim tripela dos bilong Hepatitis B.

TRIPLE ANTIGEN (TA/DPT) sut: Givim long bebi husat i wampela mun tasol. Givim long bebi bihain long wampela mun ol i kisim wampela dos. Givim long bebi wampela mun bihain long ol i kisim namba tu dos.

ORAL POLIO VACCINE (OPV/SABIN): Givim long bebi taim mama i karim em. Long taim bebi i wampela mun pinis. Givim wampela bihain long bebi i kisim namba tu dos na givim wampela mun bihain long bebi i kisim namba tri dos.

PIGBEL sut: Givim dispela sut long bebi taim em i wampela mun pinis. Givim wampela mun biain

long bebi i kisim namba wan dos. Givim wampela mun bihain long bebi i kisim namba tu dos. Givim taim pikinini i stat skul long gret 1 long komyniti skul na givim taim pikinini i stap long gret 6.

MEASLES VACCINE sut: Givim taim bebi i gat 6-pela mun pinis na givim taim bebi i gat 9-pela mun.

Taim sik misels i kamap givim bebi sut stat long em i tripela mun pinis. Noken raitim dispela i go long bebi buk.

TETANUS TOXOID sut: Givim long pikinini taim em i stat skul long gret 1. Givim long pikinini taim em i stap long gret 6 na givim long

mama taim em i kisim bel. Mama i mas kisim 5-pela taim tasol.

• Dispela imunaisesen rot i soim wanem taim ol pikinini i mas kisim tambu sut:

Taim mama i karim bebi em i mas kisim sut long stapim sik TB. Taim pikinini i gat 6-pela wik em i mas kisim tambu sut long stapim sik dipteria, kus, tetanus na polio. Taim pikinini i gat 10-pela wik em i mas kisim tambu sut long stapim sik Dipteria, kus, tenanas na polio. Taim pikinini i gat 14 wik em i mas kisim tambu sut long stapim dipateria, kus, tetanus na polio na taim pikinini i gat 9-pela mun em i mas

kisim tambu sut long stapim sik Misels.

• Yu mas kisim tambu sut long banisim yu et l long ol sik taim yu kism bel. Olgeta meri husat krismas bilong ol i namel long 15 na 44 yia i mas kisim olgeta tambu sut.

- Kisim namba wan dos taim ol i tokim yu olsem yu i kisim bel pinis, - Kisim namba tu dos 4-pela wik bihain yu kisim namba wan dos,

- Kisim namba tri dos bihain long 6 na 12-pela wik yu kisim namba tu dos.

Imunaisesen em bikpela samting tru. Bihainim gut rot bilong kisim imunaisesen.

Sefti bilong yu long motobaik

• Olgeta draiva o pasindia husat i ron long motobaik i mas werim hat (helmet) bilong motobaik taim ol i ron long rot.

• Long karim pasindia em bikpela hevi. Tokim ol gut long ol rot na wei bilong ron long motobaik na wanem samting ol i mas werim long banisim ol yet long birua.

• Hat bilong motobaik yu werim i mas kiai glas long fan na ino ken gat mak long pes bikos taim lait i kisim, dispela i ken bagarapim ai bilong yu long lukim gut rot.

• Yu mas werim waitpela kolos o kolos we i ken soim klia long lait. Yusim het lait long de taim tu. Taim yu ron long rot, makim wampela lein o rot yu mas ron long en we ol arapela ka i ken lukim yu klia. Noken ron hariap bihainim ol bikpela ka na bas long rot.

• Apim het na lukluk igo stret long rot na lukluk gut long wanem hap yu go long en taim yu laik tanim long kona.

• Taim yu kamap long kona, yu mas lukaut gut. Noken ting narapela ka i lukim yu na bai givim spes long yu.

• Draiv i go taim rot i klia na bai i nogat birua. Noken ron klostu klostu tumas wantaim ol arapela ka taim yu laik abrusim ol. Taim yu ronim motobaik long rot o lein bilong ol bikpela ka, dispela i ken kamapim birua.

• Ron longwe liklik long ol arapela ka long fran bilong yu bai yu ken i gat inap taim long lukim birua na abrusim.

Ol pasin bilong painim gutpela sindaun

Bihainim gut ol lo bilong rot.

Sapos yu wampela draiva o yu man nating wokabaut tasol long rot, yu mas bihainim gut ol lo bilong rot. Ol bikpela birua long rot i save kamap taim draiva i no draivim gut ka, na ka yet i gat ol hevi long ol hap bilong en. Yu bai bungim birua long rot tu, taim ol liklik pikinini i no lukim ka i ron i kam na ol i katim rot. Yu mas lukluk gut long rot na draiv o taim yu wokabaut long rot.

Sapos yu draiva bilong ka, yu mas sekim gut ka bilong yu olgeta taim. Nogut wampela samting long ka i no stap stret na i go bagarap pinis. Yu mas lukluk gut long ol notis na sain i stap long rot.

Ol liklik pikinini tu i save wokabaut nabaut i stap long rot, em yu mas lukaut gut. Yu mas noken spitim ka tumas. Draivim ka long mak bilong gutpelea spit tasol. I no gutpela long yu dringim bia na

draivim ka.

Sapos yu wokabaut tasol long rot, yu mas bihainim gut ol mak i stap long rot taim yu laik katim o brukim rot.

Wokabaut arere long rot tasol. Taim yu kam aut long PMV, yu mas lukuk gutlong han kais, na han sut nogut wampela ka i ron i kam na yu katim rot i stap. Noken kalap ausait long ka taim em i ron yet. Larim ka i go stap gut na yu ken go ausait.

Lukaut gut long rot taim yu draivim ka. Noken go slip taim ka i ron i stap.

Skelim gut tingting bilong yu wantaim ol lain bilong yu.

Planti senis bai kamap long yu taim yu wok long kamap bikpela. Bikpela senis tru bai kamap long tingting bilong yu.

Olgeta taim tingting bilong yu bai ino inap stap wankain. Yu bai amamas sampela taim na sampela

taim bai yu i no inap amamas long ol samting. Yu bai kism kain kain tingting olgeta de. Ol dispela kain tingting i save kamap.

Sapos wampela tingting i kamap long yu, i moa gutpela sapos yu askim papa na mama na tu ol brata na susa bilong yu long soim ol gutpela rot bilong skelim gut tingting bilong yu.

Ol famili bilong yu.

Toktok wantaim papamama na ol bikpela brata na susa bilong yu long soim yu sampela gutpela rot bai i ken helpim yu. Noken mekim olgeta samting long yu yet.

Ol pren bilong yu:

Ol pren bilong yu bai helpim yu tu. Toktok gut wantaim ol long ol samting i mekim yu wari tumas long en.

Noken hariap tru long mekim sampela samting we em bai inap long givim asua na trabel long yu bihain.

Skelim gut ol tingting yu i gat long en wantaim ol lain bilong yu.

Kisim ol kain kain kaikai long olgeta de.

Traim long kisim ol gutpela kaikai long helpim bodi bilong yu. Bodi bilong yu i mas kisim planti kaikai long strongim bodi taim yu pilai na mekim ekseksais.

Ol pikinini i mas kisim planti kain kain kaikai long groa na kamap gut. Yu mas kisim inap long olgeta kain kain long helpim bodi i groa gut. Kisim ol kaikai olsem kiau, susu, bin, pis, mit, na tu ol kaikai bilong daunim sik i kamap long bodi olsem popo, painapol, kumu na prut, na ol kaikai bilong givim strong olsem kaukau, taro, tapiok, rais, bret na suga. Traim long yusim ol liklik sol na suga, ol fat na gris long kaikai.

Traim long kisim liklik long ol kaikai i gat planit gris long en. Kaikai gut.

Sampela pasin bilong kamapim gutpela bodi na sindaun

Yu mas mekim sampela ekseksais

God i wokim yu long yu wokabaut. Yu mas wokabaut bilong ekseksaisim bodi na tingting bilong yu.

Yu mas ekseksaisim bodi bilong yu gut. Taim yu mekim olsem, dispela bai helpim bodi wantaim tingting long malolo gut. Yu i no ken kisim wampela skul long wokabaut.

Sapos yu wok long opis na draivim ka, yu mas ekseksais na wokabaut. Ol yangpela na bikpela man na meri mas ekseksais gut. Taim yu stap liklik pikinini yet na yu statim mekim ol ekseksais, dispela bai helpim yu long stap gut na longpela taim.

• Traim wokabaut inap long 30 minit samting long olgeta de. Wokabaut long moning taim na

taim san i go daun. Wokabaut arere long gaden. Wokabaut i go long stua tu.

• Sapos yu save wok, wokabaut i go long wok. Taim yu laik go long maket na go lotu, wokabaut i go.

Noken go long ka. Wokabaut isi i go na bihain ron i go.

• Traim mekim ol ekseksais bilong pulim win. Dispela bai inap helpim yu long mekim yu kamap fit olgeta.

Yusim ol ples bilong pilai stap klostu. Traim long wokabaut i go long wok

Bihainim gut sampela pasin bilong kisim malolo.



• **Mekim ol Singsing na danis long mekim bodi i stap strong na helti. Dispela i olsem ekseksais yu mas mekim o nogat, pilai spot bikos bodi i mas stap fit na strong.**

Skelim gut wanem samting yu mekim bai amamasim yu. Yu yet skelim na bihainim wanem pasin i moa gutpela long yu.

Yu mas traime long helpim yu yet. Traim long wok isi isi. Noken wok hat stret long wanem dispela bai ino inap helpim yu long wampela samting. Yu mas i gat wampela progrem bilong kisim malolo.

• Sapos yu wok, yu mas kisim holide na malolo. Go wanaim famili bilong yu long holide.

Toktok wantaim ol pikinini bilong yu.

• Joinim wampela klap olsem wampela baibel stadi grup sapos yu save lotu. Sapos yu pilai, joinim wampela spots klab. Yu mas i gat taim bilong lotu long God.

• Sapos yu gat sampela hevi, lusim i stap na mekim sampela

wok. Traim long mekim ol samting isi isi. Noken mekim olgeta samting long wampela de tasol.

• Waswas gut wantaim hat wara taim yu ekseksais pinis. Yu mas slip gut. Skelim gut wanem kain ol ekseksais i gutpela long yu na yu mekim wampela.

Yu mas i gat sampela taim long kisim malolo.

Noken wari tumas long sampela samting.

Traim long mekim sampela samting bilong helpim yu. Stres i save kamap olgeta taim na em bai inap long stopim laip bilong yu.

Mekim sampela tok pilai na pani. Yu bai i gat planti wok moa na planti wok i min olsem yu bai i gat moa stres.

Noken wari tumas. Taim yu lap na yu gat ol gutpela tingting, dis-

pela bai inap helpim bodi banisim yu long ol kain kain sik we i save kamap. Bodi bilong yu bai stap gut na yu bai i no inap kisim sik olsem hai blut presa na hat atek.

Tingting long ol gutpela samting. Sapos yu i gat sampela hevi, lus tingting long ol pastaim.

Bai yu helpim yu yet olsem wanem taim yu i gat stres?

• Blut presa bilong yu i mas noken go antap. Blut presa bai i go antap taim yu wari tumas, bel hat klostu, na pret olgeta taim. Ol kain kain wari i save mekim lewa i kisim hai blut presa.

• Toktok gut wantaim ol pren bilong yu. Toktok wantaim wampela gutpela pren husat i ken helpim na sapotim yu. Noken lus tingting long prea long God Papa long helpim yu long ol samting.

FRI BAIBEL KOS LONG PAS

I kam long wampela pren long America sapos yu laikim fri kos salim nem na adres igo long:

**WOL BAIBEL SKUL
WBS - PNG 12, P.O. Box 9346,
Austin, TX 78766 USA.**

WANTOK spot wiken

Cambridge Kap i stat nau

BIKPELA resis bilong Cambridge Kap bai statim namba wan raun bilong em long dispela Sande.

Samting olsem 19 ragbi lig senta insait long kantri bai resis long dispela kompetisen we i save pulim moa sapota long en.

Long statim namba wan raun, Tari bai salensim lalibu long Mendi, na Banz bai skelim strong bilong ol Mendi long Banz, Minj bai bungim Kundiawa long Minj oval, Wewak bai salensim Vanimo (lukim ripot pes 17) na Pot Mosbi bai bungim Kerema.

Long namba tu raun, wina bilong Tari-lalibu bai bungim Mt Hagen long Hagen, Banz-Mendi bai salensim Goroka, Minj-Kundiawa bai skelim strong bilong ol boi Wabag,

wina bilong Wewak-Vanimo bai salensim Madang na win bilong Pot Mosbi-Kerema bai traim strong bilong ol boi on-sena, Popondetta, na Kiunga bai bungim Tabubil long Kiunga.

Lahi i tokaut long maina primia

LAHI SOKA RIPOT

SHELL Yunitek em nupela maina primia long Lahi soka asosisen primia divisen.

Yunitek i winim taitel bihain long em i go pas long poin lata wantaim 22 poin.

Yunitek winim nesesel klab sempion Guria long gol average bihain long tupela i stap 22 poin, Cellnet Sobou 21, Rapatona 20 na Telikom 15.

Telikom i bin laki long stap insait long fainel 5 bihain long ol opisel i rausim poin long Rapatona husat i larim wanpela pilaia i no rejista i bin pilai.

Long primia 2 divisen, Yunitek 20, Lae Biscuit 19, Bugandi 19, Sobou 17 na Difens 10.

Murat kisim maina primia long divisen wan wantaim 28 poin, K.A. Midnorth 28, Malabu 26, Eastern Star 22 na Elcom 21.

Nupela tim Arnotts i kamap maina primia long divisen tu wantaim 35 poin, TTC Bullets 22, 8 Mile Demdem 21, Pobuto 14 na Bunowa Souls 11.

Elcom winim bek gen maina primia long namba tu taim long divisen i bilong ol meri wantaim 28, Guria 22, Waliya 21, Difens 19 na Yunitek 18.

Wimen tu, Bugandi 21, Murat 20, Dal Labu 19, TTC Bullet 16 na SP Sunstrides 14.

Eastern Star kisim long anda 19 (wan) bihain long go pas wantaim 24, Elcom 22, Bugandi 22, Difens 19 na Sobou 18.

Long anda 19 (tu) Tisol 30, Busu 28, TTC Bullets 25, Huonville 21 na Bunowa Souls 11. Dispela wiken bai lukim fes kwata fainel salens bilong Lahi.

Lakers winim junia taitel

KOIARI LIG RIPOT

WANPELA laki fil gol long ekstra taim i wokim na Crystal Lakers junior graid winim Sogeri Choice 1-0 long junia gret kompetisen.

Dispela win i mekim na Lakers bai salensim IBS Pukpuk long grenfainel long dispela wik Sande.


Fulbek bilong Lakers Denra Wahia i kikim dispela fil gol long helpim tim i winim spes long pilai long gren fainel.

Tupela tim bin pilai long na nogat wanpela skoa i bin kamap long fultaim. Olsem na ol i pilai ekstra taim we Lakers i win long fil gol.

Sogeri Choice inap winim dispela gem tasol wanpela penalti gol tasol Lazarus Sire bin bagarapim win bilong ol.

Ol i bin strongim difens na i no opim dua long ol go insait long putim trai.

Kosa bilong Lakers lamnia Maima tok amamas long gutpela win bilong ol na em i tok, em i gut yumi win na nau yumi stap long gren fainel.



• Gem namel long Babaka na Bavaroko anda 19 soka insait long Pot Mosbi soka resis. Tupela tim i dro 0-0. Foto: Joe Ivaharia.

Telikom gat las sans

LAHI SOKA RIPOT

FRANCO NEBAS i raitim

WANPELA nambawan klab bipo long tupela soka asosisen long Lae, Telikom bai traim las sans gen long mekim i go long gren fainel bilong Lahi Soka Asosisen.

Telikom husat i bin laki bihain long ol eksekutiv i givim tri poin i go long ol taim ol i panimaut long wanpela gem Rapatona we ol pilaia i no rejista na afiliat.

Long Sande, ol boi i save stretim telepon bai traim putim olgeta strong bilong ol long kwata fainel egens Rapatona long stap yet long resis bilong namba wan taitel.

Telikom tim i no olsem bipo we i gat ol gutpela pilaia olsem Nicholas Puy,

Yanding, Richard Kaisam, Ruben Yanga i lusim klab igo joinim arapela klab.

Taim ol dispela pilai i go, Telikom klostu pundaun tasol olpela PNG swipa Gidix Nasa i stap holim strong klab.

Nasa i kisim helpim long arapela pilaia olsem John Yangum, John Koris, Abia Abia, Tenge William, Terence Awini, Amos Puy na Oscar Aba.

Ol boi ya bai pilai wankain stail. Kepten bilong ol Abia Abia i tok trening i no gutpela bikos ren i bagarapim graun na ol boi i no save kamap ya. Rapatona husat i gat planti pilaia bilong Solomon Ailan i stap long tim bai givim hat taim long Telikom. Ol pilaia olsem Keswi Posing husat bai go pas long beklain, Jerry na Franko long midfil.

Tupela bratz ya Jerry na Franko bilong Solomon Ailan i save pinis ol kain stail pilai na Telikom i mas was gut. Long fowat bilong Rapatona, Abel bai go pas

long mekim nais long umben bilong Telikom.

Long sait bilong Telikom, Gidix Nasa bai go pas long beklain, John Koris na Abia Abia long midfil na Amos Puy na Oscar Aba long franlain. Tupela sait wantaim i luk wankain long strong bilong pilai tasol fitnes tasol bai lukim wina kamap.

Long arapela gems, Difens bai traim strong bilong Sobou long wimen wan divisen, Yunitek bai bungim Bugandi long primia tu (2), Malabu wantaim K.A. Mid Norths bai wip long divisen (1).

Wimen (2) Murat bai salensim Dal Labu, U19/(1) Yunitek bai wip wantaim Difens na divisen (2) TTC Bullets bai traim bun egens 8 Mile Demdem.

Ol arapela tim olsem Elcom (U19/1), Tisol (U19/2), Elcom, Guria, Waliya (wimen 1), Bugandi (w2), Murat (D1), Arnotts (D2), Shell Yunitek, Guria, Sobou (P1) na Lae Biscuit (P2) bai stap long bai.




• ANTAP: Namba tu Praim Minista na Minista bilong Spots John Pundari i sekhan long senta bilong Souths na long baksait em siaman bilong Pot Mosbi Lig.

• ANTAP RAIT: Karate man Sergei bilong Rasia i sain-im buk bilong ol lain sapota bilong em.

• LEPHAN: Walter Schnaubelt i salen-sim paitim Sergei bilong Rasia long fainel bilong Kyokushin Karate long Pot Mosbi. Walter i win.


Ol Poto: Joe Ivaharia



• Dispela em gem namel long Babaka na Bavaroko long anda 19 divisen i kamap long In-sevis koles las wiken. Tupela tim i dro 0-0.



• Kepten bilong Wests Luke "Boroma" Andrew i sas kam bungim Robert "Hitman" Tia bilong Souths long PRL gren fainel.



• Kepten bilong Downer Souths Wayne Moare i apim sil bihain Souths autim West 34-8 long Pot Mosbi Cambridge Lig gren fainel.

Anda 23 skwat bilong PNGFA Kap

PNGFA RIPOT

NESENEL soka kosa John Davani i tokaut pinis long Anda 23 skwat long stap insait long bikpela resis bilong nesenel soka sempionsip long Lae long Independens wiken.

Davani bai yusim dispela sempionsip long redim tim long go pilai long Osenia soka kwalifaia long Auckland, Nu Silan long Disemba.

Kosa Davani i laik olgeta tim pilai bilong Pot Mosbi, Wau, Kimbe na Kaiapit i mas ringim Moses Demas 472 3325 o PNGFA sekretari Ivan Ngahan long 3250869 long stretim rot bilong tiket na haus slip.

Nau yet i gat 30 pilaia i stap long anda 23 skwat. Na dispela 20 pilaia ol i makim long kik insait long

nesenel soka sempionsip i no fainel. Em bai tokaut long fainel skwat long Novemba na tim bai go pilai long Nu Silan.

Davani i laik tokaut klia olsem dispela skwat i kik long Lae long Independens wiken i no fainel skwat bilong go pilai long Nu Silan. Kosa i tok PNGFA i oraitim anda 23 long stap long sempi-

onsip olsem wanpela tim long redim ol yet. Na i gutpela sapos ol i ken kisim strongpela salens i kam long ol tim long senta olsem LFA, Lahi na Pot Mosbi. PNGFA i makim Ellison Lapan olsem namba tu bilong Davani long lukautim ol pilaia long Lae.

David Aua (Lahi), Bradley Bakuai (Pom) - golkipa, Hans Fred

(Lahi), Bobby Kenkava (Lahi), Trevor Ire (Pom), Adolf Horris (Pom), Alu Kamake (Lahi), Julius Peka (LFA), Jacob Amat (Kimbe) - fulbek, Desmond Sow (Pom), Ken Gule (LFA), Michael Sio (Kimbe), Jonute Rodney (Wau), Paulo Patterson (Pom), David Kaepapa (Pom), Isaiah Jonah (Kaiapit)-midfil, Vincent Sili (Kimbe), Ludwig Vuri (Lahi), Reg Davani (Pom), Mark Kelep (Lahi) - straika

Ol pablik sevans makim skwat

NCDPSSA RIPOT

NESENEL Kapitel Distrik Pablik Sevan Soka Asosiesen i makim pinis wanpela skwat bilong resis insait long nesenel soka sempionsip long Lae. Sempionsip ya bai kamap long Independens wiken.

Skwat ya i gat ol sampela biknem pilaia olsem Hans Gewambing, Raymond Nasa, Paskalis Atalou na Paul Kailou husat i makim PNG sampela taim long SP Gems na tu Melanesian Kap.

Gewambing na Paskalis i gat namba long fowat na tupela ya bai mekim planti ol birua tim i kisim taim.

Ol arapela pilaia olsem David Geame, Brian Tani, Polin "7 o'clock" Kanamon na Joe Koiri bai kamapim gutpela sapot pilai long midfil.

Ful skwat i wok long trening nau em

Hans Gewambing, Polin Kanamon, Robin Sino, Robert N'Dramoi, Paul Kailo, David Geame, Paskalis Atalou, Brian Tani, Pepi Pombuai, Raymond Nasa, Jacob Matambuai, Ronald Simon, Steven Osea, John Lelai, David Kaepapa, Philip Kule, Joe Koiri, Brian Lapan, Luluaki (Yunivesiti), Norm Mula, Albert (NBC) Jason Sigamata

Kosa em Stalin Jawa, Menesa Simon Koima na Dickson Aopi

Presiden Simon Koima i tok dispela skwat em long long givim sans long ol arapela pilaia husat i nogat sans long makim PMSA.

13 tim soim laik long sempionsip

PNGFA RIPOT

FRANCO NEBAS i raitim

WANPELA ten tri (13) tim i soim laik pinis long resi insait long bikpela nesenel soka sempionsip bai kamap long Lae.

Dispela bikpela resis ya bai luim olgeta namba wan soka pilaia long kantri i soim stail bilong ol.

Ol orgenaising komit bilong Lae Futbol Asosiesen i tokaut olsem olgeta samting i redi na ol i wetim tasol ol tim long kamap.

Ol tim i soim laik pinis em Lahi, LFA, Pot Mosbi, NCDPSSA, Wau, Buka, Kimbe, Kaiapit na Wewak.

Siaman bilong PNG Gems Komiti Paul Pondo i tok em i no kisim wanpela toksave i kam long ol tim yet olsem ol bai kamap o nogat. De bilong ol tim i tokaut long laik bilong ol long stap long dispela toname i pas pinis long Septemba 3.

Pondo i tok fi bilong nominesen em K250 long wanwan tim. Ol i tim i ken bengkim mani long PNGFA basbuk akaun, Boroko 201 006 441415.

Em i tok em bai i no inap kisim ol nominesen i kam bihain long dispela de na tu ol tim i nogat list bilong ol pilaia bai i no inap stap long resis tu.

Ol tim i baim pinis dispela ol fi i mas salim risit bilong ol i go long dispela fax namba 472 6254 long tokaut long kam bilong ol.



• Pilaia bilong anda 11, (l-r) Joseph Kakehe, David Turia, Barry Pascoe and Sam Lindsay i wok hat long trening bilong go pilai long Cairns long Australia.

Tabubil opisal i no amamas Pot Mosbi

SKULBOIS SOKA RIPOT

HENRY MORABANG i raitim

TUPELA opisel bilong Star Mauten Skulbois Soka Asosiesen i paia long ol ogenaia bilong Anda 11 soka tim i go long Cairns, Australia, long rausim tupela pilaia bilong ol.

Presiden John D'Siguria na sekretari Patrick Levo i autim wari bilong bihain long ol ogenaia long Pot Mosbi i rausim Cliff Mek na Hanz Wilson long skwat.

Cliff Mek em yangpela pilaia husat i helpim Tabubil long winim Anda 10 soka taitel long taim bilong Nesenel Orogen Soka sempionsip long Pot Mosbi.

Tupela i tok pasin ol Pot Mosbi i wokim i no gutpela tru na em i kilim stret soka long arapela provins.

Ol i tok ol ogenaia long Pot Mosbi i bin askim Tabubil long salim tupela pilaia long joinim tim olsem Star Mauten Soka i makim

liklik Mek na Wilson long makim ol. Presiden i tok ol opisel long Pot Mosbi Joe Turia na John Mogi i bin askim long tupela pilaia olsem na SMSSA i makim tupela yangpela pilaia.

Mista D'Siguria i tok ol i rausim tupela pilaia bikos ol i nogat mani.

Em i paia stret na salensim ol Pot Mosbi olsem sapos ol i sot long mani, orait, ol i mas toktok na Star Mauten Soka Asosiesen i nap long baim rot bilong ol.

"Nau yet Star Mauten Skulbois Soka Asosiesen i tingting long baim rot bilong tupela long Tabubil i go long Pot Mosbi, na Pot Mosbi i go long Cairns na kambek gen."

Em i tok mani em i no bikpela samting, sapos Pot Mosbi i sot orait ol i mas tokaut klia bikos nau yet, tupela liklik mangi ya i kisim bikpela pen tru bikos i westim bikpela taim na mani long redim ol yet.

Presiden i tok papa bilong yangpela Cliff Mek i baim balus tiket long go wantaim long was long liklik pikinini bilong em pilai. Dispela ol kain samting, em i soim tru olsem papa i

gat bikpela sapot na ol opisel long Pot Mosbi i kilim stret laik bilong dispela yangpela boi.

Nau yet ol yangpela pilaia i wok long hatim trening long hotpela san long Pot Mosbi long pilai.

Nem bilong ol dispela pilaia em tupela kosa em Alesana Desmond na Channel Kakehe. Ol pilaia em Simon Davis, Charlie Evara, Maurice Iazard, Ivan Kaizer, Joseph Kakehe, Jason Kariko, Patrick Kiromat, Yahee Kusunan, Thomas Lemon, Kele Lessy, Sammie Campbell Misirat, Gado Mitchie, Williwim Mobbs, Dominic Olm-Millingan, David Turia

Na long Gold Tim, tupela kosa em Collin Morea na Ludwick Kiromat. Ol pilaia em

Tamata'ane Amona, Aloysius Barabar, Mohamad Ridzwan Bin Hamzah, Hoko Hauhe, Taunao Lovai, Senyo Kosi Jiagee Mauwuli, Barry Pascoe, Emmanuel Popoitai, Darren Short, Chrsander Gengis Siri, Noel Beanke, Joseph Nicholas Tata, Jessman Tengdui, Joshua Tore, Samuel Uvau, Ryan Woolly.

Ol PNG pilaia long Ingran na France winim kontrak

FULBEK bilong PNG Kumul na Western Suburb (Magpies) long Australia, David Buko nau i gat bikpela tingting long pilai long France.

Menesa bilong Sam Ayoub i wok long toktok wantaim ol arapela klab long kisim Buko, tasol wanpela kontrak i kam long France i gutpela tru.

Insait long kontrak i tokaut olsem klab long France bai givim em wanpela ka, haus fri na kontrak fi bilong Aus\$180.000.

Buko bai kambek long ples Goroka bihain long em i pilai wantaim Magpies. I tru em i no save soim pes tumas long primia tim, em yet i amamas long gem bilong em.

Em i tokaut olsem em i kisim sampela ofa i kam long Canberra Raiders, Sydney City, Melbourne Storms na Penrith na Brisbane Broncos na tu nupela klab, Wests-Tigers.

Buko i tok olsem em i lusim olgeta wok bilong kontrak pepa wantaim gutpela menesa bilong em, tasol em i gat bikpela tingting tru long ofa i kam long France.

Mangi Goroka bai kamap namba tu pilaia long France. Namba wan pilaia em Richard Wagambie husat i go stap wanpela yia olgeta.

Buko bai go joinim planti ol arapela NRL pilaia husat nau i kisim kontrak na pilai long France ya.

Insait long arapela stori, Stanley Gene i sainim tri yia kontrak wantaim wanpela Supa Lig klab long Ingran. Nem bilong klab ya em Gateshead Thunders.

Gene husat i winim Pilaia of the Yia awot long namba wan divisen wantaim Hull Kingston Rovers bai joinim Supa Lig.

Kontrak ya bai stat long Januari 2000 i go pinis long Disemba 2002.


Gene i no pilai tumas wantaim Hull bikos em i brukim han na tu em i kisim bagarap long skru bilong em.

Gateshead i wok long bihain Buko na laik sainim em stat long 1997. Gene i askim olgeta sapota bilong em olsem ol i mas save olsem taim i mas senis na dispela ofa long Gateshead i gutpela tru ya.

Dave Harrison, kosa bilong HK Rovers i tenkim Gene long gutpela gem bilong em taim em i stap pilai wantaim ol long las foa yia.

Nupela kosa bilong Gene, Shaun McRae i welkamim Gene long joinim klab. McRae i laik sainim Gene taim em i kosim St Helens tasol nau em i gat sans long winim dispela long dispela yia.


Arapela PNG pilaia long Ingran, John Okul i sainim wan yia kontrak wantaim Doncaster Dragons.



• Buko-laik pilai long Frans



• Wagambie - namba wan PNG long pilaia long Frans.



• Gene- i joinim Supa lig klab Gateshead Thunder.

Vanimo ragbi lig redi long salens

FELIX RAMRAM i raitim

GARAMUT Hawks husat i winim primiasip bilong Vanimo ragbi lig i bin mekim strongpela training long bungim tim bilong Wewak long namba wan raun bilong Cambridge Kap resis long dispela wiken.

Tim menesa bilong Vanimo Daniel Maskim i tokaut olsem dispela yia gem i bilong Vanimo "bai i nogat mistek long en".

Daniel Maskim i tokim Wantok olsem turis tim bilong Vanimo bai i go long Wewak tude (Fonde) wantaim 17-pela pilaia na opisel

bai kamap long Fraide apin-un.

Menesa Maskim i tok Vanimo i bin pilai namba wan taim long Cambridge Kap em long 1977 we ol pilaia i mekim planti asua stret.

"Tasol gem bilong dispela yia, wanem ol mistek ol i bin mekim long dispela taim bai i no nap kamap ken. Olsem na Vanimo i gat strongpela bilip long daunim Wewak na kisim sans long pilai ege-sim Madang.

"Tru tumas, ol tambu long Wewak bai i nogat sans long dispela taim".

"Vanimo i wanpela liklik ples tasol em i gat nem long kamapim planti gutpela pila-

ia husat i gat nem na ples insait PNG Kumuls.

"Taim yumi kamap long kain taim olsem long salim ripresentativ tim i go long pilai arasait o ege-sim wanem turis tim i kam long Vanimo - mipela i save wok tripela o fopela taim moa long painim na bungim mani", Mista Maskim i tok.

Wokabout bilong Vanimo i go long Wewak em Garamut Entaprais na Vanair i sponsorim na Mista Maskim i "givim bikpela tok tenkyu i go long menesmen long kamap wantaim dispela kain luk-save long taim Vanimo lig i nidim tru helpim".

Gem bilong Wewak kembris kap sapos wanpela long dispela tupela tim bilong Sepik i win ol bai salensim Rabaul long kwata fainel. Tim bilong Vanimo i sanap olsem Joachim Una, Kelly Kairu, Chris Patu, Andrias (Defence), Dranden Nambo, Gibson Maskim, Adrian Laina, Gideon Kambu, Desmond Inikre, David Moihe, Philip Kairu, Yaliks Narapal, Gideon Akike, Peter Surum, John Ilau, Paul Payo na Steven Sakai.

Maskim i srukim tok tenkyu bilong em tu i go long Maur komyuniti long Wewak long lukautim tim.

Sil bilong soka dai long Manam Ailan

Yabu soka tim bilong Manam ailan long Bogia distrik em sempion bilong Madang kantri sait soka tournamen bihain tasol long em autim Madang soka asosisen 5-4 long gren fainel long las Sande.

Win bilong ol hia ino kamap isi, nogat. Ol bin soim olgeta stail bilong ol long kik long Fraide ikam na autim planti ol narapela ol tims na sambai long fainels. Long semi fainels, ol autim MSA 1,2-1 long pul B na MSA 2 autim Raikos 2,6-0 long pul A. Win bilong tuple i givim tiket long tupela long pilai long gren fainel.

Long gren-fainel tupela tim wantaim bin dro 4-4 na skoa ino senis long taim tupela pilai ken long ekstra taim. Bikos long dispela tupela kisim penelti kik na Yabu skorim wanpela moa gol na winim taitel. MSA 2 kamap nambatu, MSA 1 kamap namba 3 na Raikos kamap namba 4.

Tonamen ya em Gavana bilong Jim Kas bin go opim na tu em kikim op gem tu wantaim. Bipo long em go kikim op em tokim ol pilaia olsem insait long rifom olgeta wanwan memba bilong ol nau isave kisim klostu K1.25 million long wanwan yia.

Olsem na em laikim ol long askim ol wanwan memba long helpim ol long distrik level pastaim bipo ol kam long pronsel ofis.

Gavana Kas tu husat bipo bin save pilai insait long kantri sait tonamen itokim ol pilai olsem mi save sample bilong yupela ya save pilai agensim mi bipo ho pilai wantaim mi tu na mi hamamas tru.

Olsem na mi laikim

yupela long pilaim spot na soim tru spirit bilong spot na maski bringim kros bilong fil kam autsait, nogat. Yupela olgeta mas kamap poroman na pilai gut bikos long sampela taim igo pinis Madang bin sempion bilong soka long kantri na mi laik lukim olsem yupela mas winim bek dispela taitel.

Gavana mekim dispela na presentim K5.000 sek igo long presiden bilong spot kaunsel Peter Angassa na askim ol komiti bilong em long traim wokim na jeneretim sampela moa mani.

Meya Steve Amanasik tu givim tu K2,000 long ol komiti.

Tonamen dairekta John Giringo tok olsem tonamen ya bin ron gut tru na ino gat wanpela hevi i kamap. Em tenkim olgeta pilaia na ol tim ofisels bilong ol long gutpela wok bung bilong ol. Nau yet komiti bai sindaun long traim hat long selektim wanpela tim bilong tek pat long Mamose tonamen long neks mun.

Coca-Cola bin sponsorim dispela tonamen wantaim ol priases we ekt-ing-nambatu edministreta Peter Torot bin mekim presentesen.

Ol pilaia husat winim prais em: Engy Wozy (MSA-2, top gol skora), Timothy (Simbai top midfilda), Kami Manaka (Bogia 2 top difenda), Adei Kubai (Karkar, top gol kipa), top kosa em bilong Yabu. Top tim menesa Julius Ibona, Trensgogol 2, top referi Charles Komo na pilaia bilong tonamen igo long Yawasing Bewagu bilong Ambenob.

Stori bilong Pilaia

Nem: JOSEPHINE BARASURU AIHI

Klab: Telikom volibal

Spot: Volibal

DOB: May 23, 1971

Marit o Singel: Marit

Namba wan kaikai: Taro na Ox & Palm

Posisen: Seta

Wanem samting yu ken tingim long laip bilong yu long yu pilai? Winim grenfainel namel long Telikom na Nadzab


Wanem ol arapela spot yu save pilai? Basketbal na sofbal

Wanem pilaia i save helpim yu? Kila Joe Wanem pilaia i givim yu hattaim: Ennie Gedisa bilong Nadzab

Wanem pilaia em i namba wan poroman bilong yu? Ennie Gedisa

Wanem disisen em kamapim bikpela senis long laip bilong yu? Taim mi stap dring bia (SP)

Wanem samting bai yu mekim long bihain taim? Kamap olsem kosa



Trabel bihainim tasol pis agrimen namel long Israel na Palestain

Jerusalem: Wanpela nait bihainim tasol long Israel na Palestain sainim pis agrimen long dispela wik, ol wok i stat pinis long bagarapim ol wok long stretim hevi namel long tupela lain pipel ya.

Tupela ka bilong ol paitman husat i bin laik kamapim trabel long tupela biknem not Israel siti bilong Tiberias na Haifa i bin pairap na kilim dai ol lain insait long Sande nait, ol ripot i tok. Tripela saspek we ol i bilip olsem ol i memba bilong Palestain militia grup Hamas i dai na wanpela lapun meri Israel i bin kisim bagarap bihainim pairap bilong wanpela bom long strit bilong Tiberias.

Hamas em dispela militia Palestain grup we i birua long Israel na i save karimaut ol trabel, bagarap na kilim dai long bagarapim ol wok bilong kamapim na go hetim ol wok bilong painim gutpela sindaun namel long Israel na Palestain. Long las wiken tasol na bihainim ol toktok namel long tripela lida bilong Ijip, Palestain na Israel we ol bin holim long Ijip, Presiden Ehud Barak bilong Israel na

Palestain lida Yasser Arafat i bin sainim pis agrimen we Israel bai givim bek hap graun long Wes beng insait long 11-pela de.

Na tu larim i go fri planti handred Palestain kalabus lain em i holim long ol haus kalabus. Ol ripot i tok wanpela awa bipo longol bom i pairap,Israeli kabinet i bin wanbel wantaim 21-2 mak bilong vot long go hetim ol dispela agrimen.

Ripot i tok mAski long dispela meknais, Isrrael bai go hetim dispela agrimen we ol i wokim las wiken.

Ol ripot i tok dispela ol bom pairap na trabel i wankain tasol olsem dispela we i bin kamap long Oktoba las yia bihainim saining bilong Wye Riva pis agrimen long Marylen, Amerika namel long tupela lida bilong Israel na Palestain.

Ol ripot i tok wanpela Israeli gavan ministia i tok i moabeta pablik i sapotim ol dispela pis agrimen. Na i no gutpela sapos ol trabel olsem i kamap bikos ol dispela bai bagarapim tasol ol gutpela wok.

Moa trabel long Is Timor bihainim indipenden vot


Is Timor: Long las wik Mande, ileksen long dispela samting i bin kamap na planti pipel tru i bin bung long putim vot bilong ol. Nogat trabel i bin kamap long de bilong vot tasol klia bihain long en. Ol gan bilong ol ami bilong Indonesia na ol sapota i pairap. Ol i sut long ol pipel bilong Is Timor husat i sapotim indipendens, ol woklain bilong Yunaitet Nesen na planti pipel i ronawe lusim ples na ol i hait nabaut long bus, plis stesen na ol haus lotu i stap.

I kam inap nau, ol ripot i tok 24 pipel i dai long ol trabel long Dili, biktaun bilong Is Timor. Planti man i stap wantaim pret insait long ol haus. I gat tu ol ripot olsem planti arapela moa manmeri na pikinini bilong Is Timor i dai long han bilong ami bilong Indonesia na ol sapota bilong ol.

Ol ripot i tok stap na sindaun long Dili, kapi-tel bilong Is Timor i no gutpela bikos ol man i stap wantaim pret. Ol soldia bilong Indonesia i ronim ol pipel long ples bilong ol, bagarapim na kilim dai planti pipel tu.

Long ol ripot, pait na trabel i wok long go bikpela taim ol nius i kamap olsem planti pipel i sapotim indipendens na ol bin putim vot long dispela. Ol lain Yunaitet Nesens lain husat i bin lukautim dispela vot i tok long ol pipel i bin vot, samting olsem 90 pesen i bin tok ol i laikim indipendens.

Ol ripot i tok ami bilong Indonesia na i no ol rebal paitman husat i no laikim Is Timor long bruk lusim Indonesia, i wok long kamapim ol trabel na kilim dai ol indipendens sapota na ol manmeri na pikinini bilong Indonesia. Ol haus long Dili i wok long paia wantaim tu. Ol ripot i tok tu olsem ol ami bilong Indonesia i wok long fosim na odaim ol manmeri na pikinini bilong Is Timor long kalap long sip na go long Wes Timor. Ol strit bilong Dili i nogat man tumas long en bikos planti pipel i ron-



awe na ol dispela i stap yet i pret long wok-abaut.

Ol ausait lain i wok long Is Timor na ol Yunaitet Nesens i wok long kisim i go bek planti ol woklain bilong ol aut long Dili bikos trabel na pait i go nogut nau. Tupela wokman bilong Yunaitet Nesens i dai pinis na sampela i kisim hevi long han bilong ol militari na ol paitman long Dili. Bikos trabel i wok long go nogut, i gat ol toktok long kisim intenesenel pis kiping grup i go long Is Timor tasol Indonesia i no laikim dispela.

Foren Ministia bilong Australia - Alexander Downer i tok em bilip olsem Presiden Habibie bilong Indonesia, bos bilong ami Jenerel Wiranto na sampela ami komanda i wok long traim hat long mekim samting bilong traim daunim ol hevi long Is Timor tasol i gat sam-

• Tromoi han long soim sapot long indipenden Is Timor. Ol yangpela bilong Is Timor i spotim ailan bilong ol long bruk lusim Indonesia na kisim indipendens.

pela husat i nogat. Lida bilong resistens grup long Is Timor na Nobel Pis prais wina Jose Ramos-Horta i tok Is Timor bai bungim bikpela hevi nau bihainim vot we bikpela mak bilong populesen long ailan provins i bin vot long sapotim indipendens.

Meri gat lek olsem ol wing bilong pisin! ...

• Noken ting olsem dispela em meri nating, nogat ya! Em gat nem long Australi na wol bikos em i gat namba olsem top meri long pilai spot ron (atletiks) winim olgeta long dispela pilai long wol. Piksa i kam long Courer Mail niuspepa. Dispela yangpela meri Aborigini o asples blek skin bilong Australia em i winim olgeta rana long wol na i holim taitel olsem sempion bilong atletiks. Em bin winim gol medal long Athens na silva long Atlanta Olimpiks long 1996. Long las wik, em bin winim 400 mita wol taitel long Serville, Spain na kipim rekot bilong em. Mis Freeman i tok em i wok long redi long Sidni Olimpiks we bai kamap long neks yia.



Bisop laikim hevi i mas pinis long Solomon Ailan

Solomon Ailan: Katolik Sios Asbisop bilong Solomon Ailan Asbisop Adrian Smith i singaut long ol grup husat i stap insait long dispela ol hevi long kantri long stapim ol. Asbisop Smith i tok kantri i les long ol lain husat i wok long kamapim trabel na askim ol long stapim ol dispela samting bikos ol i wok long kamapim hevi long ol pipel.

Em i tok pasin bilong sutim tok long wanpela arapela i no inap pinisim hevi we nau gen, tupela moa pipel i dai long en.

"Ol dispela lain husat i kamapim moa bagarap, pen na hevi long i mas stapim ol dispela samting nau. Kantri i abrusim pinis

de ol bin makim long lusim ol samting bilong pait long en, tasol nogat samting i kamap yet," Asbisop Smith i tok.

Praim Ministia Bartholomeo Ulufa'alu i bin makim Septemab 2 olsem de we ol paitman grup husat i stap long hevi long Solomon Ailans long lusim ol samting bilong pait long en long ol ples we ol bin tok long ol long Guadalkanal.

Asbisop Smith i wok long singaut long ol lain paitman husat i hait yet long bus long kam aut na helpim long ribildim ol samting we ol bin bagarapim long taim bilong hevi. Mista Ulufa'alu i tok husat grup i kamarpim

trabel em bai lo i givim bikpela mekim save i go long ol. Na em i askim ol paitman long givim bek long ol papa bilong ol ol ka na motobot we ol bin stilim i no longpela taim i go pinis long en.

Mista Ulufa'alu i wokim dispela toktok bihainim dai bilong tupela pipel long ples Sukiki na Komuvalou long saut is Guadalkanal. Sampela arapela i bin kisim bagarap na ol bin kukim tu sampela haus. Dispela em long pait we ol rebel paitman i bin kamapim.

Ol plis i bilip olsem ol dispela birua na bagarap i kamap bihainim wanpela trabel

i bin kamap pastaim long ailan na ol bin kukim 10-pela haus long en.

Ol komiti memba we ol bin makim ol long monitaim na go hetim ol samting long Panatina Agrimen i raun na holim ol bung long 12-pela ples insait Guadalkanal.

Siaman bilong komiiti Ezekiel Alebua husat i palamen memba bilong Guadalkanal na siaman i raun wantaim ol arapela bikman. Ol i redim ripot long wok-abaut bilong ol na ol bai givim long Praim Minsta Ulufaa'lu long lukim, skelim na glasim.



Ron bilong Pasindia Sip September 1999

Vessel	Voy No.	Sailing from Lae for:	Day	Date	Time
Nagada	437 A	Finsch/Lablab/Lae	Wed	1/9/99	4pm
Maneba	524 N	Lorengau (Mag)	Wed	1/9/99	4pm
Nagada	437 N	Fin/Sio/Wasu/Bali/Biliau/Mag	Fri	3/9/99	12nn
Rita	486 B	Fin/Lab/Fin/Lae	Fri	3/9/99	5pm
Rita	486 D	Oro Bay/Lae	Sat	4/9/99	8pm
Rita	487 N	Fin/Wasu/Mag/Wewak	Mon	6/9/99	9am
Mamose exp	626 N	Kimbe/Rabaul/Kimbe/Lae	Mon	6/9/99	3pm
Nagada	438 N	Finsch/Wasu/Long/Lok (Mag)	Tue	7/9/99	4pm
Maneda	525 N	Lorengau/West Coast (Lae)	Wed	8/9/99	4pm
Mamose exp	626 B	Fin/Lab/Fin/Lae	Fri	10/9/99	5pm
Nagada	438 S	Dogura/Lae	Sat	11/9/99	4pm
Mamose exp	626 D	Oro Bay	Sat	11/9/99	8pm
Mamose exp	627 N	Fin/Wasu/Madang/Wewak	Mon	13/9/99	9am
Rita	488 N	Kimbe/Rabaul/Kimbe/Lae	Mon	13/9/99	3pm
Maneba	526 N	Finsch/Wasu/ (Mag)	Tue	14/9/99	4pm
Nagada	439 A	Finsch/Lablab/Lae	Wed	15/9/99	4pm
Umboi	534 N	Lorengau (Lae)	Wed	15/9/99	4pm
Nagada	439 N	Fin/Sio/Wasu/Gali/Biliau/Mag	Fri	17/9/99	12nn
Rita	488 B	Fin/Lab/Fin/Lae	Fri	17/9/99	5pm
Rita	488 D	Oro Bay/Lae	Sat	18/9/99	8pm
Rita	489 N	Fin/Wasu/Madang/Wewak	Mon	20/9/99	9am
Mamose exp	628 N	Kimbe/Rabaul/Kimbe/Lae	Mon	20/9/99	3pm
Umboi	585 N	Finsch/Wasu/ (Mag)	Tue	21/9/99	4pm
Mamose exp	628 B	Fin/Lab/Fin/Lae	Fri	24/9/99	5pm
Mamose exp	628 D	Oro Bay	Sat	25/9/99	8pm
Mamose exp	629 N	Kimbe/Rabaul/Kimbe/Lae	Mon	27/9/99	3pm
Nagada	440 C	Dogura	Mon	27/9/99	4pm
Maneda	528 N	Finsch/Wasu/ (Mag)	Tue	28/9/99	4pm
Totoi	798 A	Finsch/Lablab/Lae	Wed	29/9/99	4pm
Umboi	586 N	Lorengau (Lae)	Wed	29/9/99	4pm
Nagada	440 D	Kandrian/Arawe/Lae	Thu	30/9/99	12nn

Ron bilong Kago Sip September 1999

Vessel	Voy no	Sailing from Lae for	Day	Date	Time
Main Ports					
Maneba	524 N	Lorengau.....(Mag)	Wed	01/9/99	4pm
Wewak	358 N	Madang/Wewak/Vanimo	Fri	03/9/99	10pm
Kuder	228 A	Madang	Tue	07/9/99	6pm
Maneba	252 N	Lorengau/West Coast (Lae)	Wed	08/9/99	4pm
Kuder	228 N	Madang/Wewak/Vanimo	Fri	10/9/99	10pm
Wewak	359 A	Madang	Tue	14/9/99	6pm
Umboi	584 N	Lorengau (Lae)	Wed	15/9/99	4pm
Wewak	359 N	Madang/Wewak/Vanimo	Fri	17/9/99	10pm
Kuder	229 A	Madang	Tue	21/9/99	6pm
Maneba	527 N	Lorengau (Lae) Dangerous	Wed	22/9/99	4pm
Kuder	229 N	Madang/Wewak/Vanimo	Fri	24/9/99	10pm
Wewak	360 A	Madang	Tue	28/9/99	6pm
Umboi	586 N	Lorengau (Lae)	Wed	29/9/99	4pm
Small Ports					
Nagada	437 A	Finsch/LabLab/Lae	Wed	1/9/99	4pm
Nagada	437 N	Finsch/Sio/Wasu/Gali/Biliau/Mag	Fri	3/9/99	12nn
Umboi	583 N	Aitape	Mon	6/9/99	4pm
Nagada	438 N	Finsch/Wasu/Ion/Lok (Mag)	Tue	7/9/99	4pm
Nagada	438 S	Dogura/Lae	Sat	11/9/99	4pm
Maneba	526 N	Finsch/Wasu/ (Mag)	Tue	11/9/99	4pm
Nagada	439 A	Finsch/Lalab/Lae	Wed	15/9/99	4pm
Nagada	439 N	Finsch/Sio/Wasu/Gali/Biliau/Mag	Fri	17/9/99	12nn
Umboi	585 N	Finsch/Wasu/ (Mag)	Tue	21/9/99	4pm
Nagada	440 C	Dogura/Lae	Mon	27/9/99	4pm
Maneba	528 N	Finsch/Wasu/ (Mag)	Tue	28/9/99	4pm
Totoi	798 A	Finsch/Lablab/Lae	Wed	29/9/99	4pm
Nagada	440 D	Kandrian/Arawe/Lae	Thu	30/9/99	12nn

Soy sos i ken kamapim sik kensa

London: I gat ripot olsem sampela soy sos we pablik i save yusim long kuk na mekim ol kaikai i kamapim nais i posin na i ken kamapim sik kensa.

Dispela ripot i kam long Join Fud Sefti na Strended Grup (JFSSG) long Ingran.

Long tude, planti mama na pipel long PNG i save yusim ol soy sos long kukim na switim kaikai bilong ol. Ol Saina na ol Esia lain em ol pamama bilong kuk long soy sos.

JFSSG grup long Ingran i tokaut pinis long dispela samting long ol lain husat i save stap insait long wok tred na ol saplaia olsem ol mas toksave i go

long grup sapos ol i kiism ripot long dispela samting i kam long ovasis sapos ol ken ripot long dispela samting.

Ripot i tok nem bilong dispela kemikol we ol i save putim long soy sos em long 3-MCPD. Na ol dispela soy sos we i gat planti 3-MCPD level long en i ken kamapim sik kensa na i no gutpela long yusim long kuk wantaim long en.


Ol ripot i tok tes we ol i karimaut long ol rat i soim olsem wanpela soy sos we ol i wokim wantaim planti 3-MCPD long en i bin as long kamapim skin kensa long ol rat. Ripot i tok ol bin karimaut ol tes long dispela

samting long Gemeni, Holan na Sweden. Na ol bin baim ol sos long Saina.

Agrikalsa Minista Nick Brown i tok ol dispela prodak i stap long maket long Yunaitet Kingdom (UK) tu.

"O li putim toksave pinis long ol kaikai bisnis na ol soy sos saplaia long bihainim mak bilong 3-MCPD we Ingran i laikim long putim long soy sos we inap long 10 pela hap long wan bilien.

Mista Brown i tok JFSSG bai karimaut ol wok painim long olgeta soy sos we ol i save salim long ol stoa na supamakot long Ingran.



• **Han bilong helpim olgeta .. Mary knoll misinari lapun Pater Robert Mc Cahill bilong Goshen, Indianapolis i wok long India olsem misinari na dokta. Em i helpim wanpela sik pikinini long bangladesh. Pastaim ol man i no bilip tumas long en bikos ol save ting olsem em laik pulim ol Muslim lotu lain i go long Kristen Sios. nau ol i nogat dispela kain tingting na ol i save go long em long kismihelpim taim ol i sik. Ol pikinini i givim nem, "Okay" long en na dispela nem i stap pas long en. Piksa i kam long Mary knoll megesin.**



• **Ol "Forgotten" refuji bilong Yurop .. Ol dispela bikpela manmeri bilong Kosovo i nogat ples we ol ken kolim bilong ol. Ol i sori i stap. Ol i hap long ol refuji long ples Krajina na ol i stap long Kragujevac kolektiv senta long Serbia. I gat samting olsem haf milien o 500,000 refuji lon Kosovo pait we i stap long ol klasrum, bareks o ol olupela fektiri long Yurop. taim pait i pinis, planti i no save yet sapos ol bai go bek long Kosovo o nogat.**

- *Refugees magesin na MaryKnoll*

Glu helpim long stapim sik

Miami, Amerika: Ol Florida dokta i wok long yusim wanpela kain glu long stretim ol sik bilong bun, ol ripot i tok.

Ripot i tok ol Florida dokta long Amerika i no yusim ol masin, naip na ol arapela bikpela samting long haus sik long stretim sik wantaim dispela nupela rot long stretim ol sik long bun samting.

Dispela glu em i klostu wankain olsem Krazy Glue we ol i save yusim long fiksim ol samting i bagarap insait long haus olgeta de.

Ol i koim dispela kain rot long stretim sik long vertebroplasty. Em i nupela samting na ol no traim yet long planti hap bilong Amerika tasol planti lain i wok long go long ol dokta long stretim ol long dispela rot bikos ol i lukim olsem em i karim kaikia. Ol dispela siklain we marasin i no inap

long oraitim ol i wok long go long dispela nupela rot long kismihelpim lon stretim sik olsem sik long beksait bun we marasin i no inap long oraitim.

Ol bin yusi dispela rot long oraitim ol siklain long kantri Frans long 10-pela krismas pinis tasol bikos ol siklain i no inap long kism Medicare long peim, ol no hariap long yusim long Amerika. Tasol long saut Florida we planti bikpela na lapum manmeri i bungim dispela kain sik, ol i larim faipela haus sik long yusim dispela kain rot long sevim ol pipel.

I nogat planti pen na hevi i stap long bihaini dispela rot long stretim ol sik, Dokta Richard Latchaw, bos bilong Intevensen Neurorediology long Yunivesiti bilong Miami husat i wok long dispela projekl long 18 mun nau i tok.

Ol dokta i ken karimaut Vertebroplasty operesen insait long wan na tu awa tasol. Na ol i save yusim liklik marasin tasol. Ol dokta i yusim ol masin long stiaim rot bilong ol na ol bai pusim tasol wanpela nidel long beksait i go long dispela bun long na i go olgeta long dispelas bruk bun. Ol i save putim ol liklik hap simen i go long hul na ol i save go hat bek na stringim bun ya.

Taim ol man i lusim haus sik ol i save strong na ol i save aut long haus sik hariap tru. Tasol dispela rot i gat hevi tu long en na i no save helpim long olgeta samting. Sapos i gat planti pipel wantaim hevi long bun i kamap long ol mase! o ol narapela hevi we i no sut long ol bun, rot ya bai no inap long helpim man, ol ripot i tok.

LAI PSTAIL

Onkaparinga skulim ol PNG sumatin

WENCESLAUS MAGUN i raitim

WANPELA nius ripota, wanpela redio anaunsa, wanpela plis ben masta, na wanpela musik tisa bilong Sogeri Nesenel Hai Skul i kam bek long Papua Niugini long 28 Ogas, bihain long ol i pinisim tupela mun musik, redio, na Maltimidia stadi long Ostrelia.

Onkaparinga Institiut bilong Teknikel na Feda Edukesen (TAFE) long Adelaide, Saut Ostrelia i bin winim AusAID kontrak bilong skulim ol dispela sumatin. Ol dispela sumatin i bin go long Ostrelia long Sande 4 Julai.

Sinia Ripota bilong Wantok niuspepa, Wenceslaus Magun (em mi yet) i bin go stadim Maltimidia long Edukesen Teknoloji Senta insait long O'Halloran Hill kempes bilong Onkaparinga Institiut. Sinia Redio Anaunsa na Produsa bilong FM-100 Kalang sevis, William Mairi i go skul na wok long redio 5UV, wanpela redio stesin bilong Yunivesiti bilong Adelaide. Sejen Meja bilong PNG Plis Ben John Kumbia, i bin go skul na wok wantaim plis ben bilong Adelaide na tu em i bin kisim musik skul long Onkaparinga Institiut. Na Het bilong Musik Dipatmen bilong Sogeri Nesenel Hai Skul, Raphael Yambune i bin go kisim moa skul long Musik long Onkaparinga Institiut.

Dispela foapela sumatin i go kisim skul tu long Trenim ol Trena long Croydon kempes, wanpela skul bilong Douglas Mawson Institiut, narapela skul bilong TAFE long Adelaide yet.

Insait long skul bilong Maltimidia, mi bin wokim ol projek insait long Photoshop software; Microsoft PowerPoint software; Adobe Premiere software; CorelDRAW software; Digital still camera; Digital video camera; Scanner na Laminator; Capturing sound long Compact Disc; Internet, Web design; na Kopim ol fail i go insait long CD yusim ol spesel Burning software.

Mi bin givim tu wanpela presentesen long Microsoft PowerPoint i go long ol



• (r-l) Wenceslaus Magun, William Mairi, Raphael Yambune, Profesa Andrew, na John Kumbia. Mipela i bin go glasim Maltimidia skul bilong Douglas Mawson Institiut bilong TAFE long Port Adelaide.

dairekta, het tisa bilong O'Halloran Hill Campus, na ol tisa na sumatin bilong Edukesen Teknoloji Senta bilong kisim mak. Insait long dispela presentesen, mi bin yusim skul bilong video, audio, graphics, text na transition.

Maltimidia Kos em i wanpela teknikel kos, na husat i laik go kisim kain skul i mas aplai long pinisim Setifiket II. Dispela bai kisim samting olsem 6 mun kos na 6 mun wok ekspiens. Yu ken go het long kisim Setifiket IV na Advance Diploma long Maltimidia sapos yu laik. Dispela bai kisim sampela moa yia bilong skul na wok.

Ol tisa bilong mi i tok, Maltimidia em i wanpela nupela skul insait long Infomesen

Teknoloji long wol tude. Ol i tok tu olsem, i gat bikpela maket bilong ol lain i gat save bilong Maltimidia.

Long taim Mista Mairi i wok wantaim 5UV, em i kisim skul bilong redim ol program, wokim komesel prodaksen, na lain-im planti ol nupela teknoloji bilong redio.

Mista Mairi i tok, taim FM-100 i kirapim nupela studio bilong ol, em bai yusim ol save em i bin kisim long Adelaide. Long wankain taim em i tok, em bai skulim ol wan wok bilong em. Mista Mairi i bin soim ol bos bilong 5UV olsem em i gat planti yia ekspiens long wok bilong redio na ol i bin amamas long save em i kisim. Mista Mairi i bin toktok wantaim Mista Kumbia na mi yet

long 'Drive Time' program bilong 5UV bilong kisim mak na tu bilong givim tingting long ol bos bilong AusAID wanem kain tingting mipela i gat long dispela skolasp na skul bilong mipela wanwan.

Em i tok bihain long dispela toktok bek long redio, ol nius manmeri i bin go kisim nius bilong em.

Mista Kumbia em i wanpela sinia musik man wantaim Royal PNG Konstabulari ben. Em i tok em i gat bikpela laik long yusim save bilong lukautim plis ben na wanem kain rot ol plis long Adelaide i save mekim long pilai musik. Em i bilip wanem ol save em i kisim bai helpim em long mekim wok bilong em na tu helpim ol memba bilong Royal PNG Konstabulari ben.

Mista Yambune i holim Namba Tri Gred Pianoforte AMED long Yunivesiti bilong Papua Niugini. Em i save pilai piano, kibod, gita, saxophon, trampet, dram na tu em i save pilai wantaim ol kontemporari ben long PNG.

Em i holim tu wok olsem kodineta bilong musik bilong wanpela nupela Maltimidia kampani long Mosbi ol i kolim Tribal Voice Multimedia Marketing and Promotions.

Mista Yambune i tok em i bilip dispela 8 wik musik kos bai helpim em long developim nupela stail bilong musik long laik, bel, tingting, kalsa na stail bilong em yet.

Long taim bilong greduesen ol bos bilong Onkaparinga Institiut na ol mausman na meri o bos bilong 5UV, Adelaide Plis Ben, Edukesen Teknoloji Senta bilong O'Halloran Hill kempes, na Croydon kempes i bin holim wanpela las gutbai na greduesen pati bilong mipela long Lone Star Restoran, klostu long Flinders Yunivesiti.


Insait long dispela greduesen nait, ol i tok amamas long mipela, long Gavman bilong PNG na ol spona bilong mipela na givim mipela wanwan Setifiket IV long Trenim ol Trena na ol setifiket long wanwan kos mipela i bin stadi long en.



• Wenceslaus Magun i go lukluk raun long ol bikpela Wain plentesen na ol Wain fektori bilong Saut Ostrelia.



• Wanpela singsing grup bilong Enga provins i singsing long amamasim ol palamen lain i kam long Pasifik na Esia rijon las mun.
 • RAITHAN: Ol NGO long Isten Hailans provins i kamapim wanpela komyuniti yut hol long las mun.




• Ol ami bilong Lae, Igam Bareks i mas na sut long sotgan long opim bikpela Morobe mini gems long las mun.
 • RAITHAN: Ol sampela lain famili long Daulo, Isten Hailans provins i bin kamap long opim nupela haus lotu bilong ol long las mun. Poto: Sape Metta.



• Ol mama grup long Morobe i amamas na welkamim ol wokmeri bilong UNDP long wanpela bung bilong ol meri las mun.
 • RAITHAN: Ol woda na plisman i helpim long karim bokis makim ol manmeri i bin dai long Aitape birua bilong solwara.



Tupela pren kamap birua bihain



BIPO BIPO tru dok na kapul tupela i no save kros pait liklik. Tupela i raun gut na slip long wanpela haus tasol. Wanpela de Misis Kapul i tokim dok olsem, "Mi go long gaden long painim kaikai. Yu stap na brukim paia i stap."


Misis komplem raun long gaden pinis na kam bek long haus na lukim baga dok ya i slip arere long paia i stap na nogat paia i stap tu.

Kapul i lukim na em i bel nogut tru na em i krosim dok olsem. "Yu gutpela dok we, yu lukim yu yet pastaim. Skin das beksait i go antap na yu wok long kaikai i stap. Yu nogat gaden bilong yu. Na tu yu skelim kaikaim i stap. Yu pisov na go ausait."

Kapul i bagarapim baga dok nogut tru. Baga ya lukluk i go na lap long skai. Skai i stap na lukluk i go daun long graun i stap. Plis ai wara bilong baga dok ya i pundaun na kolim lewa tru. Baga dok i belhat nogut tru na statim pait na tupela i pait. Tupela i giaman tasol.

Na bihain kainkain kapul i kam bum. Na kainkain dok i kam bum. Nau ol i stat kros. Na bikpela pait i kamap long tupela lain wanpisin na dok i strong tru na ronim kapul. Kapul i ronawe na go nabaut long bikbus. Nau yumi save dok na kapul tupela i save stap wanbel na kaikai wantaim.

Mark Uma
Kundiawa, Sumbu provins



Nem: Jerat Theo
Krismas: 15 yias (man)
Adres: Hargy Division One, P.O. Box 4, Bialla, WNBP.
Save laikim: Pilai soka na ragbi tas, sindaun mastainim gem na givim toktok long ol bois.

Nem: Stanley Nick
Krismas: 18 (man)
Adres: Hargy Division One, P.O. Box 218, Bialla, West New Britain Province.
Save laikim: Pilai soka na ragbi tas na tok pilai wantaim ol bois na serim ol samting long ol bois.

Nem: Len Kamai
Krismas: 18 (man)
Adres: Hargy Division One, P.O. Box 218, Bialla, West New Britain Province.
Save laikim: Pilai soka na pilai ragbi tas na salim tingting long pilai soka long olgeta hap.

Nem: Silas Beta
Krismas: 19 (man)
Adres: Hargy Division One, P.O. Box 218, Bialla, West New Britain Province.
Save laikim: Pilai ragbi tas na sindaun mastainim gem na givim toktok long ol bois.

Nem: Lawrence Naurongi
Krismas: 17 man
Adres: Hargy Division One, P.O. Box 4, Bialla, WNBP.
Save laikim: Pilai ragbi tas na soka na painim ol meri bilong wokim pen pren.

Nem: Robert Pegia
Krismas: 19 yias (man)
Adres: P. O. Box 1495, Mt Hagen, WHP.
Save laikim: Amamas long lukim Wantok Niuspepa, go lotu na singim ol lotu singsing senisim poto wantaim ol narapela kristen. Waswas long bikpela wara mekim pen pren wantaim ol narapela na lukim narapela ples.

Nem: David Weilape
Krismas: 18 (man)
Adres: Talair Block, P.O. Box 2845, Lae, Morobe Province.
Save laikim: Pilai soka, tok pilai, go long lotu na ritim Wantok Niuspepa.

Nem: Gabriel Jerry
Krismas: 15 (man)
Adres: P.O. Box 315, Grabensis Community School, Lae, Morobe Province.
Save laikim: Pilai soka, raun wantaim pren long skul na salim samting i go i kam na go long konfemesen klas. Na go long lotu. Na pilai wantaim ol manki Jongafar just spin tasol.

Nem: Smither Malakai
Krismas: (5 man)
Adres: Songura Top Up, Primary School, P.O. Box 69, Mendi, SHP.
Save laikim: Go skul, go lotu, pilai spots na senisim presen. Mi promis tru mi bai bekim olgeta paswe mi kisim.

Nem: James Timbi
Krismas: 22 (man)
Adres: Mueapeng SDA Church, P.O. Box 1845, Mt Hagen, WHP.
Save laikim: Save laik go lotu na singim ol song na autim tok bilong Jisas, Senisim ol presens, amamas long lukim ol narapela ples na tok pilai wantaim ol narapela manmeri.



LAIPPLAIN

Mi pilim olsem pasin bilong smok na dring bai no inap long kamapim wanpela gutpela samting na olsem mi laik stapim dispela samting long mi yet.

Mi singel na mi wok tasol mi nogat plen long samting we mi laik mekim long bihain taim. Mi sem long Askim ol narapela long helpim mi taim mi pinisim ol mani bilong mi. Mi save kus planti na mi no nogat strong long pilai.

Ol papamama i askim mi long salim mani i go long ol na mi pilim nogut long giamanim ol.

FREE ME

Mi laik lusim smok na dring pasin

PREN

Em bai hat long lusim dispela pasin bilong smok na dring tasol yu inap long daunim. sampela arapela i bin gat wankain hevi olsem yu tasol ol bin strong na ol i lusim dispela pasin olgeta.

taim yu luksave olsem dring na smok pasin i no gutpela long helt bilong yu na bai bagarapim yu, em i namba wan bikpela step long rot bilong lusim dispela rabis pasin.

Ol i save tok sampela marasin i ken helpim manmeri long lusim pasin bilong smok na dring tasol dispela i no tru olgeta. samting tru em manmeri i mas gat bikpela tingting na laik long senis, na lusim smok na dring antap long ol arapela samting. Sapos manmeri i gat strongpela tingting long stretim pasin i no stret, em no nidim marasin long wokim dispela.

Sampela i luksave olsem ol i senisim laip na ol pasin bilong ol taim ol i gat spesel prensip wantaim narapela man/meri.

Pawa bilong Bikpela na lav na pasin bilong pogivim wanpela

arapela i ken mekim manmeri i senisim laip na sindaun bilong em. Yu kisim ol hevi bilong yu long preia i go long Bikman na tu askim em bilong wanem samting tru na em i putim yu long dispela wol?

Bikpela na hatpela samting long lusim dispela pasin em long festaim stret taim yu laik givap long smok na dring pasin. Em bai hat tru long namba wan de tasol long de namba tu, em bai kamap isi. Na taim em i go long namba tri na foa de, em bai isi liklik. Taim yu bungim namba wan wik long givap long smok na dring, em bai isi na bihain long dispela, em bai go isi tasol. Olsem na bikpela wok na hetpen i save kamap long de wan taim yu stat, tasol long ol taim i kam, em bai isi.

Sapos yu gat sampela kain samting long helpim yu seving mani bilong yu bai i gutpela moa. Wanpela tok piksa long helpim yu em wokim aut hamas bai yu sevim long fes potnait bilong yu taim yu no dring na smok. Salim sampela mani i go long ol papamama long ples o sapos nogat,

putim long wanpela beng akaun bilong ol na rait i go long ol na tokim o hamas mani yu sevim bilong ol.

Narapela samting tu em pasim toktok wantai wanpela pren bilong yu na yutupela wantaim i lusim smok na dring pasin. Yutupela i ken sapotim wanpela arapela. Sampela taim tu, yutupela i ken kaikaim ol loli na pikei long lusim tingting long smok.

Laspela em askim yu yet watpo tru na yu statim smok pasin. Em i kamap olsem wanpela hebit o samting we yu wokim long olgeta de nau? Watpo na yu statim dispela smok pasin? Yu wokim dispela long pulim ol pren o yu bin laik lusim sori pasin bilong yu stap wan yu yet? gutpela moa long strongim tingting bilong yu long lusim dispela pasin we i ken bagarapim na pinisim mani bilong yu long wokim samting we bai helpim yu long laip na sindaun bilong yu na i gutpela rot long tromei mani bilong yu long en.

LAIPPLAIN

Save long wokim vanilla

PLANTI yumi i save laikim tru aiskrim o swit kek o soklet. Planti pikinini i save laikim moa moa yet dispela ol kaikai.

Ating yumi save traim tingim wanem samting tru i mekim na dispela aiskrim o kek o soklet i gat dispela switpela smel.

Ol lain bilong wokim aiskrim, kek na soklet i save putim wanpela kain marasin i save

mekim na switpela smel bilong dispela ol kaikai i save pulim ol pikinini na ol bikpela manmeri tu.

Dispela marasin ol i kolim vanilla.

Vanila em i kam long ol liklik sid bilong rop vanila. Dispela rop vanila em i dispela plaua yumi kolim okid. I gat planti kain kain okid. Vanila em i wanpela bilong ol. Vanila i save kamap gut long ples i gat planti ren na ples i

hat liklik. Planti lain long Rabaul i wok long planim vanila nau.

Long planim vanila yu mas kisim ol hap bilong en long bilong ol inap olsem 90 or 100 sentimita. Planim klostu long as bilong diwai lan-toro ol kain diwai olsem na bai rop vanila i gro i go antap. Taim nupela kru i go strong liklik yu mas pasim i go long as bilong diwai. Noken larim rop vanila i gro i go

antap tumas long diwai. Tanim het bilong rop i kamdaun gen na bai isi long yu long wok.

Long helpim vanila long karim plaua na dispela sid i ken gro yu yet i mas mekim long han. Sapos yu no klia askim didiman klostu long yu long soim yu.

Vanila i redi taim ol lip i tanim kamap yelo. Dispela em i samting olsem siks o nain mun bihain long plaua i kamap.

Taim vanila sid i redi pinis kisim na putim long wanpela trei na putim insait long haus inap 10-pela de bai ol

sid i dai. Nau yu kisim ol sid na putim long san inap tri aua long wan wan de. Karamapim ol sid long blanket taim ol i hat yet na putim insait long haus. Dispela bai i mekim ol vanila sid i tuhat. Mekim olsem inap 10 o 20 de olgeta

inap ol sid i kamap wel.

Bihain long dispela putim ol sid long san gen inap wan aua tasol inap yu lukim wara i kamap long ol sid ya.

Em nau yu ken sekim ol vanila sid na bringim i go salim.

Merigol bai was long gaden kaikai

PLANTI yumi i save long dispela plaua merigol em yumi save planim long bilasim ples na haus bilong yumi.

Merigol em i naispela bilas.

Dispela merigol tu i gat wanpela kain marasin i stap long en. Dispela marasin em i bilong

rausim ol dispela binatang ol i kolim nematot.

Nematot em i wanpela binatang i save kamap long rop bilogn kainkain kumu na kaikai long gaden. Em i luk olsem sik tasol i no wanpela sik. Nogat. Em i wanpela binatang i save

kaikai ol rop na rop i solap. Yu no inap lukim binatang na yu no inap lukim rop i solap sapos yu no kamautim long graun.

Sapos yu gat hevi long nematot i bagarapim gaden bilong yu, orait planim dispela plaua merigol namel long ol kaikai.



COFFEE INDUSTRY CORPORATION LTD
INDUSTRY AFFAIRS DIVISION
PRAS BROADCAST WAN WAN WIK

Weekly market prices

		DATE: 06-09-99			
SUMMARY		Serial No: 01.12.98/99			
Average prices (t/kg) as at:		06/09/99	Range	30-08-99	August
ARABICA:					
Green Bean	Y1	392	370 to 410	384	375
(Dis Lae)	Y2	NQ	NQ	NQ	NQ
	X	420	390 to 470	414	406
	A	436	410 to 540	434	423
PARCHMENT:					
	Class 1	277	220 to 300	270	257
(Factory Door)	Class 2	240	210 to 260	246	237
	Class 3	200	190 to 210	226	222
Cherry: (Factory Door)	NQ	NQ	NQ	NQ	NQ
ROBUSTA:					
Green Bean		260	- to 260	260	252
Parchment		160	130 to 150	160	158
NEW YORK "C" CLOSING 03-09-99					
Other mild Arabicas					
US cents/lb		94.9		91.55	94.4
One Kina=US\$		0.329		0.345	0.365
Toea/kg:					
Without discount/premium		635.92		585.02	570.56
With discount by 16 cents/lb		535.41		489.17	475.03
Y-grade (Gross F.O.B. Lae)* 1		535.41		489.17	475.03
Levy on [1]	2	26.00		26.00	26.00
Y-grade (Net F.O.B. Lae) 1-2		509.41		463.17	449.03
Indicative*					

MAKET TOKTOK

Fiusa prais bilong kopi long mun Septemba long Nu Yok i surik i go antap gen long 4 pesen bihain long nius i kamap olsem bai ren i pundaun long Brasil.

Hia long PNG yet, f.o.b prais i surik i go antap long 8 pesen long dispela wik bikos strong bilong PNG kina i pundaun. Ol DIS na faktori dua prais i surik i go antap long 2 pesen na 3 pesen.


Ol i bungim fiusa prais na eksens ret na kamapim FOB prais. Tasol prais bilong ol wan wan ekspota i narakain.

Prices offered at factory door t/kg

PARCHMENT RANGE

AREA	Arabica			Robust	Cherry range
	CLASS 1	CLASS 2	CLASS 3		
National	220 to 300	210-260	190-210	130 to 160	NQ
Kainantu	- to 300	NQ	NQ		NQ
Goroka	- to 300	240 to 260	NQ		NQ
Kundiawa	NQ	NQ	NQ		NQ
Minz/Banz	270 to 280	- to 260	NQ		NQ
Mt Hagen	NQ	NQ	NQ		NQ
Wapenamanda	NQ	NQ	NQ		NQ
Lae	- to 250	- to 230	- to 210	NQ	
Aseki	- to 230	- to 210	- to 190	NQ	
Mumeng	NQ	NQ	NQ	NQ	
Wau/Bulolo	NQ	NQ	NQ	NQ	
Port Moresby	- to 220	NQ	NQ	NQ	
Madang	NQ	NQ	NQ	NQ	
East Sepik				130 to 160	

1. CIC Ltd-Indastri Afeas Divisin i save bihainim dispela mak long putim aut Maket Prais olgeta wik.
2. Eksens Reit: Mande US Dola T/T mak bilong mani egens Kina long PNGBC.
3. 1kg. = 2.20462 lb.
4. Prais bilong kopi long dispela wik ikam long prais bilong olgeta espota na prosesa long Mande wantaim prais bilong ol fiusa prais long las Fraide.
5. Long kisim moa toksave long dispela, askim Indastri Afeas bilong CIC long telepon namba 732 1266.



• Ol bikman bilong Manus na Sentrel Beng Gavana Wilson Kamit i bin opim nupela Manus seavings na lon sosaiti long Lorengau taun las mun.

Manus Seavings na Lon Sosaiti i op

NUPELA Seving na Lon Sosaiti i kamap pinis long Lorengau Manus provins long las mun. Dispela em ol i kolim Manus Seavings na Lon Sosaiti Limited.

Interim siaman bilong sosaiti Ben Poudrein i tok Manus provins i gat planti wok bisnis i stap long kirap strong. Tasol planti bikpela beng olsem Westpac na PNGBC i no luk-sava long dispela na i no wok strong long i stap na kirapim bisnis long provins.

Misat Poudrein i tok Westpac beng i bin wok long hap tasol bihain ol i pasim beng bikos ol i tok i nogat inap bisnis long provins.

PNGBC beng, beng bilong Papua Niugini stret i bin go wok long hap, tasol tude ol i daunim na kamap olsem sab brens tasol.

Wanpela bikpela kampani em Papindo tasol i bin go opim bikpela supamaketa stua bilong em long provins. Paia i kukim stua bilong em tasol em ino kirap na i go. Em i stap yet na strongim wok bilong em bikos em i bilip i gat bisnis long Manus provins.

Mista Poudrein i tok planti bikpela saplai olsem rais, bia na ol kaikai bilong stua i save go long Manus na i save pinis. Dispela i soim olsem i gat mani long Manus provins.

Em i tok ol nupela bisnis projek na ol wok i kamap na i kamapim planti mani nau long han bilong ol manmeri bilong ples.

Em i tok bikos ol manmeri i save laik kisim liklik dinau mani bilong helpim o kirapim ol liklik wok bisnis, ol beng na fainens opis i no stap long helpim ol manmeri. Olsem na kamap bilong dispela Manus Seavings na Lon Sosaiti em bilong sapatim na strongim dispela tingting bilong helpim ol manmeri long kisim, helpim long mekim wankain liklik bisnis projek ol i laik mekim.

Mista Poudrein i tok nau dispela opis i op, em i askim olgeta manmeri bilong Manus provins long lukim dispela olsem wanpela fainens opis bilong ol yet. Na long mekim ol i kamap memba na kisim helpim, ol i mas sevim liklik mani long dispela opis inap em i groa long helpim ol wantaim liklik wok bilong ol

long bihain taim. Ol manmeri i no ken lukim dispela seving bilong ol na kam rausim nating nating long wanem kain plen we ol i kirap nogut long en, em i tok. Wanem wok ol i bilip tru bai i wok orait ol i ken go kisim helpim em i tok.

Taim long bekim bek dinau, ol i mas bihainim lo bikos ol i mas tingim olsem arapela lain bilong ol tu i wok long wetim mani bilong kisim na mekim wok wantaim.

Em i tok dispela Manus Seving na Lon Sosaiti i no olsem beng we bai yu putim mani long pot-nait Fraide na i go bek rausim long Mande. Dispela mani ol manmeri i putim olsem seavings bai i stap inap em i bikpela na ol manmeri i ken kisim long kamapim ol gutpela liklik wok bisnis na projek bilong helpim ol na famili bilong ol insait long komyuniti.

Manus Gavana Steven Pokawin wantaim Gavana bilong Sentrel Beng long Papua Niugini Wilson Kamit i bin kamap long witness na opim dispela Seavings na Lon Sosaiti bilong Manus provins.

K1 CAN



**Pay K1
tasol**

SAPOS OL SASIM MOA
GO LONG NARAPELA STOA

KANAGE



Meri bilong Kanage i go waswas long batrum i stap na em lukim win i blowim ol kolos long lain na em lukim wanpela stail bra bilong em i hangamap long lain. Em i tingim long werim dispela bra taim em i pinis waswas. Olsem na em singaut long lapun Kanage, "lapun samting nogut, inap yu rausim blupela bra bilong mi long lain na kisim i kam givim mi?". Kanage belhat na bikmaus i go bek, "dispela pipia samting ya, yu laik salim mi long kisim a, em bai hat ya". Misis Kanage belhat na bikmaus i go bek, "rausim bra long lain em yu hat tru long rausim, tasol long rausim bra long skin bilong mi em yu bai kilim skin tru long rausim." Lapun Kanage nogat toktok na sem pipia tru na hait insait tasol long haus.

Masta Wai Mosbi

Kanage raun raun long Vanimo taun na lukim wanpela naispela meri tru na em igo klostu na askim em, "bai i gat oh?". Na meri Vanimo i kirap na tokim Kanage, "go na kalap long doti wara bilong Sepik". Kanage harim na bekim, "em orait, samting tru bilong ol wokman, mipela ol das manki bilong ples i askim tasol".

Junia Nakot Lae

Kanage i ronim spit bot na kisim ol waitman turis i go long wara Sepik. Taim ol i ron i go Kanage i lukim ol waitman i smok olsem na em tromoi hap tok Inglis i go long ol waitman ya, "hey wait as, one cigarette flying over here". Ol waitman i lap tasol na givim em wanpela lus smok. Tasol Kanage i nogat masin long laitim smok olsem na em singaut gen, "hey wait as, otherwise the masis tu flying over here". Taim ol waitman i harim olsem ol i no moa toktok. Wanpela waitman i kirap na askim Kanage, "midnight devil, how far is it from here to Tambunum lodge?". Na Kanage bekim, "only 2 metres". Ol waitman i harim na skin les long toktok moa long Kanage.

Malcom Limbai Wewak

Kanage i wok olsem supavaisa na em i bungim olgeta meri na toktok long ol long sait bilong wok. Taim i wok long toktok i stap, wanpela wanwok bilong Kanage i kam long beksait na mekim eksen long Kanage olsem jipa bilong trausis i lus. Kanage lukim eksen bilong pren bilong em pinis olsem na isi tasol em tanim na givim beksait long ol meri na toktok long ol long wok istap. Han bilong Kanage i go daun na stat long pilim jipa tasol samting tru em jipa i no lus. Taim ol meri i lukim olsem Kanage i givim beksait long ol na han bilong em i go daun long jipa, ol i pret na stat lus wanwan. Kanage i toktok yet i go na em i laik tanim bek long pesim ol meri ya nogat, nogat meri i stap. Kanage belhat nogut tru long dispela poroman blong em i bin giaman em long jipa i lus.

Jeffery Nara Kimbe

Kanage em draiva bilong distrik opis long Bulolo. Wanpela taim em draivim ka na i ron i go daun long Bulolo maket. Tupela lapun bilong Buang i lukim ka na askim Kanage long kisim tupela i go lusim long Siapan. Kanage tok orait em tokim tupela, "yutupela go ap hariap. Go ap antap long taia." Taim tupela lapun harim olsem ol i sem nogut tru long dispela toktok tasol tupela pasim ai na kalap antap long ka. Taim Kanage i laik tekov, em i singaut gen



long tupela lapun, "yutupela holim pas, ka bai ron nau." Taim tupela lapun harim olsem tupela pret olgeta. Olgeta manmeri long Bulolo maket i harim na ol i kilim skin tru long lap indai.

Jacob Allan Wewak

Kanage bilong Sepik na em wok long Bialla. Wanpela potnait na em i tokim olgeta wanwok bilong em olsem em bai wokim liklik kaikai olsem na ol i mas kam na kaikai. Taim olgeta wanwok i kisim potnait pinis, ol i go long haus bilong Kanage na wet i stap. Nogat kaikai i redi na ol sindaun wet yet. Taim misis bilong Kanage i lukim wanwok bilong Kanage i sindaun longpela taim, em i askim ol, yupela wetim wanem samting. Na ol wanwok i tok, Kanage i tok nau bai em i kuk na givim long mipela olsem na mipela i kam. Taim misis i harim olsem em tokim ol, dispela sik mental man ya giaman ya. Em i go insait long haus na askim Kanage, yu redim kaikai we na yu singautim ol wanwok bilong yu i kam?. Isi tasol Kanage go long kabot na kisim wanpela plastik kodiell na go givim ol i dring na go nabaut. Kanage save olsem bai misis i kukim em long paia olsem na em tu i lus nating wantaim ol wanwok bilong em.

Peter Yauk Bialla

Wanpela taim misis Kanage i askim Kanage, "yu bin go pinis long Pot Mosbi?". Na Kanage tok, yes taim yu nogat susu yet em mi save stap long Mosbi na brukim ol botol nabaut long rot. Nau yu lukim olgeta man i save brukim botol long rot em ol i kisim pasin bilong mi. Misis Kanage kirap na tok, ating yu mas nogat wok na yu save brukim ol botol ya. Tasol Kanage tok, nogat, long nait mi save go wok na long san mi save brukim ol botol long rot. Misis Kanage skelim dispela toktok na tok, mi save olsem tru tru yu mas wanpela raskol man ya bikos yu save raun stil long nait na long san taim yu save dring spak na brukim botol nabaut long rot. Kanage harim na nogat toktok moa long bekim.

Justin Maisam Kimbe

Kanage i go raun long Tonga na wanpela taim em i go lukluk long nambis. Em raun i go na lukim wanpela pilai we ol Tonga i save swim long solwara we i gat ol bikpela sak long em. Sapos man i swim i go long hap sait na sak i no kaikai em, bai em i kisim bikpela prais tru. Kanage i go sanap lukluk i go na kirap nogut em pundaun i go daun long dispela solwara. Taim em pilim solwara, em taitim bun tru na swim i go

kamap long hapsait bilong solwara na ol sak i no kaikaim em. Ol bikman bilong dispela pilai i ron i go lukim ya, Kanage i slip long wasan wantaim longpela taim trausis na siot i stap. Ol opisel i go na tokim Kanage, nau yu winim dispela bikpela prais. Tasol Kanage i kirap na tok, mi no laikim prais, mi laik save husat man tru i pusim mi go daun long solwara. Sore, manki PNG karim longlong belhat i go wantaim long ovasis ya. Bai yu tok wanem.

James Nika Mosbi

Kanage i go spai long ol meri Makam i waswas long raun wara. Em sanap luk stil i stap na graun em sanap long en i bruk na Kanage pundaun i go daun long raun wara stret namel long ol meri. Isi tasol Kanage pulim gut win pinis, em lukluk i go antap long ples we em i hait long en na em singaut i go antap, "yu maski long pusim man, yu laik pait, pait stret long han." Taim ol meri i laik lukluk i go antap, Kanage i lus pinis long dispela hap.

Noel Martin Lae

Kanage i kalap long sip na i laik go long Kimbe. Antap long sip Kanage i lukim wanpela meri Mendi i kam na ai bilong Kanage i pas long em. Kanage kirap na tokim meri Mendi ya, "yu karim ya". Taim meri Mendi harim olsem em bekim long Kanage, "yu lukim wanem hap bilong mi i karim orait yu kam na putim tit bilong yu long en." Kanage harim na bekim, "mi gat bebi tit ya, sapos mi gat tit bilong ol bikman, bai mi brukim olgeta bun bilong yu tu wantaim i go liklik". Olgeta manmeri antap long sip i harim na ol i lap nogut tru na meri Mendi i sem nogut tru na igo hait insait long sip.

John Dama Kimbe

Kanage wantaim ol boi i go painim abus long bus tasol ol ino painim wanpela abus i go tudak. Olsem na ol i slip long bus. Kanage em ting em hapman olsem na em i go antap long diwai na sindaun long han bilong wanpela diwai na slip. Tasol han bilong diwai i bruk na Kanage i pundaun. Wantu tasol han bilong Kanage i hukum wanpela han bilong diwai na em hangamap. Em pret long pundaun long graun olsem na em hangamap igo tulait olgeta. Taim em opim ai na lukluk i go daun, oloman graun i no longwe long em. Em i hangamap olsem 1 mita antap long graun i go tulait. Taim ol boi i lukim Kanage i hangamap olsem bilak bokis i go tulait, ol i lap indai nogut tru.

Fabian Aikuru Kiunga

Kanage em ambulens draiva long Minj haus sik. Wanpela taim wanpela yangpela meri nes i laik go long haus na Kanage i kisim em long ambulens long go lusim em. Meri ya i smatpela meri tu na bel bilong Kanage i kalap tru long meri ya. Taim tupela i ron long rot i go, Kanage i laik senisim gia na han bilong em aburis na pulim dres bilong meri ya. Kanage i lukim na em i pret tasol meri ya i no toktok o kros. Tupela i ron i go gen na Kanage i laik senisim gia na han i abrus na pulim dres bilong meri ya gen. Em nau Kanage i pret nogut meri ya bai i kros. Tasol meri nes ya i kirap na tok, Mathew 7:7. Kanage i harim dispela na em pret nogut em i brukim sampela bikpela lo bilong baibel. Olsem na em i go lusim meri nes ya long haus na em i go bek long haus na sekim baibel bilong em. Na baibel i tok, askim na bai yu kisim. Taim Kanage i lukim olsem, klostu em katim finga bilong em. Em i laik traime lak gen tasol tuleit, meri nes ya i trensfea i go long Hagen haus sik.

Michhail K Hagen

Lapun Kanage bilong Enga na wanpela taim em i go long salim suga ken long maket. Em maket i stap na wanpela tisa bilong Sepik i kam na lukim lapun Kanage na em tok, "moning tru, lapun, suga amamas?". Kanage harim na em bel hat nogut tru bikos em i ting tisa ya i tok nogut long em. Olsem na Kanage bekim long tokples na i tok olsem, "suga ya mi no stilim ya, mi planim na kam salim. Yu ting man nogut tru ah, yu kam kaikai as bilong mi". Ol arapela Enga manmeri i sindaun klostu ol i harim na ol i lap nogut tru.

Sackie Sakar Boroko

Kanage wantaim ol lain bilong em i go long Kainantu bikos wanpela famili bilong ol i dai long hap. Ol i go kamap na ples i pulap tru long planti manmeri. Kanage wantaim ol lain bilong em i go sindaun na mekim save long krai i stap na wanpela meri long Kainantu i krai i go na lukim ol lain bilong Kanage na em i bikmaus. "Ol dispela lain ya em ol ino krai tru tru. Ol i giaman long karim lek bilong pik na i go bek long ples bilong ol na kaikai." Taim Kanage na ol lain bilong em i harim dispela, ol i kisim bikpela sem nogut tru na ol i lus nating long dispela hap bilong haus krai.

Max Megume Kokopo

KANAGE



Wanpela taim Kanage i go danis long Vanimo hotel. Long dispela taim em disko nait bilong ol meri tasol. Ol i kolim ledis nait. Kanage spak wantaim i go na lukim tupela meri yet i danis olsem na em i go na tokim tupela, "hei ledis, can I make it man to meri?". Tupela meri i tanim lukluk strong long Kanage pinis na ol tokim em, "yu dring bia o karasin, tonight is ledis nait". Kanage harim na tok, mi save tasol meri danis wantaim meri bai yu kisim wanem kain filings ya, filings tru tru bilong ol man na meri i stap, come on, make it with me." Tupela meri ya i kirap tokim sekyuriti na sigi lek han long Kanage na tromoi em i go ausait long disko ples.

Stacey Joe Vanimo

Kanage i kisim ka bilong wok na ron long rot i go na bos i painim wetim Kanage longpela taim i go nogat na em singaut long redio. "beis koling Kanage". Kanage harim na singaut bek long redio. "Kanage recieving, please sent". Bos askim gen, location please?. Na Kanage bekim, "localisation 30 kilometres along that road". Taim bos harim em paul olgeta. Samting tru em Kanage lukim 30 Km/hr sain long sait bilong rot na em i ting em i ron 30 kilomita ples.

Andrew Marlora Moro

Kanage i go bekim hos long Melbon Kap resis. Em betim K200 long Alfa, wanpela hos. Tasol taim hos bilong Kanage i no win, Kanage bel hat nogut tru bikos em i lusim bikipela mani. Em belhat tasol na bikmaus i go long hos reis lain olsem, rausim hos reis na putim bingo bilong mipela ol PNG stret na mipela bai pilai. Ol lain long hos reis ples i lap indai tru long Kanage.

Vicky Konzie Wewak

Kanage save ekting Tolai tasol samting tru em strongpela kaving bilong Sepik doti wara. Wanpela taim Kanage kaikai buai na sanap stailim long Rabaul maket. Em sanap i stap na lukim wanpela bikman Tolai i kaikai buai pinis na i go spet long rabis dram na tok, yauro. Taim Kanage harim olsem, em tu wokabaut i go long dispela rabis dram na spetim buai. Em i laik tok yauro na abrus em tok, yalo. Sori tru Kanage, maski ekting yauro.

Sonny Sakua Madang

Kanage wantaim poroman bilong em raun long Ambunti ples balus na bungim planti ol waitman turis i raun i kam. Tupela raun igo long kona liklik na lukim tupela lapun waitman i kisim poto i stap. Em nau tupela waitman ya i askim Kanage na poro olsem, "hey, have you seen some whiteman going down there?". Em nau Kanage na pren bilong em nogat toktok na tingting i stap tasol Kanage i laik so op olsem na em bekim, "yes, planti waitman going somewhere there." Tupela lapun waitman ya i paul i stap na Kanage wantaim poro bilong em i lus long hap.

Gilbert Munja Ambunti

Kanage bilong Kerema na em pilai ragbi union wantaim wanpela klap. Ol i pilai long wiken egensim wanpela strongpela tim. Em nau Kanage i gat sans wantaim bai na em tekov stret long winga na abrusim olgeta man na i go kamap long trai lain bilong narapela lain ya na fulbek bilong

narapela tim ya i givim siksti na i kam. Taim em i holim Kanage, em wilwilim Kanage long win na tromoi Kanage kam daun kisim taim i stap. Em singaut long wara boi i kam na putim wara. Taim wara boi i putim wara long nek bilong Kanage, em bikmaus na tok, lau, lau, lot here. here, yu loti foi. Em poinim long lek bilong em. Em nau wara boi putim wara long lek bilong Kanage bikos lek i bruk.

Gilbert Munja Ambunti

Lapun Kanage em i save i stap long Kokopo Is Niu Briten provins. Wanpela taim em tingting long i go long ples olsem na em i go baim tiket bilong sip. Na em i wetim sip long bris i stap i go i go. Na poro bilong em i kam na tokim em olsem poro yu harim tu long sip em i go pas antap pinis long rip long Goroka! Man poro bilong em giamanim em nau na em i go na tokim ol manmeri. Yumi i no inap i go long Lae nau sip em i pas antap pinis long rip long Goroka. Taim em i tokim ol olsem ol i kilim skin stret long lap long em.

Jacob Joe Kimbe

Kanage em bilong Gembolg distrik, Kundiawa, Simbu provins. Em wok wantaim Is Wes Kampani long Goroka em i save draivim bikipela ka bilong Is Wes. Wanpela taim em i go long Simbu na em i lukim ol meri Simbu na papa Kanage em i lusim tingting tru long brek bilong ka na ka bilong em i ron olsem smok balus stret. Ol manmeri i tok. Em i no draivim em mas pailot tru ya. Draiva i no bisi taim ol manmeri tokim mas pailot tru ya. Kanage harim liklik olsem em ting em i stap pinis long klaut. Na em i gat ai pilings tru. So op bilong em i no isi. Wanpela Fraide apinun lapun Kanage i go long Kundiawa taun na em i dropim Kago long Collins ol i stap na 2-pela rasta stret i lukluk i go long Kanage na tok dispela draiva draiv bilong em olsem smuk balus ya. Em fit man tru ya taim Kanage ap ai liklik na em lukim 2-pela meri Kuman tok olsem Kanage hariap tru i go klostu long 2-pela meri ya na tu apinun tupela leva yu tupela i kam go we. Na 2-pela meri ya tok nogat mi tupela i kam nau tasol long taun yu orait. Kanage harim olsem 2-pela meri Kiman tok yu orait papa Kanage i kirap na tok olgeta hap mi raun mi no save orait tasol nau tasol mi orait tru. Taim Kanage i tok olsem man bilong 2-pela meri ya kam paitim Kanage nogut ten na trangu Kanage i kisim taim nogut tru. Na em werim sais 28 trausis na hangamap long Barrawagi haus kalabus na kra i stap.

Francis Wapia Goroka

Kanage bilong Mape, Finsafen Morobe

Lapun Kanage na lapun meri wantaim 16 yia boi ol save i stap wantaim long ples. Wanpela taim lapun Kanage kisim MV Geamsao na tekov long Lae, em i bin i stap long Lae 2 mun, na kisim MV Gamsao na sua long Buki wof. Na em i kisim Gembung seket ka na tekov long ples. Taim lapun Kanage kamap long haus, lapun meri bilong em stori long em olsem dispela pikinini boi ya em i no save sindaun isi em i save raun raun na i no save helpim mi. Na lapun meri bilong Kanage tok olgeta tok mi toktok tasol dispela pikinini i no save harim toktok liklik. Wanem kain tokples bai mi tupela tokim em. Mi tupela tokim em na em i no harim. Na lapun meri tok ating bai mi tupela tokpisin long em. Ating bai em harim tok, olsem na lapun meri tokim lapun Kanage na tok yu go long Lae na yu save long tokpisin orait yu tokim em nau. Oyo lapun Kanage em i so op nogut tru olsem em save long tokpisin nau hariap tru singautim pikinini boi bilong tupela i kam sindaun klostu long lek bilong papa Kanage na hariap tru lapun Kanage i so op olsem em i save tokpisin na givim toktok nau, na tokim boi ya olsem, sindaun isi nogat raun raun planti les mipela polis harim yu em nau lapun meri i smail nogut tru na tok em stret tokim em olsem na em i ken harim tok. Na lapun meri i kirap i go na kis long lapun Kanage na tok olsem nau bai pikinini bai harim. Tasol pikinini i harim olsem lapun Kanage i paulim tokpisin olsem na em i harim toktok em i bikmaus na lap nogut tru long tupela.

Silveng b. Miafe Finsafen

Kanage bilong, Madang provins. Ol lain bilong Kanage i salim Kanage long go baim Steak & Onion long stoa na ol givim mani long em na em i go, taim em go kamap long stoa em go insait na givim mani long stoakipa na em tok mi laik baim panal, em laik tok Steak & Onion ya em wok long kirap na tok panal, panal stoakipa harim nu word na em paul na wok long askim Kanage wanem samting em panal. Tasol Kanage kirap na wok long tok panal yet i stap stoakipa kirap go tasol em makim olgeta samting antap long selp ya tasol Kanage wok long tok panal yet stoakipa kirap gen na em go makim ol samting antap long selp, em makim go na em kam makim Steak & Onion na Kanage kirap na tok em tasol stoakipa lap i go na em kirap tokim Kanage olsem dispela ol save kolim Steak & Onion i no panal. Kanage kisim tasol em tok Steak & Onion, Steak & Onion yet na wokabaut go long haus bilong em. Yupela save Kanage em manki bilong ples ya em i no bin skul tu, em tasol.

H. M Easli Boii II Madang

Kanage bilong KRX Ailan, Madang.

Wanpela taim long Sarere ol lain bilong Kanage i laik dring ti tasol, ti em nogat milk olsem na ol i givim mani long Kanage long go long stoa long taim liklik milk. Taim em kamap long stoa pinis em baim Milk na em laik go bek long haus, taim em go bek long rot yet, em lukim wanpela mama pik wantaim bebi pik long rot. Taim Kanage lukim bebi wantaim mama pik tasol em kirap painim go nogat na em lukim Milk long han bilong em. Em kirap tasol mistim bebi pik long Milk tin na Milk go hait insait long gras, tasol gras longpela gras tu, lonmower katim na gras em sot. Kanage kirap tasol em stat long painim lidil Milk nau em painim, painim i go nogat na em wokabaut i go long kisim grasnaip, em go kam tasol na ol lain bilong em long haus askim em milk we. Kanage kirap tasol em tok mi mistim long bebi pik na hait insait long gras: Em kisim grasnaip tasol na em go stat long katim ol sot gras na i stap, brata bilong bihainim em i go tasol na lukim milk em stap ples klia na em kisim na em no toksave long Kanage tu em kisim tasol na kam long haus. Kanage painim i go tuhat kilim em wansait em bel lusim na kam long haus. Ol lain long haus lukim Kanage tasol ol i no isi isi long lap, klostu ol laik kilim taim bilong lap tasol ol stopim.

H.M K2 KRX Madang

Kanage aste apinun Kanage em raun long Pirimo maket na grisim wanpela meri Bombox olsem nait em wantaim ol bois bilong em bai tanim het. Dispela meri Bombox i tok orait na em i go. Klostu laik tudak long em Kanage i tokim olgeta yangpela bois olsem nait bai yumi go tanim het. Kanage go long haus bilong em na kaikai planti tru. Em save olsem nait em bai hangre. Em tudak pinis na olgeta bois ol i kam na ol i go. Mama bilong meri wantaim sampela lain, ol i mekim paia na wait i stap. Kanage i go kamap na salim gut nait bilong em i go insait. Meri i sori olsem ol i kam na em i sindaun na redi. Mama i go opim dua na ol i go insait, tanim beksait long meri na sindaun. Kanage i go sindaun klostu long meri. Tripela singsing i go pinis na Kanage i bagarap tru long kabubu. Em i save olsem sapos em go ausait na kam insait gen, em nogat sans long sindaun wantaim meri gen. Foapela singsing long em, meri i laik mekim sampela pani wantaim Kanage na em i paitim Kanage long beksait bilong em. Kanage i kalap na kabubu i suit nating na kilim paia idai. Mama bilong meri i paul na meri Bombox i sem nogut tru. Kanage kirap na tok. Meri poro, samting yu laikim long em ya. Noken sem." Meri i belhat nogut tru na kirap go long mama bilong em. Ol bois i sem tu na lusim Kanage na kam pinis.

Sky Hook K. Simbu



Noken bagarapim Peris Pris bilong Utai

Mi wanela mangi Utai nem bilong mi Florian Omie asples mangi Sumui Utai, Amanab distrik Vanimo Sandaun Provins PNG boda.

Mi laik autim ol bel hevi bilong mi igo long dispela man Aye Ayo, brata mi laikim askim stret yu bilong wanem hap o wanem liklik ples insait long Utai Peris. Sapos yu bilong Utai Peris na bilong wanem yu mekim dispela kain tok-tok igo long Peris Pris bilong Utai, brata mi mangi asples Utai Sumui

Kauntri tasol nau mi stap hia long Madang mi lukim dispela komplem bilong yu Aye Ayo na mi no amamas bikos yu bagarapim gut nem bilong Peris Pris bilong mi.

Ating bilip bilong yu mi save olsem yu save hangamap tasol o tingting bilong yu olsem wel dok isave painim pikinini pik pulap long laus, watpo na yu komplem igo long Wantok Niuspepa sapos yu gat dispela hevi stap wantaim yu orait yu mas komplem bilong yu long taim bilong peris miting sapos

yu man tru.

Na yu stap long wanem mision plis no ken mekim dispela toktok gen mi save pinis yu dispela boi plis no ken mekim moa. Tenkyu mi stap hia long Madang sapos yu brata o susa i laik egensim mi o sapatim rait tasol long Wantok Niuspepa bai mi lukim. Yu yet laik egensim mi em orait.

**Florian Omie
Sagala Service Station
Madang**

Wokim boda haiwe long Vanimo, Amanab na Grin Riva

Mi wanela manki Utai, Amanab distrik insait yet long Vanimo Sandaun Provins, tasol nau mi stap long Madang provins. Mi laik autim komplem o wari bilong mi igo stret long memba bilong. Vanimo Grin Riva Mista Micah Wes na Gavana bilong Sandaun John Tekwei, olsem, plis noken ai pas na stap. Opim ai nau na wokim o lukluk long boda haiwe, dispela haiwe em ino bilong nau em bilong bipo istap yet.

Wanem taim bai memba bilong Vanimo Grin Riva lukluk na wokim o stretim dispela rot. Ating yupela i save krai tasol long pawa a? na pasin, stail, living ol lain pipel istap long en bai i olsem wanem trangu ol lain hia i tok na yu kamap memba.

Sapos nogat yu tu bai wankain olsem ol. So mi laik pasim komplem bilong haiwe igo long Vanimo Grin open memba, yu mas toktok na putim sampela mani go insait

long Woks dipatman long Vanimo na bai ol i wokim dispela boda haiwe.

Na tu dispela rot em bikpela samting yu mas luksave insait long ol distrik na provins i gat bikpela wok bai difens wantaim ol polis i ken stopim wanem hevi kamap long boda lain, sapos nogat em isi tru ol birua bilong wanela kantri i ken kam bagarapim ol manmeri husat stap klostu long boda lain.

Em dispela hevi planti taim i save kamap yupela i save pinis, ino nau em longtaim i kamap pinis long Vanimo. Olsem na mi laikim, plis wokim boda haiwe Vanimo, Amanab na Grin Riva. Ating em tasol komplem bilong mi, yu husat brata o susa i laik sapatim o egensim em orait tasol, rait igo long Wantok Niuspepa na bai mi ken lukim.

**Florian Omie
Madang**

Ai na yau bilong memba i pas

Mi yet mi wanela ruts manki na harim bilong mi long radio na lukluk bilong mi long niuspepa mi lukim olsem planti pipel bilong PNG i tok long senisim gavman.

Long hia mi laik tok olsem pipel i makim yupela ol memba na givim yupela pepa long go long palamen yupela ol memba i harim wari bilong ol pipel o yupela tingim bel bilong yupela yet.

Kain pasin we Chris Haiveta i mekim. Yu pikinini man yu mas save Bill Skate i bin rausim yu long gavman. Yu nogat sem bilong yu long joinim gavman bilong em.

Ino Chris Haiveta tasol, planti bilong yupela ol memba ino harim singaut bilong pipel bilong PNG bilong senisim Skate gavman na yupela i kamap meri bilong Skate yet. Em rausim yupela, yupela laikim em yet.

Mi laik sapatim pas bilong Tonny Goipek long walume insait long lalibu. Husat itok long senisim Skate Gavman. Jun 17 1999.

Mi yet tu laikim dispela na wanbel long gavman imas senis.

Mi laikim wanela yangpela lida olsem John Pundari i ken go pas na papa bilong PNG Somare i ken kam baksait long em.

Tenkyu.

**Jacob David Lapo
Kagua
SHP**



• Rait manki! Stail manki Manus ya i kalap na sakim bodi long bikpela bung bilong ol ovasis palamen lain long Mosbi las mun.

Ol eks-pater mas lusim olgeta nem pater

Mi wanela boi nau i stap long Is Sepik Provins. Mi laik autim bel hevi bilong mi igo long olgeta manmeri long PNG.

Planti taim mi save stap na harim olsem ol misinari i wok long pilai politik o sanap long eleksen long resis. Mi save olsem long gavman bilong mipela bilong tude igat sampela tu istap insait pinis. Plis mi laik nau apil long olgeta wok manmeri bilong mision insait long kauntri. Plis sapos yu sanap o winim wanela sia na stap insait long politik plis mi laik yu mas lusim o rausim ol dispela nem o taitel we yu bin holim pinis long bipo taim olsem, Pater, Sister, Brata, Pastor na planti moa ol arapela taitel bilong ol sios. Bikos mi ting olsem wok mission em ino save wok bung wantaim politik. Planti taim mi save lukim na harim olsem gavman em isave paul paul nambaut.

Em tasol liklik belhevi bilong mi o sapos yu husat manmeri i laik sapatim o egensim em yu yet nau.

**Ambrose Wangi
Angoram High School
Wewak, ESP**

Tingim papa na mama long ples

Mi wanela ples meri long Wiru Taru insait long Pangia.

Mi laik toktok wantaim ol save manmeri. Yupela harim, taim ol i karim yu na fidim yu long sampela yia taim yu stap pikinini.

Na bihain ol i salim yu go long skul na ol bikpela skul, yu ting papamama ino belhevi na ran na ol i kaikai gut ran a? Taim ol i painim skul fi. Nau yu go stap long opis na kism sevis stap yu no tingim gut papamama. Long 7 yia mi lukim ol papamama i save tok mi nogat mani na klos, mi no slip gut long gutpela haus, na ol isave grisim mani na ol pik taim ol i laik mekim moka o baim kot samting.

Olsem na plis ol savemanmeri long Wiru Taru yupela imas wokim haus kapa bilong ol papamama.

Baim ol gutpela klos. Pulapim mani long poket bilong ol larim ol i lukim ol taun na siti.

Noken tingim dispela meri stap long haus bilong yu. Sapos yu dai bai em igo maritim narapela man gen so ting bek long papamama.

Yu noken yusim mani long ol rabis pasin olsem bingo, kas, danis, buai smok, pamuk, bia mariwana.

**Lopai Prisila Ken
Marali Village
Wiru Taru
SHP**

Kopi baiyas ino rispektim grasruts

Mi wanela yangpela boi bilong Isten Hailans distrik. Maski mi ino mani man tu, mi tu sem olsem ol grasruts tu tasol mi save bel bruk na sore stret long lukim na harim olsem ol salim bikpela kopi na kism liklik mani.

Trangu, ol dispela manmeri o pikinini i save kilim skin stret long lukautim kofi, pikim karim i kam long haus, brukim long masin bilong ol yet o narapela man. Sapos em bilong narapela man em ol i save baim long brukim kofi long ol.

Bihain bai ol drain na karim i kam long taun, tasol antap long dispela em ol draia bai rausim 10t long olgeta kilo so em minim olsem sapos kofi bilong yu em weim olsem 60kg em bai ol rausim K6.00. Em orait nogat rong long ol draia i rausim long ka bikos ka nidim spea pats.

Poin bilong mi em igo stret long o kofi baiyas. Planti taim mi save harim olsem ol baiyas i save paulim ol trangu taim ol skelim kofi bilong ol.

Ol kofi baiyas i save kamap olsemeri ol faktori bilong Japan. Ol i

save gut tru long tokim skel bilong ol long stop long wanem hap na man skel tu bai bihainim stret! Sampela taim bai ol rivesim skel bilong ol na em bai hap kilo o 1 kilo late. Bihain long apinun ol i save kism mani long ol dispela kilo ol katim daun long em.

Mi bilip olsem dispela pasin em rong olgeta. Em tru ol trangu i kism gutpela sevis long yupela tasol givim sevis long honas na rait wei na maski trik nambaut. Taim ol trangu i kam wantaim kofi yu givim tru mani bilong ol na yu kism tru tru kofi bilong yu.

Sapos yu husat laik sapatim o egensim yu rait tasol long Wantok.

**O. Sparky (Gendimafi)
Buka**

Sapos yu laik salim ol pas bilong yu i kam long dispela niuspepa. Salim i kam long dispela adres:
THE EDITOR
WANTOK NEWSPAPER
PO BOX 1982,
BOROKO, NCD.

Yupela mas kolim Barupu Lagoon, noken kolim Sissano Lagoon

Mi laik bekim pas bilong brata Moses Moti i bin kamap long Wantok Niuspepa long Mei 13. Brata yu tok long noken rausim nem Sissano! brata 1907 dispela taim em taim bilong pait yet.

Na sapos yu stap long dispela taim, ol Barupu i kilim yu Sissano pinis. Brata dispela taim long 1907 em ples Barupu i bin sing i go daun. Na em i kamap Lagoon na nau yu ting olsem em lagoon bilong yu? Brata bipo long 1907 na bihain long 1907.

Yutupela papa bilong yu, yutupela i stap long we long dispela taim. Brata noken putim nating noring, long kolim Sissano Lagoon. Brata yu harim gut, nem Sissano Lagoon, em ol mission i putim long ples balus i bin stap, olsem na ol i kolim dispela nem long em. Na sapos nogat ples balus, yu ting bai ol i putim Lagoon long nem Sissano.

Mi tokim yu stret em bai nogat tru. Na yu tok long grille meri, grille meri i kam na kamapim Sissano.

Olsem na long Sissano, i gat strongpela skin olsem skaipis, na planti grille long ples Sissano. Brata! "yu laki" ol mission i kam pinis, na yu surik surik i kam long hol bilong ston o long bus, nau na yu stap wantaim mi, sapos! "nogat" yu dai pinis.

Brata yu mas save, taim bilong ol Jerman, em taim bilong pait yet, na sapos yu stap long dispela taim, mi save yu dai pinis.

Mi tokim yu pasim maus bilong yu, na stap isi mi tokim yu, sapos yu karim papa bilong yu, orait bai mi harim yu.

Na sapos papa i karim yu, em yu wara tumas long toktok wantaim mi. Het bilong yu olsem ol pikinini dring susu yet. Olsem na yu paul yet long toktok.

Husat laik sapatim-mi o egensim mi. Rait tasol long Wantok na tenkyu.

**Gabriel Antei
Aitape Wes Kos
Barupu Sandaun Provins**

Ol Hailans meri tingim papamama


Mi wanela 35 yia man bilong las Wiru Pangia Sauten Hailans provins. Mi laik toktok liklik long Hailans meri ino save tingim papamama. Plis ol yangpela meri long Hailans, yupela mas yusim het bilong yupela long tingim bek ol papamama i bin hat wok long yu long 15 tu 18 yias long lukautim yu. Taim mama i laik karim yu em i karim bikpela pen. Taim yu tasim graun em bin stretim het bilong yu na katim bel baten na drain yu long san na fidim yu igo inap ol yias mi raitim antap. Sapos yu save meri plis, sevim papamama gut long olgeta foitnait taim. Na yu ples meri plis, stap bek long ples na helpim ol long wok stap na bai ol man i ken lukim gutpela pasin bilong yu bai oraitim ol sampela yangpela man long maritim yu. Noken kalap kalap olsem ol pamuk meri na ranawe igo long haus bilong man na nogat pe.

Ol ino peim yu o yu dai witaut pei, bai papamama na ol wan haus na viles bai igat trabel na belhevi moa yet. Olsem na plis yusim het bilong yupela.

**Richard Wina Yamu
Marapini Village
Last Wiru Pangia
SHP**

WANTOK

Askim long klasifaid ads: Miri Aiori Ext. 214, John lagata Ext. 218

KLASIFAID**WANTOK**

N I U S P E P A

New Advertising rates
for Wantok Niuspepa
effective 1st July, 1999

Display Advertising Space. (Casual) Cost. K2.95 per column cm.


Advert. Space	Size	Mono K	1 Colour K	2 colour K	Full colour. K
Full Page:	38x7	784.70	984.70	1,184.70	1,584.70
Half Page:	28x5	413.00	613.00	813.00	1,213.00
Half Page:	19x7	392.35	592.35	792.35	1,192.35
1/4 Page:	19x4	224.20	424.20	624.20	1,024.20

Classified Rate K3.20 per column cm.

* All prices quoted do not include 10% VAT.

Compare Wantok's costs, K2.95 per c/cm against the dailies K6.52 for the same size.

Discount rates for volume usage
are available on request.



The Publishers of
Wantok,
Independent
and
PNG BUSINESS
Monthly

URGENTLY REQUIRE
DISTRIBUTOR FOR THE
MADANG PROVINCE

Interested Organisations and or
Individuals should contact the
Circulation Department on
Telephone: 325 2500

or

Fax: 325 2579**PABLIK NOTIS**

Farmset Limited

*The winner of the 30 Year
Draw Competition is:*

MATTHEW KAIDOGA*of Kavieng.*

The winning entry was drawn under
supervision by Goroka Police at Farmset
Head Office in Goroka on Monday 6th
September, 1999.

PETER NIELSEN
General Manager



Siaman, Bod bilong Dairektas, Menesmen na
olgeta wokmanmeri bilong Kofi Industri
Koporesen Ltd i salim tok sori i go long

Sir Mekere Morauta, Kt, MP

na ol famili bilong em long dai bilong pikinini
man, leit;


MR STEVEN ELAVO MORAUTA

Mipela tu i stap sori wantaim yupela long dispela
taim bilong bikpela sori.

"Kam long Mi, husat manmeri i gat bikpela hevi,
bai Mi givim yupela malolo". (Mathew 11: 28)

Em bai i ken slip wantaim malolo.

MR PUGMA KOPI
Chairman



• Sempion kiboksa Stanley Nandex i redi long holim semina.

Nandex bai holim semina long Lae

HENRY MORABANG i raitim

PAPUA Niugini Kiboksing Asosiesen bai holim wanpela semina long kisim nupela ol memba na tu makim tim long go pait long Australia long dispela mun.

Sempion kiboksa bilong kantri, Stanley Nandex yet bai go pas long semina wantaim wanpela yangpela paitman Peter Lailai.

Nandex i tokim *Wantok Niuspepa* olsem as bilong semina em long traim kamapim nem bilong kiboksing insait long kantri. Nau yet, planti man i no klia gut tumas long spot bilong kiboksing.

Em i tok dispela semina bilong kiboksing i op long kainkain man i ken kam na tren na pait.

Nandex i askim ol martial artis bilong Hailens na Momase rijen long kam stap long dispela semina. Em i tok semina i no bilong grisim ol memba i joinim kiboksing tasol long

mekim ol martial artis olsem kiboksing tu em wanpela martial arts spot. Sempion kiboksa i tok olsem dispela semina bai kamap long Sarere na Sande. Long Sarere, ol man o martial artis husat i kamap bai kisim liklik trening pastaim orait long Sande em taim bilong wokim seleksen.

Em i tok wanpela we bilong winim seleksen em bai ol man i mas pait wantaim em. Dispela pait em long lukim ol i gat stail o nogat.

Las wik tasol Nandex i kisim wanpela sempion boksa Andy Amex long kamap trena bilong em long sait bilong boksing.

Menasa bilong Nandex Ower Ila i tok bihain long Wol sempionsip long Gold Coast, Australia, ol i skelim olsem Nandex i nogat pawa long boksing tasol em i gat bikpela strong long lek ya.

Husat i laik kisim moa save long semina i mas ringim Henry Besu long dipela telephon namba 473 1656 o 473 1446.

Sisters winim netbal taitel

MOBIL Sisters i winim namba foa taitel olsem sempion bilong Lae netbal asosiesen bihain long ol i winim Bismark Kempa 40-36 long grenfainel las wiken.

Shirley Kori Bombe i go pas long dispela win taim ol i go pilai long ekstra taim. Long fultaim tupela tim i dro 31-31.

Insait long namba wan kwata, Mobil Sisters i wok long ran bihain long Kempa wantaim tri poin. Tasol long namba tu kwata, ol i pilai strong liklik na abrusim Kempa wantaim 14-13 skoa.

Kempa i pilai strong tru long namba tri kwata na ol i kisim lid wantaim 29-26. Dispela i wok long sutim tru bel bilong Mobil Sisters.

Dispela tain nau Shirley Kori i yusim liklik teknik bilong em long rausim golsuta Jacqueline Niblett na larim Helen Bailey long kisim ples bilong em.

Niblett na Bailey i wok long sutim olgeta gol bilong ol.

Kosa Kori i tok em i amamas long ol meri bilong em husat i pilai gut. "Olgeta meri insait long tim i mekim wok bilong ol oisem na tim i win."

Niblett, Salome Magatu, Bailey i wok long kamapim gutpela wok long suting eria. Na long midkot, Cynthia Pilamp na Lillian Kori i bung gut tru long setim ol suta bilong ol long putim gol.

Long defens em lapun Shirley Kori yet na Theodora Vevera husat i wok long stapim sempion suta bilong Kempa, Jenny Pokanau.

Kosa bilong Kempa Ara Hungrabos ol Mobil Sisters i fit na dispela i helpim ol long winim dispela gem.

Planti taim long ol kwata, ol meri bilong Kempa i wok long painim hat tru long bihainim bal.

Wau nogut oh!

WAU Soka Asosiesen i makim pinis wanpela strongpela wimens tim long salens insait long nesanel soka sempionsip long Lae. Soka sempionsip ya bai kamap long Indipendens wiken.

Kosa bilong Wau Sinka Yamu i tok ol klab opisel i bin bung na makim dispela skwat ya. Nem bilong ol pilaia em Atai Koimai, Nancy Issack, Magareth Abraham, Anna Koive, Koitup Sibe, Abub Waba, Tina Philip, Grace Alden, Amanda Issack, June Nero, Irata Tommeng, Denny Morgan, Milly Bangan, Roselyn Zaphael, Assani Moses, Martha Yang, Koit

Koimai, Esther Yosong, Ena Kamo Dor Tumai.

Menasa bilong skwat Joe Pogwic i tok ol meri i bin givim bikpela taim long trening long 4-pela wik olgeta.

Wau i gat wanpela intanesenel pilaia tasol em Amanda Issack na arapela em ol representativ pilaia olsem Grace Aldan, Anna Koive na Nero June we bai go pas long ol meri long gol main taun.

Insait long skwat tu i gat ol sampela ol yangpela pilaia husat i ken givim strongpela salens long ol arapela senta.

Long arapela soka stori, Madang i makim tu skwat bilong

man long stap long dispela sempionsip.

Godfried Baniaw, David Geladia, John Panu, Amos Romo, Arnold Arr, Allan Lalog, Michael Steven, Joshua Kambuka, Vincent Korey, George Sambri, Stanis Gufino, Michael Kami, Anzie Woso, Johnson Romo, Nukar John, Reginald Gagemin, Albert Malagian, Sagos Romo, Simon Sobo, Ken Laia na Membi Ken.

Kosa em Bob Morris, wanpela lapun bilong Madang. Em i askim olgeta pilaia long soim pes long Laiwaden long Mande apinun. Em i tok sapos wanem tim i ting olsem em i man, em bai aut long tim.

Ragbi yunion i makim skwat

POT MOSBI Ragbi Yunion i makim pinis tupela trening skwat bilong em long redim long taim bilong nesanel sempionsip. Dispela ragbi yunion sempionsip bai kamap long Oktoba 9 long Pot Mosbi yet.

Nem bilong tupela tim ya em Boroma (Pik) na Gaigais (Snek) we bai makim Nesanel Kapitel Distrik long sempionsip we bai pulim tim i kam long Lae, Rabaul, Goroka, na Ramu Suga na Daru.

Nem bilong ol pilaia em: Boromas: Kevin Rooney, Anthony Pangkatana, James Pomat, Richard Pangkatana, George Wartovo, John Kabua, Ian Liveras, Sebbie Lowon,

Gabriel Tika, John Panie, Nolan Warpin, Willie Petalie, June Makeau, Norman Tokunai, Ian Leklek, Main Wakina, Able Tore, Nicky Koivi, Peter Opa, Robert Doko, Paul Joseph, Billy Rapilla, Tevita, Valu Rova, Agabe Madabe, Winter Monagi, James Miviri, Paul Pomoso, Suttelfife Kavang, Seva Kaua, Andy Agovava, Jessie Mono.

Gaigas: Terence Kedea, Livingston Koi, Albert Kulume, Carl Hoots, Emmanuel Narakobi, Veva Hoki, Silas Pomat, Willie Rikis, John Larry, Ajay Sabumei, Eremas Simba, Tande Tokuk, Andy Vele, Vivia Calligan, Carl Okuk, Michael Bai, John Ovia, Nathan Chang,

Killen Pukakia, Jonathan Philip, Lawrence Posu, Greame Sakora, George Hoki, Emmanuel Eliphath, Chris Taberang, Henry Pius, Ela Ora, Joe Kautu, Tom Koi, Morea Kauna, Able Sem and John Katu.

Kosa bilong sempion tim, Harlequins John Pangkatana i winim wok bilong lukautim Boromas na Warwick Vele bai kosim Gaigas. Ol namba tu bilong ol em Boudie Meapo bilong Boromas na David Asoli bilong Gaigas.

Bai i gat liklik miting long 5 kilok long nau apinun, na olgeta pilaia i mas soim pes long dispela liklik miting.



• Ol pilaia bilong Harlequins i putim skram egensim Yunivesit long bikpela grenfainel bilong Pot Mosbi ragbi yunion long las wik Sarere. Harlequins i memeim ol 42-12.

Tupela senta i nogat primia tim yet

BIKPELA Cambridge Kap resis bai stat long dispela wik Sande tasol tupela senta Kundiawa na Wabag i no tokaut long husat i sempion tim bilong dispela yia.

Lista bilong ol tim i kam long PNGRFL hetopis long Pot Mosbi i soim olsem Kundiawa na Wabag i nogat tim long makim ol long dispela bikpela ragbi lig resis.

Bai i gat 5-pela gem long dispela wiken na wina bai go joinim 11-pela arapela tim long namba tu raun.

Nem bilong ol tim bai resis long dispela yia em Tari Tigers, Ialibu Tigers, Banz Bulldogs, Mendi Brothers, Minj Wests, Mt Hagen Raiders, Goroka Royals, Wewak Tigers, Vanimo Hawks, Port Moresby Souths, Kerema MMT, Lae Royals, Wau-Bulolo Warriors, Rabaul Balanatanaman, Kimbe Muruks, Kiunga Raiders, Tabubil Raiders na Popondetta Pati.

Jenerel menasa bilong PNGRFL Martin Adamson i tok olsem olgeta gem bai stat long

2.30 long Sande.

Get fi bilong ol man i go insait long lukim pilai em K2 (bikman na ol liklik pikinini wantaim).

Dro i sanap olsem:




Tari Tigers vs Ialibu Tigers -Mendi

Banz Bulldogs vs Mendi Brothers Banz

Minj Wests vs Kundiawa -Minj

Wewak Tigers vs Vanimo Hawks - Wewak

POM Souths vs Kerema MMT -Pom



Schnaubelt winim taitel namba tri taim

SEMPION Kyokushin karate man Walter Schnaubelt i winim PNG Open taitel namba tri taim las wiken.

Em i bin salensim karate man bilong Rasia Sergei Erchov long fainel.

Dispela pait bilong gren-fainel i no isi. Em i wanpela strongpela pait tru bikos Walter tu i laik winim bek taitel

tasol Rasia man ya i no save isi long em.

Dispela pait i pulim planti ol bikpela sponso olsem Isuzu na tu ol bikpela kampani long sapotim dispela pait.

Arapela PNG man Paul Pautani i kamap namba tri bikos birua bilong em Zak Kahier bilong Lebanon i kisim


bagarap long lek bilong em na dokta stapim em long pait.

Dispela em i namba wan taim dokta Gideon Kendino i stap long sapotim ol dispela kain tonamen. Planti ol sapota bilong spot i save olsem Kendino em wanpela strongpela sapota bilong ragbi lig insait long kantri.

Dispela pait ya i pulim ol paitman i kam long Rasia, Kanada, Lebanon na Australia.

Na long PNG yet ol paitman i kam long Lae, Rabaul, Hoskins, Kavieng na Pot Mosbi yet.

Man i pulim planti sapot tru em yangpela Paul Pautani husat i kamapim gutpela pait.



• Downer Construction Souths tim i kisim poto wantaim sil ol i winim taim ol i nekim Wests 34-8 long Pot Mosbi grenfainel las wiken. Souths nau bai makim Pot Mosbi long Cambridge Kap resis. Foto JOE IVAHARIA.

Souths gat gutpela sans

DOWNER Souths ragbi lig klap bai karim nem bilong Pot Mosbi long bikpela resis bilong Cambridge Kap long wiken.

Namba wan birua bilong Souths em ol lain Kerema MMT, we ol bai kisim nupela jesi long Rijonel memba bilong ol, Chris Haiveta tude long nesanel palamen.

Wantok i skelim dro bilong Cambridge Kap na painim olsem Souths bai gat isi rot long pilai long grenfainel.

Sapos em i win, Souths bai bungim Patti bilong Popondetta, na ol i win gen, ol bai salensim wina bilong Kiunga Raiders na Tabubil Raiders.

Na bikpela birua bilong

Souths long grup bilong em, em Rabaul Balanatan. Bala bai painim hevi liklik bikos Kimbe Muruks em wanpela strongpela tim we i gat planti ol pilaia i save stap long Kimbe Bulls long inta siti.

Sapos Bala i popaia, Kimbe Muruks bai skelim strong wantaim Souths long bungim wina bilong arapela grup long grenfainel.

Tripela biknem senta Goroka, Mt Hagen na Lae bai painim hat liklik long soim pes long grenfainel.

Souths i winim dabol taitel bilong Pot Mosbi. Em i winim maina primia na bihain em i winim primiasip taitel na bai makim Pot Mosbi long dispela

bikpela ragbi lig salens.

Insait long grenfainel, Souths i strong tumas na autim ol boi Wests 34-8. Dispela skoa i bikpela tru long histori bilong Wests na ol bai traim long painimaut wanem samting i mekim na ol i lus olsem.

Tim bilong ol Souths i gat gutpela fowat olsem Jackson Etape, Mike Wako, John Togola, Robert Tia na Eric Aba husat bai go pas long dispela win. Ol dispela fowat ya i givim hat taim stret long difens bilong Wests.

Long beklain Name Ossie na Roy Aburi i wok long kamapim bikpela hetpen stret long ol ya. Aburi husat i winim pilaia bilong gren fainel na tu em i

memba bilong Pot Mosbi Vipers ya.

Wests i gat liklik hevi bikos planti pilai i no save kamap long trening tasol kosa Sam Kaia i save putim ol. Gutpela piksa em Gideon Mati i nogat match fitnes long pilai long bikpela grenfainel.

Ol pilaia bilong Wests husat i taitim bun em ol boi long Gordons olsem Karo Mabua, tupela brata ya Steven Mune, Lakoro Mune, Gai Lapi na fada mutrus, Tuksy Karu tasol ol i no kisim gutpela sapot.

Bikpela fowat Luke "Borama" Andrew tu i taitim bun tasol ol sapot pilaia i no stap long helpim em long brukim difens bilong Souths.

Orogen driman long putim tim long Wol Kap

HENRY MORABANG i raitim

MENESING Dairekta bilong Orogen Limited Charles Lepani i autim tingting bilong em long PNG i mas gat wanpela soka tim long resis bilong Wol Kap long 2006.

Em i mekim dispela toktok long wanpela belo kaikai bilong ol bikpela kampani long Islander Travelodge long painim mani long salim PNG Anda 11 soka tim i go long Cairns Australia.

Tim ya i bilong Pot Mosbi Skuls Soka tasol bai makim PNG long John Bomben Soka kanivel long Cairns, Australia. Tonamen ya bai kamap long Septemba 20 na pinis long Septemba 25.

Dispela John Bomben tonamen i save kamap oigeta yia, na em i namba wan taim PNG o Pot Mosbi i salim wanpela junia tim.

Lepani i tokim ol bikman bilong ol kampani olsem em i amamas tru long sapot ol i givim long Orogen long taim.

Siama bilong Ogenaisng Komiti Steve Mobbe i tok olsem wok bilong painim mani i hat tru bikos long hevi kantri i bungim.

Tasol em i amamas tru long Orogen long go pas long painim mani long salim tim i go long Australia.

Mobbs i tokaut olsem ol skwat memba yet i wokim olsem 12,000 long go stap insait long dispela tonamen.

Insait long dispela belo kaikai, Orogen i salim wanpela tebol long K1000 na i mekim klostu moa K20,000.

Lepani i givim bikpela tenk yu i go long ol wokman bilong Orogen husat i givim taim long redi dispela kaikai aste.

Orogen Limited em i mesa sponso bilong skuls na yut soka insait long kantri. Las yia, kampani ya i givim K100,000 i go long Pot Mosbi Skuls Soka long ranim nesanel Orogen Soka Kap salens. Nem bilong ol dispela pilaia em tupela kosa em Alesana Desmond na Channel Kakehe. Ol pilaia em Red Tim - Simon Davis, Charlie Evara, Maurice Izard, Ivan Kalzer, Joseph Kakehe, Jason Kariko, Patrick Kiromat, Yahee Kusunan, Thomas Lemon, Kele Lessy, Sammie Campbell Misirat, Gado Mitchie, William Mobbs, Dominic Oim-Millingan, David Turia

Na long Gold Tim, tupela kosa em Collin Morea na Ludwick Kiromat. Ol pilaia em

Tamata'ane Amons, Alcysius Barabar, Mohamad Ridwan Bin Hamzah, Hoko Hauhe, Taunao Lovai, Senyo Kosi Jiagee Mauwuli, Barry Pascoe, Emmanuel Popoital, Darren Short, Chrsander Gengis Siri, Noel Beangke, Joseph Nicholas Tata, Jessman Tengdui, Joshua Tore, Samuel Uvau na Ryan Woolly.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.